

JOWĀW

Te Jeju Jarĕn Xà Impejti

JŌ KÀHHÔC

Yhỹ, pê Jowāw ihkàhhôc ita to, ne Jeju na mehkwȳ cunea mã ihkujate. Ne pê cupê Jeju jarkwa na memprar catêjê nõ. Ne pê mam cupê tep pro catê, pê Jeju amji kôt ipa catê na ahna ahwỳ. Pê caku crê kam ajco Jeju kôt apu ipa, nepê Jeju te amji kam hapac xà cunea na hõmpu. Ne pê Jeju mã mehkwȳjirôa pê Jowāw kĭn. Ne hõ kàhhôc kam cute pjê ita kam Jeju te mõr reriamã cute ampo kwỳ ton, ne ihkwỳ jarĕn xà itajê kwỳ na ihhôc. Ne hõ kàhhôc ita kam cute, me pahte ampeaj kam Jeju to amji mã me pahhimpej tome pamã hahkre. Ne ampeaj kam ri cupê Pahpãm kraa to Pahpãm kra, ne taa mã ri Pahpãm cahê na me papa rohnỳtti mã na me pamã to hahkre. Ne hõ kàhhôc japrỳ pê **Jowāw Te Jeju Jarĕn Xà Impejti JŌ Kàhhôc** (Jowāw).

Jeju pê Pahpãm

¹⁻² Mam, ampo cunea cumam, pê ramã me pajõ Pahhiti ipa. Ne me pamã cupê Pahpãm cakôc xà me harkwa. Ampo na? Taa mã ri me pamã Pahpãm te amji kam hapac xà me, incaca xà to ipipê to ipa. Ne pê Pahpãm cahêa na maam ajco apu ipa ne me ajpĕan.

³ Na pê me pajō Pahhiti Hūm Cati jarkwa kôt ampo cunea ton partu, pê nee iràn xà na, ampo hūhkra kaj na, amjia kôt amji ton nare.

Pê Jeju me pamã Hūm Cati jahkre

⁴ Na ri cupê me pahte amji kam me pajapac xà cunea xakat. Ne pom hãn ne pyt pjê cunea kujro, cu hàhcujro kôt me ampo cunea pupu, ita na mã me pajō Pahhiti me pahcunea mã pahte mehahkre pej xà gō, mār cu ihcunea na me Pahpãm pê Hūm na me hahkre pej ne me hōmpu, ne cahê na me papa rohnýtti mã.

⁵ Pyrác pej na mã me pajō Pahhiti pê me pahcujro xà, ata kôt cu meHūm Cati jahkre pej ne me hōmpu. He jūwýr quê mehkên ton catêjê nõ, pê ihhêj rŭm awcapàtkô kam mehkricatêjê atajê kwý, me pahte me Pahpãm pupun nare prámte, me papê cute me pahcujro xà ita pro ne cupĩ.

⁶ Ne pê me pajō Pahhiti cator xwýjrea na, mam Pahpãm me pamã harkwa na imprar catê pê Jowãw te cô kam me cumrãr catê ata kujate, cute me pamã me pahcujro xà pê me pajō Pahhiti ita to hūjarên, ne to hahkre xà caxuw.

⁷⁻⁹ Ne pê Jowãw xwý pê me cumrãr catê ata nee ihcakôc xà to:

— Ipê ihhêj rŭm me acujro xà — hajýr nare, ne cama harkwa to:

— Quê ha cormã me pamã me pajō Pahhiti cato, ata pê ri ihhêj rŭm me pahte amji kam me pajapac xà cunea kujro xà, pjê cunea kam. He cupêa ri quêt me pahcujro xàa to mepahcujro xà — hane. Ne pê Jowãw me pamã me pajō

Pahhiti to hahkre, pahte me hahkre pej ne to amji mã me pahhimpej xà caxuw, pê me pahwÿr cato.

Quê ha jũm te Jeju to amji mã ihmipej na, quê ha cupê Pahpãm kra

¹⁰ Ne me pajõ Pahhiti pê Hũm cakôc xà me harkwa ata pê mam ampo cunea to, ne taa mã pê pjê ita wÿr wrÿ ne apu ipa. Mã xãmte pjê kam mehcunea te nee cupê ampo cunea ton catê na me hahkre pej nare.

¹¹ Ne ma Juta catêjê jõ pjê wÿr cator, mã nee ajte cute ahna me amji caxàr nare.

¹² Mã menchrêre pyxitre te ahna me amji caxàr, ne cumã me amjiõr, ne toa amji mã mehhimpej to me ipa, ne me cumã:

— Apê Pahpãm kraa to ihkra — hajÿr. Cwÿrjapê ri Hũm te ihtÿj ihkôt me to amji kra.

¹³ Cu me paxũmre nee ame pahkra ton to hajÿr nare, ne ajteare mã me. Quê ha me paxũmrenõ mã ihkra prãm, quê ha xa ihprõ nõ me hikwa, ne ajpẽn kam mehkra, quê ha cormã me cumã ihkra. Ne Pahpãm te nee hajÿr nare. Quê ha cama, por jũmjê me pajõ Pahhiti to amji mã mehhimpej atajê mã harkwa to:

— Imã me ato amji kra to prãm. Na wa ha amã Icarõ Pejti kôt, ate amjikam gapac xà tuw pejti gõ, mâr ca apê ikra — hane. Pea quê ha jũmjê atajê amji to Pahpãm kra pyrentu.

¹⁴ Ne pê me pajõ Pahhiti pê Hũm Cati cakôc xà me harkwa ata, me pahwÿr wrÿ, ne me pajã na amji to, ne ajco apu ipa. Pê wa me hõmpu. Pê cupê Hũm mã ihkra pyxit peaj ata. Cwÿrjapê

ri carôt tỳj me Hũm carôt tỳj pipēan, ne impej me Hũm pej pipēan. Na ri cute Hũm cuxà amji mã me pajapêti to cator, ne cute me pahpytār catê na amji ton. Ne cupê Hũam, ne nee apu ihhêj xi jarēn nare, ne quêt catyt kam, ampeaj kam mehcunea mã Hũm Cati jarkwa to hũjarēn to ipa.

¹⁵ Ne pê Jowāw pê me cumrār catê ramã ita na me cumã to hũjarēn to hane he:

— Pom Jeju ita pê Pahhiti, pê wa ramã me amã to icakôc ne harēn to: “Taa mãquê ha hapu na ikôt cator cakrô, ijirôa pê cati. Ampo na? He pê ramã ipỳm xwỳjrea na ajco apu ipa, na ca ha ijirôa pê amji mã mehũpa” — hane.

¹⁶ Ne Jeju mã ri ampeaj kam me pahcunea caprĩ, ne cumã me pahkĩn. Cwỳrjapê ri hōtpê me pamã ampo pej cunea ton to ipa rohnỳtti mã.

¹⁷ Ne pê rỳ pêa mã Mojxe xwỳ ramã me cumã Pahpãm harkwa jirēn xà atajê gō, ne pyxit peaj to mecumã hahkre. Ne Jeju nare, quêt ihtỳj cumã me pahcaprĩ, mã me pahtehcajpa. Ne me pamã Pahpãm jarkwa pejti pê ampeaj kam ata to hahkre.

¹⁸ Ne rỳ jũ caxuw jũm te pjê kam Pahpãm pupun nare. Mã ihkra pejti pyxit peaj ata pê Hũam pyrác ne cume ipipēan. Na pê cu hĩa na me hōmpu, ne taa mã riHũm cahê na amji kôt me pamã Hũm to hahkre, ne ihkôat cu ha me hahkre pej.

Pê Jowāw pê me cumrār catê, ramã Jeju cator xwỳjrea na mehcũmpej

19 Mā Krīpinkrên kam Juta catêjê jŏ pahhi kwỳ te Jowāw te me cumrār catê wỳr, Pahpāmmā mehcajrên catêjê me, Rewi catêjê pê Pahpām jūrkwā jamār catêjê me, mehkujahêc, cute me Jowāw cukij prāmte. Mā cute mehcukij to:

— Me anō mā ca? — hajỹr.

20 Mā Jowāw te hirāa pê me cumā amji jarēn to:

— Nee ipê, por pê Pahpām mehkwȳ mā me hūtār catê to awjahkre ata nare — hajỹr.

21 Mā hipêr cute mehcukij ne me cumā:

— Ne mēr me anō mā ca? Xà ajkĩ apê Erij xwỳ mā ca hacpỹa mātĩr? — hajỹr. Mā Jowāw te me cumā harkwa to:

— Quê, ipê jūm ata nare — hajỹr. Mā me cumā:

— Xà apê, por pê Pahpām me imā harkwa to ihcakôc catê to awjahkre, wame hikaj ata mā ca? — hane. Mā Jowāw me cumā:

— Quê! Pa nare! — hane.

22 Mā hipêr cute me Jowāw mā harkwa to:

— He me anō mā ca? Me imā amji jarē. Wa me gahkre pej ne ma hacpỹ mā cute awỳr me ikujahêc atajê wỳr me pra, ne me cumā garē — hajỹr.

23 Mā Jowāw te me cumā Ixaj xwỳ jŏ kàhhôc kôt harēn to:

“Ipê, por pŏ kam me hamreare kam me cumā ijũjarēn to hajỹr to ipa catê ata he:

‘Me pajŏ Pahhiti mā me hŏ pry to ihcuhtac ne, mār quê ihtỳj ihkôt mŏr pejti ne’ hajỹr.

Jĭkjê na quê ha mehcunea cator xà ata caxuw cute me amji kam hapac xà to impejti to me ipa, ne catyt kam me ipa” hajÿr.

²⁴ Ne por pê ame Jowāw cukij atajê pê Parixêw catêjê kwÿ.

²⁵ Ne hipêr cute mehcukij to:

— Pom nee apê, por pê Pahpām me pamā jūm to awjahkre ata nare, ne nee apê Erij xwÿ ata nare, ne nee apê Pahpām jarkwa to ihcakôccatê wa me hikaj ata nare, nō na mā ca atÿj cō kam mecumrā? — hajÿr.

²⁶ Mā Jowāw te me cumā harkwa to:

— He wa cō cokrô kam me cumrā, ne por me acote na quêt jūm apu ipa ata, ca nee rÿ ate me hahkre pej nare.

²⁷ Ne taa mā quê ha ijakàn pê cator cokrô, wa nee ite hūpa cahi ne cupê hō parkà tūm caxàr xà caxuw ipej nare. Ampo na? He taa mā riijirôa pê cati — hajÿr.

²⁸ Hōhō, ita pê hane, ma Cōhnameirêrxà jō krī kam, Cōpijapjêr jō cōjĭkjê rūm. Por pê curi Jowāw ajco apu cō kam mecumrār to ipa ata ri.

Pê Jowāw pê mehcumrār catê me cumā Jeju jahkre

²⁹ Mā amcro nō na Jowāw te amji wÿr Jeju mōr na hōmpun, ne me cumā harên to:

— Me Pahpām jō Caràcahàcre Kra ca me hōmpu he, ramā ajpên mō he. Ne taa mā quê ha pjê kam me pahcunea kên jūhta ne to hamre! To hanea, pom cu pahte amji kam me pajapac xàa na, me pahkên jahpan xà na, Pahpām mā me

pajàmjör xà caxuw me ampo pê me pahkritxwỳ cura, ne me cumã to amgõ he. Ita jìkjê na, quê ha me pajaxà kam ty, ne me pahkên cunea to hamre.

³⁰ Wa ite ramã catyt kam me amã to icakôc to: “Quê ha cormã ikôt hapua na jũm xũmre cato ata, quê ha ijirô pê cati. Ne ampo na mã ijirôa pê cati? Nee mã ampo na ijirôa pê cati nare. He pê quêt ramãixwỳjrea na apu ipa, cormã ipým nare kam” hajÿr.

³¹ Pê wa nee cupê jũm te hajÿr xà ata na hahkre pej nare cakrô, pê wa itÿj cô kam ihcumrã. Ne nee mã pê wa ampo na apu to hajÿr nare. Ite Juta catêjê mã cupê jũm te hajÿr xà ata nato ipipê to hajÿr prãmte, pê wa to hane.

³²⁻³³ — Ne pê wa nee cute hajÿr xà ata na hahkre pej nare, mã Pahpãm te cô kam mehcumrãr catê na imên ata te imã harên to: “Ca ha Icarô te tutti na amji jahkre, ne còjkwa pĩn ahpar mã pjê wỳr tẽ, ne jũm xũmrecwỳrpê hàhhuc na hõmpu ata, quê ha cupê me cumã Icarô Pejti jör catê. Mãr quê Icarô Pejti ata me cumã ite amji kam ijapac xà to hahkre” hajÿr. Wa irĩt, ne ite còjkwa pĩn Pahpãm Carô Pejti te tutti na amji jahkrene ajpên ihtêm, ne Jeju cwỳrpê hàhhuc na hõmpun.

³⁴ Ne ite hõmpun xà ata kôt wa ite hirãa pê me amãJeju pê Pahpãm kra na harên — hajÿr.

Pê Jowãw pê mehcumrãr catê kôt me ipa catêjê me Jeju pynã

³⁵ Mã hipêr amcro nõ na Jowãw curia apu ihkôt me ipacatêjê pijakrut atajê me, ame ipa.

³⁶ Mā hipêr cute me ahnaa Jeju mōr na hōmpun, ne me cumã harên to:

— Nãmhã, Pahpãm jŏ Caràcahàcre Kra apu mōhe! Cupêa ri me pahkritxwý, ne taa mã quê ha me pahkên jahpan xà na ty — hajýr.

³⁷ Mā ihkôt me ipa catêjê pijakrut atajê te mempar, ne ma me Jeju pynâr ne ihkôt me mō.

³⁸ Mā hacpý mã Jeju rît, ne cute me hōmpun, ne mehcukij to:

— Ampo japên to mã ca ikôt ame mō? — hajýr. Mā me cumã:

— Ikrã tũmti, jŏ ri mã ca akrĩ? — hane.

³⁹ Mā Jeju me cumã:

— Ajpên ikôt me mō, ne imã me ikrĩ xà pupu — hane. Mā ma ihkôt me mō, ne cute me cumã ihkrĩ xà pupun. Ne curia pyt xà wýr, cahê na ame mō, pê ramã me ahna pyt to mō.

⁴⁰ Pê me ajkrut ne Jowãw te Jeju jarên na me kampa, ne me Jeju pynã atajê nŏ pyxit ata japrý pê Antre, ne cupê Ximãw Petrôtŏ te amji to hapu na kjê.

⁴¹ Ne ma Antre ihtêm pyrentu, ne mam ihtŏ kà Ximãw wýr cator ne cumã hũjarên to:

— Wa ite, por pê Pahpãm me pamã me pajŏ Pahhiti pê Mexij to awjahkre ata na icator — hane. Por pê Juta catêjê jarkwa nahaprý Mexij, ne Crec catêjê jarkwa na me cumã haprý to Crixto ata. Ne pê haprý pijakrut itajê kôt harên xà pê “Cute capi ne ahna hãm” hane.

⁴² Ne ma Antre te ihtŏ kà japrŏr ne to mō, Jeju wýr. Mā Jeju te Ximãw pupun ne cumã:

— Gaprý te Ximãw, ne apê Jona kra, ne hamre ita caxuw quê ha gaprý pê Xepa — hajýr. Pê Crec

jarkwa na Xepa ita pê Petrô, ne ihkôt harën xà te “Kën”.

Pê Jeju Pirip me Natanew te ihkôt me ipa xà na me cumã akij

⁴³ Ne amcro nõ na Jeju te ma Hĩpôjajo jŏ pjê wÿr mŏr to amji kam hapac. Ne mŏr xwÿjrea na cute hũmre nõ japry te Pirip ita cajpar ne cumã:

— Ajpên ikôt mŏ! — hajÿr.

⁴⁴ Ne Pirip ata pê Tep jŏ krĩ kam mehkwy nõ, por pêcuri Antre me Petrô ihkrĩ atajê kwÿ nõ.

⁴⁵ Mã Pirip apu hŏ kwÿ nõ pê Natanew japê, ne cute ihcajpar ne cumã:

— Wa ite, por pê Mojxe xwÿ me pahte amji kam me pajapac xà jŏ kàhhôc kam, jũm na ihhôc ata na icator. Ne cupê, por pê hanea ne Pahpãm jarkwa na mehhôc catêjê ahna mehhôc ata! Ne cupê Jeju, ne cupê Naxare jŏ krĩ kam, Joje ihkrĩ ata kra — hajÿr.

⁴⁶ Mã Natanew te ahna ihcukij to:

— Xà quê ajkĩ ihtÿj Naxare jŏ krĩ pĩn ampo pejti cato? Jũ wÿr quê ampo pej cato! — hajÿr. Mã Pirip cumã:

— Ajpên mŏ ne hŏmpu mã — hane. Mã ma ihkôt Jeju wÿr tẽ.

⁴⁷ Mã Jeju te ajpên Natanew te hÿrmã mŏr na hŏmpun, ne mehkwy mã to hũjarën to:

— Me hŏmpu he! Ajpên hũmre pê quêt catyt kam ipa catênŏ ata mŏ he. Ne nee quêt ihhêj xi nare, ne cupêIxaher catêjê nõa, ne impejti! — hajÿr.

⁴⁸ Mã Natanew te impar ne cumã:

— Jũ mã mã ate ne ijahkre pej? — hajÿr. Mã Jeju cumã:

— Wa Pirip te gaprôr xwÿjrea na ite apupun, ca ihmãt ri pĩxô pàr krac ri jÿ — hane.

⁴⁹ Mã Natanew Jeju mã:

— Ikrã tũmti, apê Pahpãm kraa to ihkra! Ne wa itÿjapê Juta catêjê jŏ Pahhiti na amji mã ato hane! — hane.

⁵⁰ Mã Jeju cumã:

— Xà wa ite ihmãt ri pĩxô pàr krac ri ajÿr na apupun ne garên xà ita kôt mã cacormã ate ito amji mã ahimpej? Ca ha cormã jũ caxuw quêt ampo ita jirôa pé ihnŏ catia ata pupu — hane.

⁵¹ Ne cute mehkwy mã harên to:

— Wa ha ampeaj kam me amã awjarẽ, ca ha atÿj cŏjkwa teamji jihê mên na me hŏmpu, ne ajpên iwÿr Pahpãm mã hàpên catêjê te me irôrôc, ne hacpÿ mã me hàpir na me hŏmpu. Ampo na? He ipê cŏjkwa kam me Ahàkà cati ata wa, ne cama ite me hũmre na amji ton ne me awÿr iwryc — hajÿr.

2

Pê Jeju cŏ kam pĩxô cacô xÿre to

¹⁻² Ne ahna amcro pijakrut jirô pé mã ri cute me hikwa tuw catêjê nŏ jŏ amji kĩn jarên par, Têtêc jŏ krĩ wên kam, Hĩpôjajo jŏ pjêkam. Mã cute amji kĩn ata caxuw me Jeju me, me ipê ihkôt me ipa catêjê jator. Wa ma ihwÿr me mŏ ne me icator. Mã ramã curia Jeju menxi apu mŏ.

³ Mǎ amji kǐn ita cahti ri ampo pǐxô cacô xýre ata jamre. Mǎ Jeju menxi te pǐxô cacô jamre na hōmpun, ne ma ihcāmter wýr tē ne cumǎ:

— Ikra, hamre, me cupê pǐxô cacô jamre — hajýr.

⁴ Mǎ Jeju te impar ne cumǎ:

— Ampo caxuw mǎ ca inxê apu imǎ ita jarẽ? Nee ate imǎ ita jarēn xà hamreare, wa ramǎ ite hahkre pej. Ne cuna mǎ cormǎ nee ite ampoitajê nō ton xà kam hàhhuc nare — hajýr.

⁵ Mǎ ma inxi amji kǐn jŏ pahhi mǎ me hàpên catêjê wýr tē, ne cute me cumǎ:

— Ca ha atýj ikra te ampo na me amǎ hūjahkre xà atajê to me cumǎ — hajýr.

⁶ Pê curia kēn te pot catia to cati te xêj atajê ihcuuhê. Ne ihkwý ihtýj cô to rit to ôjtēnta ne cucwa, ne ihkwý ihtýj cô to rit to xêj ne cucwa. Pê Juta catêjê ihtýj ajco cô ata to me amji cuhhô, cute to me amji pyrác xà ata kôt.

⁷ Mǎ ahtümre mǎ, Jeju amji kǐn jŏ pahhi mǎ me hàpên catêjê atajê wýr tē, ne cute me cumǎ harkwa to:

— Cô to me pot itajê to me hipu partu — hajýr. Mǎ ihtýj harkwa kôt cute me to hipu partu.

⁸ Jirô pê mǎ ri cute me cumǎ harkwa to:

— Caxi me cô ita crire ne me haxà, ne amji kǐn jŏ pahhi wýr me to tē, ne me cumǎ agô, quê capi — hajýr.

⁹ Mǎ jūm ita te ihkwý jaxàr, ne hýrmǎ to ihtēm kwýa kam, mǎ ramǎ cute pǐxô cacô na amji ton. Mǎ cute amji kǐn jŏ pahhi mǎ hōr, mǎcute capi, ne nee cute cô te ampo pǐxô cacô xýre na amji jahkre ata na hahkre pej nare. Ne nee cute jū

rũm cator xà ata na hahkre pej nare. Ne cumã me hàpêncatêjê mã ri quêt hahkre pej.

¹⁰ Na ri amji kîn jŏ pahhi te hikwa tuw catê ata na hàhwÿr ne cumã:

— Pÿhàpà, ajte ihhêj ne mam ate me cumã kyre pê pîxô cacô impej ata jŏr, mã cute ame to ihkôm. Jirô pê mã ca ate cormã me cumãimpeaj ita jŏr. Ne ihhêj ne ate pahte me to amji pyrác xà ata to gâhpan, ne ate hìcu xà caxuw impejti ata juwahi — hajÿr.

¹¹ Hŏhŏ, pê Jeju carôt kôt ampo pihho ton kam to tēm to hane, ne ajco carôt to ipipê toipa, Têtêc jŏ krī kam, Hīpôjajo jŏ pjê kam. Ne pê carôt tÿjti impejti ata to me cumã ajpê. Pê wa me ipê ihkôt me ipa catêjê, itÿjamji mã me to ihmpej, ne mempar pyrentu.

¹² Ita jirô pê mã wa me ipê ihkôt me ipa catêjê me, Jeju me, inxi me, mehkjêjê me, ma Capernam jŏ krī wÿr me mŏ, ne curia wa ite ijŏtpême amji to amcro kwÿ kujahêc.

Pê Jeju Hũm Cati jŭrkwa pê ihpore to hàhpan catêjê cato

¹³ Ne Juta catêjê jŏ amji kîn japyrÿ te, me Hakren xà jŏ amji kîn jŏ amcro ata, pê ramã cator xàa kam, ne ramã hũ na pire mã. Ne amji kînata pê, por pê Ejit jŏ pjê kên pîn, menquêtjê cator xà atajê jŏ amji kîn. Na wa ma Jeju me Krīpinkrên wÿr mŏ.

¹⁴ Ne Pahpãm to me amji kam hapac xà jŭrkwa kam, Jeju te jŭmjête carà cahàcre hŏhti me, pryti me, tutti to ihporena ame hàhpan na me hŏmpun. Ne hanea ne cutejŭmjê atajê te mehkrī

ne me hàhtôa mã ihpore to hàhpan na me hõmpun.

¹⁵ Ne ame kam incryc, ne me caxuw cute pàrcuxê to mehcahyr xà ton, ne pō mã mehcunea to cator, ampo atajê mea mã. Ne cute ihpore to me hàhpancatêjê pê ihpore pyxwÿr xà mên, ne pjê kam hõ pore jaxwÿr partu.

¹⁶ Ne cute, por ihpore na me tutti to hàhpan to me ipa atajê mã harkwa to:

— Ikre ita pê ampo itajê cunea to me gapôj partu! Ne nee ca Inxũ jũrkwa kam apu amji mã ampo itajê to ihpore na me gâhpan to me apa nare. Xà aracri Inxũ jũrkwa ita pê ampo to ihpore na kam me hàhpan xà? — hajÿr.

¹⁷ Cwÿrjapê wa me ipê ihkôt me ipa catêjê te Pahpãm jŏ kàhhôc kam ita to hũjarên na me to amji japackre, pê ramã harên to:

“Imã Pahpãm to amji kam me hapac xà jũrkwa ita kïan to ihkïn.

Na wa nee kam ampo kên xãm na hõmpun prãm nare, ne wa ampo pej to pit mã kam me amji japackre” hajÿr.

Pê pahhi catêjê Jeju te ampo pihho catia ton na mehcukij

¹⁸ Mã Juta catêjê jŏ pahhi kwÿ te ita naharên par ne mehcukij to:

— Jũm te mã, ate ame to hajÿr xà ita na, amã harkwa? Jũm te mã ahna amên? Xà ajkĩ Pahpãm te mã ahna amên? Mër hõhõ, acarôt catipahtÿjti ita to me imã ajpê, wa ha ahna me apupu, ne cormã Pahpãm te ahna amên na me

gahkre pej — hajÿr. Mă Jeju te me cumă amji jarĕn to:

¹⁹ — Ca ha me Pahpăm jŭrkwa ita hu, wa ha hacpÿa mă amcro incrĕ peaj kamhăm, ca ha cormă ihkôt Pahpăm te ahna imĕn na me ijahkre pej — hajÿr.

²⁰ Mă cute me Jeju mă ikre jarĕn to:

— Pĕ me Pahpăm to pahte me amji kam me pajapac xà jŭrkwa ita to me hàpĕan to me caku to cwarĕnta ne ihkôt xĕj, ne me hipĕj, nŏ na mă ca ajte amcro incrĕ peajkam hacpÿa mă ate hăm na amji jarĕ? — hajÿr.

²¹ Por pĕ Pahpăm jŭrkwa to Jeju ihcakôc ata pĕ nee kĕn te ikreata nare, ne amji jĭa to pĕ me cumă ihcakôc.

²² Ne pĕ hacpÿa mă ihtĭr, pĕ wa cormăhŭjarĕn xà ata to me amji japackre, ne itÿj me ihkàhhôc kam Pahpămjarkwa kampa, ne Jeju cakôc xà na me kampa.

Pĕ Jeju nee amji mă me hàhtôti atajĕ to hajÿr nare

²³ Pĕ Jeju me Hakren xà jŏ amji kĭn na Krĭpinkrĕn kam apu ipa xà ata kam, pĕ me hàhtôa ne ihtÿj cupĕ Pahpăm kra na amji mă me to hane. Ampo na? Nee măampo na nare. Pĕ ajco Jeju ihtÿj Hŭm carôt kôt, rÿ jŭ caxuw, jŭm te ampo cupahti pihho pupun nare atajĕ to na pĕ.

²⁴ Cakrô pĕ nee Jeju cormă amji mă me hàhtôti atajĕ to taa mă nare. Ampo na? Pĕ ajco mehcunea mă cute me amji kamhapac xà pupu, ne me hahkre pej to ipa na pĕ.

²⁵ Ne pê jũm te cumã me harën nare kam, pê ajco taa cute me amji kam hapac xà na me hahkre pej.

3

Pê Pahpãm te me pahto ipintuw xà pê hacpỹa mã me pahpỹpỹm xà pyrãac

¹ Ne pê hũmre nŏ japrỹ te Nicotem ata pê Jutacatêjê jŏ pahhi na mehkwy nŏa, ne cupêParixêw catêjê kwỹ nŏ, ne cupê Mojxe xwỹ jŏ kàhhôc to me cumã hahkre catêjê nŏa.

² Ne ma caxwa ri Jeju wỹr mŏ, cute hŏmpun, ne cumãihcakôc prãmte. Ne hỹrmã cator ne cumã:

— Ýhỹ Jeju, wa ite, Pahpãm te me imã apê ampo to hahkre catê na akujahêc na gahkre pej. Ampo na? Ca atỹj Pahpãm carôat to ampo pihhoti jãhtôa ton to apa atajê, ihtỹj Pahpãm carôt tỹjti toipipê to mŏ. Jũ wỹr quê Pahpãm jũm kujahêc nare, quê jũm ampo itajê nŏ to — hajỹr.

³ Mã Jeju cumã:

— Ýhỹ, wa ha nee amã ihêj xi jarën nare. Quê hajũmjê mã Pahpãm himpej xà mã mencjêj to prãm na, quê ha xa hacpỹa mã amehpỹpỹm — hajỹr.

⁴ Mã Nicotem cumã:

— Pỹhãpã, jũ wỹr quê ha ramã jũm kãhtu ataamji mã hamã, nehacpỹa mã inxi tu mã axà ne hipêr ihpỹm — hane.

⁵⁻⁶ Mã Jeju te cumã ihkôt harën to:

— Ỹhỹ, wa nee apu amã ihêj xi jarên nare. Quê ha jũmjê te Pahpãm himpej xà mã incjêj prãm na, quê ha xa hacpỹmã amehpỹpỹm, jirô pê mã quê ha cormã me acjêj. Pêca mam gĩ to, anã tu kam cô ata kôt apỹm, ne apêanã kra. Jĩkjê na, ca ha hipêr Pahpãm Carõ Pejti kôt, acaxwỳn carõ to amji mã intuw, ne apê Pahpãm kra.

⁷ — Nee ca ite amã hacpỹa mã, me acunea pỹpỹm na me garên ita to amji mã ame apikrar nare.

⁸ Ampo na? He Pahpãm Carõ Pejti kôt amehpỹpỹm xà ata pê ihhêj rũm kôc pyrãac. Jũ wỳr ca hajũ kam kôc te hàpêr xà na amji mã prãm xà ata wỳrhàpêr na hõmpu. Ca ha me hàmcoco pit kampa, ne nee hõmpun nare. Ne nee ca ha jũ pĩn cator xà me, jũ kamihtêm xà ata na hahkre pej nare. Jĩkjê na mã, Pahpãm Carõ Pejti jàpên xà pê hũràac. Ne nee quê ha jũm Pahpãm Carõ Pejti te jũm to amji mã ihkra xà ata na hahkre pej ne hõmpun nare — hajỹr.

⁹ Mã Nicotem cumã:

— Jũ mã quê ajte ita, ne hane? — hane.

¹⁰ Mã Jeju cumã:

— Pỳhàpà, pom apê Juta catêjê mã ampo to hahkreatê ita! Nõ na mã apê ampo ita jahkre kêatre?

¹¹ Wa ha nee amã ihêj xi jarên nare. He wa amcro cuneakam me akwỳ mã, ite ampo jahkre pej itajê to hahkre to ipa. Ne hanea ne ite ito jĩa to ampo pupun atajê pupun xàa kôt, wa me amãharên to ipa cakrô, ca ajte nee cormã ate me ipar nare.

¹² Ne wa ramã ite me amã pjê ita kam ampo te jũ mǎnxà ata na harên, ca nee ajte ate ikam me gapac nare. Itakam, ca ha pijamã ite me amã cōjkwa kam ampo jarên xàatajê cunea na me ikampa? Me gūpar nare ita kam, ca ha nee me ikam gapac nare.

¹³ Ne rỳ jũ caxuw cōjkwa wỳr jũm jàpir ne hacpỹne cute amji jaxàr nare. Ne pa nare, he ipê kỳj pê, cōjkwa kam me Ahàkà, cwỳrjapê wacurũam ite me hũmre na amji ton ne iwryc.

Cu ha amji mã Jeju to pahhimpej na, cu ha Pahpãm cahê na amji to me ajpa

¹⁴ — Ne pê Mojxe xwỳ mat ri, pō kam mehamreare ata ri, wakỳre te cagã to, ne pĩ na cuxô. Ampo na? Nee mã pê ampo na wakỳre te cagã ata xôr nare. Pê cagã ajco me cãmxa, pê me wakỳre te cagã ata pupu, nehacpỹa mã mempej. Ita jĩkjê na wa ha hanea. Quê hajũ caxuw me ito wakỳre te cagã ata pyràac, ne me icuran xà caxuw, pĩ na me ixô.

¹⁵ Quê ha jũm ito cagã ata ne ipupu, ne ito amji mãihhimpej, quê ha ihtỳj ihtyc xà jirô pê ampo kên catia ata pê amji pytà, nePahpãm cahê na amji to ipijapar rohnỳtti mã.

¹⁶ — He ampeaj kam Pahpãm mã pjê kam mehcunea ame ipa itajê kїн, mã cute me cumã, ipê cumã ihkra pyxit peaj kїnti atato hũjahkre ne hōr, ne pjê wỳr ajpên ikujahêc. Mār quê cute ito amji mã mehhimpej atajê me ty, ne nee mehtyc tu ne Pahpãm kaj na ame ipa nare, nequêt hacpỹamã mehtїr, ne Pahpãm cahê na me ipa rohnỳtti mã.

17 Pê nee Inxũ imã harkwa to: “Cute mehkên ton jahpan xà na, pjê wÿr wÿr ne curê mã me amẽ” hajÿr nare. Ne quêt cama imã: “Ca ha wÿr ne mehkên pême hũtã” hane.

18 — Na quê ha jũmjê te, ipê Pahpãm kra na amji mã ito mehhimpej na, quê ha nee Inxũ cute cuna mã ihkênton xà atajê to me cumã ihcakôc, ne curê mãme irên nare. Ne por nee amji mã me ito mehhimpej nareatajê ri, ramã curê mã cute me mên na, me ahna me amji ton. Ampo na? Nee cute amji mã me ito ihmimpej nare, na quê ha curê mã me cumẽ.

Pê Jeju me hàhtôa atajê mã mehkên jarên na cumã to prãm nare

19 — Cu ha ampo kên tũmti ata wÿr me pajàhcujro xà nõ, pôc pejti ata to mõi, ne me to ihtũmti ata pupun pyrentu. Jìkjê na ri ipêpjê kam mehcunea jàhcujro xà. Ampo na? He wa itÿj me cumã cute mehkên ton xà atajê jarê, mã me hõmpu, ne cute me hahkre pej xàita caxuw wa me hÿrmã iwÿrc, ne amehcujro to mõi. Mã ma mehkwy apu ite mehcujro ita na mehcaca, ne me cumã amji kam awcapàtkôti ita na pit mãme to prãm. Ampo na? Awcapàtkô ita kam ri hãn ne ihtÿj ame ampo kên ton to me ipa, cwÿrjapê ri ma ame icaca. Ne quê ha, cute meicaca catêjê cute me ampo kên tonatajê jahpan xà na, Pahpãm ame to kêanre ne.

20 — Ýhÿ, por awcapàtkô kam ame ampo kên ton to me ipaatajê mã amji kujro prãm nare. Ampo na? Cute ampo kên ton atajê na me hahkre

pej cupate ri ma ame amji cujrocaca. Cwÿrjapê ri mehkên catêjê ipê ampÿa mã ame ipa.

²¹ Ne por catyt kam Pahpãm jarkwa kôt me ipa atajê ri, ijàhcujro impejti ata kam ihtÿj ame ipa xà. Mår quê mehcunea catyt kam, Pahpãm jarkwa kôt me ipa na me hõmpu, quê nee ame ampo kên ton nare, na ri ihtÿj ame ipa. Na ri hanea ne ihtÿjmempejti catêjê atajê ikôt me ipa — hane.

Jowāw te mehcumrār catê pê Jeju jarkwa to imprar catê

²² Ita jirô pê mã, wa ma Jeju me, me ipê ihkôt me ipa catêjê me, Krîpinkrên pê me icator, ne ma pō pê Juta jō pjê kam ame ipa. Ne curiame cahê na ite jũ mã amji to me amcro ton, wa itÿj harkwa kôt cô kam amehcumrār to me ipa.

²³ Pê hanea ne ihtÿj Jowāw, cô japyrÿ te Enō pê Xarim jō krī na pire mã xa ata kam, cô kam amehcumrār to mō. Ampo na? Ampeaj kam quêt curi cumã cô cati.

²⁴ Ne pê caxuw cormã nee me Jowāw jaxàr nare.

²⁵ Mã amcro nō na Jowāw kôt me ipa catêjê kwÿ atajê me, Juta catêjê jō pahhi kwÿ te ajpên mãn kam mehtêm, Pahpãm mã cute meamji cūmpej xà na cô kam me amji cumrār xà ata ri. Ne nee jūmjê te me ajpên par pej nare.

²⁶ Cwÿrjapê ri ma Jowāw te mehcumrār catê pê me hõ pahhi ata wÿr, meamji to mō, ne cute me cumã amji jarên to:

— Me ijō pahhi, wa ite me amji cūmpej xà ita kam, nee ite me ampo par pej nare, ne me

ikrã pictor tu. Ne por pê ca jŭm xŭmre to me imã awjarẽ ata, ihtÿj mehcŭmpejprãmte, acuxà Cŏpijapjêr jŏ cŏ kam ame cumrãr to mŏ, mã quêt mehcunea ihtÿj hÿrmã me pra! Ne jŭ mã mã cu ha ajte me? — hajÿr.

²⁷ Mã Jowãw te me cumã harkwa to:

— Nee ca ita to ame amji kam gapac nare. Cŏjkwa kam Pahpãm te ahpÿanre na me hŭmremã me hàpên xà jŏr par.

²⁸ He ijàpên xà ita pê Jeju pê hŭmre ata mã ite pry to impejxà, mãr quê pry ata kôt me hàhtôa ne ihwÿr meapkjê. Ne nee ipê, por pê Pahpãm me pamã to awjahkreata nare, ne ite amji jarên xà na ramã ate me ipar. Ne hŏ pry to ite cumã impej xà caxuw pê wa mam icato.

²⁹ Ne quê ha jŏ ri me hàhtôa mã jŭm pyxit peaj neme hirôa pé impej, quê ha hÿarmã me pra. Ita jĭkjêna, quê ha jŭm hikwa tuw, quê ha hĭxi impjên ata wÿr pit mã tẽ, ne nee impjên jŏ ikwÿ nŏ atajêwÿr ihtêm nare cakrô, quê ha ihtÿj hŭ na hŏ ikwÿ nŏ atajê ame hakry. Ita jĭkjê na wa itÿj Jeju jŭ na ijakry.

³⁰ Na quê ha ihtÿj quêt Jeju ipicamên to mŏ, ne cati to mŏ, ne pa nare, wa ha ihkĭnte cama hacpÿa mã icri to mŏ.

³¹ — Ne Jeju quêt cŏjkwa pĭn cator ata riijirôa pê cati. Ne pa nare, pê wa ihkĭnte pjêita kam icato, ne imã pjê kam ampo itajê to pit mã icakôc jahkre pej.

³² Ne taa mã nare, quêt cute cŏjkwa kam ampo par nehŏmpun atajêa to hãn ne ihcakôc to ipa cakrô, mãajmãr nee jŭm te ahna amji caxàr nare.

³³⁻³⁴ Ne menchrêre te cute ampo jarên xà atajê na me kam hapac, ne ihtÿj ampeaj kam cute me Pahpãm catyt kam ihcakôc ata kam me hapac. Ne Pahpãm te ri ihkujahêc na, cute me hahkre pej. He ampeaj kam ri Pahpãm cakôc xàa to Jeju ihcakôc to ipa. Ampo na? Nee mã ampo na nare. Pahpãm Carõ Pejti catia te cumã amji jôr na ri, ne nee kam Pahpãm Carõ Pejti ata crire nare.

³⁵ — Ne Hũm mã ihkra ita kĭan to ihkĭn, mã cute cumãhõ tekjêa na ampo atajê cunea jôr, ne taa mã ri ita caxuw to hõ tekjê, ne ihcunea jamã.

³⁶ Na quê ha jũmjê te amji mã Pahpãm kra te me hũtâr catê na me to amji mã hajÿr na, quê ha quêt Pahpãm cahê na mehtĭr rohnÿttimã na ame ipa. Ne por nee me kam hapac nare, ne nee amji mã me harkwa cupa nare atajê, quê ha nee cõjkwa wÿr me hàpir, ne me Pahpãm pupun nare. Quê ha cama me kam Pahpãm cryc ata me hÿrmã apkjê, ne ame to kêanre ne — hajÿr. Hõhõ, Jowāw te ihkôt me ipa catêjê mã hũjarên to hajÿr.

4

Krĭrĭtpej kam me cahāj nō te amji to ipintuw xà

¹ Jeju te Jowāw jirôa pê mecumrār, ne hirôa pê cumã ihkôt me ipa catêjê jàhtô. Mã Parixêw catêjê te ahna harên par.

² Ne nee pê Jejua ajco me cumrār nare, me ipê ihkôtme ipa catêjê pê wa ajco me cumrã.

³ Mã Jeju te ita na Parixêw catêjê jahkre pej, ne me harên par, ne ma Juta jõpjê pê cator, ne ma

Hĩpôjajo jŏ pjê wÿr ihkôt meipa catêjê me, me mŏ.

⁴ Ne Krĩrĩtpej jŏ pjê cajpuaw pry nŏ ata kôt pê me imŏr xà.

⁵ Ne ma Krĩrĩtpej jŏ pjê kam krĩ japrÿ te Xica ita mã me icator, por pê Jaco xwÿ ihkra pê Joje xwÿ mã pjê jahkre ata cahi na.

⁶⁻⁸ Mã curia cormã Jaco jŏ cŏhkre ata ihcuhê. Mã pyt ramã me pahkrã jimoac kam jÿ, wa curi Jeju me, me icator, mãramã mŏr mã ihpeacre, mã cŏhkre ata cahê na hÿr. Wa ma me ikwÿ me krĩ ata kam ite meampo krêr xà japrŏr to me pra, mã ahte hàhhuc. Mã pyjê nŏ pê Krĩrĩtpej jŏ pjê catêjê nŏ ata, cute cŏ jaxàr prãnte hÿrmã tẽ, mã Jeju cumã:

— Ate amji kam gapac xàa na, imã cŏ ita kwÿ incire ne, wa to ikŏ — hane. Mã jŭm cahãj ata Jeju mã:

⁹ — Apê Juta catêjê nŏ, ne ipê Krĩrĩtpej jŏ pjê catêjê nŏ, ne mêr ampo na mã ca apu cŏ ita na iwÿ? — hane. Ne ampo na pê cumã ihcakŏc xà ita to? Nee mã ampo na nare, pê ajco Krĩrĩtpej jŏ pjê catêjê me, Juta catêjê me ajpên kaj na me amji kampa, na pê cumã hane.

¹⁰ Mã Jeju cumã:

— Ca ate cŏjkwa kam Pahpãm te amã ampo jŏr xà ata nahakre pej na mã, ca ha ahna iwÿ. Ca ate ite cŏ na awÿr xà ata na ijahkre pej na mã, ca ha mehtĩr xà rohnÿtti mã xà jŏ cŏna iwÿ, por ca ha cŏ to ikŏ ne atĩr rohnÿtti mã na apa xà ata na iwÿ — hane.

¹¹ Mã pyjê nŏ ata cumã:

— Amã cô jacjên xà hamreare, ne côhkre ita rya to iry. Ne měr jũ mã ca ha, ne mehtĩr rohnýtti mã xà itajõ cô ita kwỳ py, ne imã ihkwỳ?

¹² Xà ajkĩ gõ cô ita me panquêt xwỳ pê Jaco jõ cô jirôa pê impej? He pê me panquêtiti Jaco me imã côhkre ita jahkwỳ, nemehkra me, cute me ampo to ipijapar xà mã hahkre, mã ihtỳj me to ikõ. Ne xà ajkĩ Jaco xwỳ jirôa pê acati, mã ca ha ajte imã cõimpejti nõ ita gõ? — hane.

¹³ Mã Jeju cumã harkwa to:

— Quê ha jũm, pom cô ita kwỳ to ikõ, ne hacpỹ ma mãcumã kôr.

¹⁴ Ne por wa ha jũm mã cô kwỳ, quê ha to ikõ ata, quê ha quêt nee hipêr cumã kôr nare. Ampo na? Quê ha jũm kam cô ata ipijapjêr rohnýtti mã xà ata pê ihtĩar na ipa xà ata, na quê hanee jũ caxuw ihtyc nare — hane.

¹⁵ Mã cahãj ita cumã:

— Měr imã cô ita kwỳ, mār wa imã kôr nare ne, nāmri wa nee hipêr hacpỹ ne cô ita jaxàr to imõr prāmnare — hane. Mã Jeju cumã:

¹⁶ — Mõ ne apjên japrô, ne hacpỹ ne to amji jaxàmã — hane. Mã cahãj ata Jeju mã:

¹⁷ — Ipê ipjê nare — hane. Mã ramã Jeju te hahkre peaj xà na cumã harkwa to:

— Ampeaj kam ca apjê nare na ate imã amji jarên.

¹⁸ Ne pom ramã ate apjê to xĩc, ne cumã hikran ita. Ne pom cute ihkwỳ to xêj ca apu cume apa ita te hajỹar, ne nee cupê apjên nare. Wa nee ato ahêj xi nare — hajỹr.

¹⁹ Mã cahãj ita Jeju mã:

— Ampeaj kam ca ate ijarëan to ijarën. Ne ita caxuw wa ite apêPahpãm jarkwa to acakôc catê na gahkre pej.

²⁰ Ne caxi imã awjarë. Jõ ri mõrmõ cu ha ajte ame Pahpãm to ameamji kam pajapac to me papa? Wa meipê Krĩrĩtpej jõ pjê catêjêPahpãm to amji kam me ijapac, ne catihti to me cumã icakôc prãmte, mahàhkà jakôtti ita wÿr ijõtpê me pra. Ca ajte me apêJuta catêjê Krĩpinkrên kam ajte, me pahtePahpãm to amji kam pajapac xà na me harë. Ne amãa, jũ ri mõrmõ Pahpãm to pahte amji kam me pajapac xà? — hane. Mã Jeju cahãj ita mã:

²¹⁻²² — Ikam gapac to impeaj ne he. Ca me apê Krĩrĩtpej jõ pjê catêjê atePahpãm to amji kam me gapac xà atajê na, me amjijahkre pej nare kam me to amji kam gapac to me apa. Ne me pa nare, wa itÿj quêt ite me Pahpãm to amji kam me ijapac xà ita na, me imã amji jahkre pej. Ampo na? Nee mã ampo na nare. He pê me apÿtâr catê ita, me ipê Juta catêjê pĩn meawÿr cato. Na cu ha nee jũ caxuw hipêr hàhkà jakôtti ata me, Krĩpinkrên kam, ame Pahpãm kĩnti na jũm te cumã me amji jarën xà hamreare.

²³ Ne hamre, ramã pahte Pahpãm to amji kam me pajapac xà cunea pintuw. Naquê ha ita caxuw jũm ampeaj kam Pahpãm to amji kam hapac na, quê ha Pahpãm amji caxuw cumã cute to amji kam hapac xà to hahkre, mãr quê ha harkwa kôt to amji kampa. Hõhõ, cute mehajÿr catêjê ri Pahpãm amji mã me hapê, cute me to amji kam hapac xà caxuw.

²⁴ Inxũ pê Pahpãm ata nee hĩa na ipa nare,

ne quêt cupê Carō Pejti ata, ne pjê cunea kam ipa. Na quê ha hanea ne cute me to amji kam hapaccatêjê me carō caxwÿn cunea to me to amji kampa, pjê cunea kam — hane. Mā cahāj ata te cumã harkwa to:

²⁵ — He imã, por jÿm pê me pahpytâr catê japyrÿ te Crixto ata to Pahpãm te hÿjahkre atacator xà na imã hahkre pej. Ne quê ha cato, ne mepamã ampo cunea to hahkre partu ne — hajÿr. Mā Jeju tecumã amji jarên to:

²⁶ — He ipê jÿm ata, ne ipê Crixto, ne pa wa amãicakôc — hajÿr.

Pê Jeju kôt me ipa catêjê amji mã me ajkra

²⁷ Wa caxuaw ramã curi me ipê ihkôt me ipa catêjê cator, ne ite amji mã ame ipikrar kryjre nare. Ampo na? Ite me Jeju te Krîrîtpej jô pyjê nõ mã apu ihcakôc na me hõmpun, na wa ite amji mã me ipikrar. Ne nee ajte me inõ te ampo ata na cahāj ata cukij to:

— Ampo na mã ca prãm? — hajÿr nare. Ne nee me inõ teJeju cukij to:

— Ampo na mã ca apu jÿm cahāj ita mã acakôc? — hajÿrnare, ite me hahkre pej xà na.

²⁸ Mã ma cahāj ata te hõ pot rer, ne krî kam mehkrîatajê wÿr tẽ, ne cator ne cute me cumã hÿjarên to:

²⁹ — Ajpên me mō ne me hÿmre nõ ita pupu, cute ite ampo ton xà atajê cunea na ijarên partu. Ne mōrmō ajkî cupê, por pêPahpãm Crixto to awjahkre ata? — hajÿr.

Jeju mã Pahpãm mã hàpên xà ata pê hõ

³⁰ Mā ma me hàhtôa ne krĩ pĩn, por curi Jeju apu mō ata ri, ihwỳr me mō. Ne cormã ajpên me iwỳr me mōr kwỳa kam, wa ite me Jeju mã:

³¹ — Me ijō Pahhi, ampo krē! — hajỳr. Mā Jeju te me imã harkwa to:

³² — Imã ijō, wa cuku, ca nee ite ihkur xà na me ijahkre pej nare — hajỳr.

³³ Wa ite mempar, na wa ahna ite me ajpên cukij to:

— Xà ramã ajkĩ jũm te cumã hō nō rer? — hajỳr.

³⁴ Mā Jeju te me ipar ne me imã:

— Por Inxũ te ikujahêc ata te amji mã ampo kĩnti ata to wa cumãn to mō, ne ata pê ri ihhêj rũm ijō, wa to amji mã ijarte, mã itỳj. Ne wa ha itỳj cute imã ijapên xà jōrata to cumã ihkrã cura, cupêa ri ihhêj rũm ijō.

³⁵ — Ca ramã ate me harên to hajỳr to me amji pyrác tuhe: “Cormã pahte me pajō kēhkên xà wỳr putwry tecwat ne nō” hane. Ne mēr me hàhtôti itajê pupu he. He me cupê ijō purpyràac. Ne ihhêj rũm me cupê ramã ampo hy inteptu, ne ramã ihkēhkên xàa kam hàhhuc atajê to ri pahte amji mã me cuprôn xà.

³⁶ Quê ha jũm te, jũm mã pur to hàpên na, quê haihtỳj amji mã ampo cwa. Ita jĩkjê na, quê ha jũm teimã me to cuprôn to ipa na, quê ha ihtỳj, cumã cute me to cuprôn to ipa jahpan xà na, hàmcwỳr xà. Na quê hame hàhtôa ne mehțir ita na ameipa, Pahpãm cahê na. Ne quê ha imã me hàpêncatêjê hākrya to me hākry to hanea, pom quê cute meampo hy kre catêjê me, cute mehķēhkên catêjê he, ne ajwar me hākry.

³⁷ Ampo na? He hũjarĕn xà ita nee ihhêj xi jarĕn nare, ne ampeaj kam ri awjarĕ: “Quê ha mam jũmjê te hàhkre na, quê ha ihtyj ihkôt cormã ihkêhkĕncatêjê ihkêhkê” hane.

³⁸ Wa ite ramã me ate iwÿr me to apipkjêr na me amĕn. Ne pê mam rÿ pĕa mã, Pahpãm jarkwa to mehcakôccatêjê pê me hàhkre catêjê atajê pyrãac, ne ramã me cumã Pahpãm jarkwa jarĕ. Na ca ha mehkôt cama iwÿrme to apipkjêr to me apa — hajÿr.

Pê Krĩrĩtpej jŏ pjê catêjê cute amji kam me hapac xà to me antuw

³⁹ Mã Krĩrĩtpej jŏ pjê catêjê kam me hàhtôa ne, ampeaj kam cute Jeju to amji mã mehajÿr tÿj pyrentu. Ampo na? Por cahãj te harĕn to: “Cute imã ite ampo cunea ton atajê to ihcakôc partu” hajÿr, na ri mehcunea te amji mã me to hajÿr pyrentu.

⁴⁰ Mã Krĩrĩtpej jŏ pjê catêjê kwÿ cator, ne cute me Jeju wÿr, quê me cahê na amji to jũ mã amcro to. Wa curia me cahê na me ijãhhuc, ne ite me amji to amcro to meipijakrut.

⁴¹ Mã hũjarĕn xà atajê kôt, me hàhtôa ne cute Jeju mã me amji jŏr, ne mempar pyrentu.

⁴² Ne cute me cahãj ata mã harkwa to:

— Wa itÿj ita caxuw me kampa. Ampo na? Wa ramã ite me hĩa kam ijapac, ne nee mã ate me imã harĕn xà ita kôtpit mã, ite mempar nare. He ampeaj kam ri me imãa Jeju pê me pahkĕn catia pê me pahto hapôj catê, pjê cunea kam — hajÿr.

Pê Jeju cama ihcakôc xàa to pahhi kra caprã

⁴³ Ne wa ite amji to me amcro to ipijakrut jirô pê mã, wa ma iteJeju me, Hîpôjajo jŏ pjê wÿr me iprar kam me itêm.

⁴⁴ Ne pê Jeju a jco me imã amji jarên to:

— Ipê Pahpãm jarkwa to mehcakôc catêjê nŏ. Ne ipême ikwÿ pyràac, mã ijŏ krî kaj na ihtÿj me ikampa. Neijŏ pjêa kam, nee amji mã me icupa, ne nee ikam me hapac prãm nare — hane.

⁴⁵ Wa curi me icator, ne curia me cahê na me ijàhhuc. Mã curi mehkrî catêjê te meito kênre nare. Ampona? Pê ramã Krîpinkrên kam Hîpôjajo catêjê mamme Hakren xà jŏ amji kîn ata na me Jeju te ampo pejtatajê ton na me hŏmpu na pê.

⁴⁶ Jirô pê mã wa ma Têtêc jŏ krî wÿr Jeju me, me pra, por pê curi cô to ampo cacô xÿre na ata ri. Mã curi pahhi mã hàpên catê nŏ catia, Capernam jŏ krî kam ihkrî ata pê ihkra xà, hÿrkwa kam.

⁴⁷ Ne cute Jeju te Juta jŏ pjê pîn mŏr naharên par, ne ma Jeju wÿr Têtêc jŏ krî wÿr tẽ, cute ahna hàhwÿr mã ihkôtCapernam jŏ krî wÿr mŏr. Ne cute cumã ramã ihkra ihtyc xàa kam ata caprãr prãmte.

⁴⁸ Mã Jeju te pahhi mã hàpên catê ata mã:

— Xà wa icarôt to ampo pihho catia to, ca ahna me ipupune cormã ihkôt me ikampa? — hajÿr.

⁴⁹ Mã Jeju mã:

— Ijŏ Pahhiti, ikra tyc xwÿjrea na, ajpên gÿjarêan kam atêm pyrentu! — hane.

⁵⁰ Mã Jeju cumã:

— Gapacta ne ikre wÿr amji jaxà! Hamre, ramã akracaprãr, ne quê ha ihtÿj amã impej,

nee quê ha ihtyc nare — hane. Mã cute Jeju par pyrentu, ne ma tẽ.

⁵¹ Mã ikre wÿr pry cahtiri cumã me hâpên catêjê kwÿ te mehcajpar, ne me cumã ihkra jarên to:

— Hamre, hacpÿa mã akra impej — hane.

⁵² Mã cute pyt jÿr xà jũ kam ri ihkra te amji cajpêr na, mehckij. Mã me cumã harên to:

— Ihnõ kam ri, ramã pyt te ihcahpa crire kam ri, akra mã kry jamre — hane.

⁵³ Mã pyt jÿr xà ata kam hũm te, Jeju te cumã harkwato:

— Quê ha ihtÿj akra amã impej — hajÿr na to amji japackre pyrentu. Cwÿrjapê ri curi ikre kam cahê na mehkrĩ atajê cunea te ihtÿj Jeju to amji mã me hajÿr pyrentu.

⁵⁴ Pê Jeju ramã carôt to ampo pihho catia ton to ajkrut, Hĩpôjajo jŏ pjê pĩn mŏr xà ata kam.

5

Pê Jeju cô cahê na cukrã xà peacre hikwa ata caprã

¹ Ne ita jirô pê mã ri Juta catêjê te amji mã me amji kĩn nõ ata ton, wa ma me hÿrmã Jeju me, me ikwÿ me, Krĩpinkrên wÿr me mŏ.

² Ne krĩ ata pê kên to mehccunea intête kwÿc, nemencjêj xà na hŏtpê me harkwa jàhtŏa ne me to. Atajênõ na pê carà cahàcre hŏhti jamãr catêjê ajco hapôj ne me to acjêj. Cwÿrjapê ri cute me cumã haprÿ to CaràcahàcreHŏhti Jŏ Harkwa. Ne cahi na kên te kwÿc kamcô ata ri me ijarkwa na haprÿ te Krĩjàhcaprĩ. Mã ipu na hàhpykrã xà na kên po te ikre po atajê texĩc ne ihcuhhê.

3-4 Mā me hà cunea cô ata pu na me nŏ, ne mePahpām mā imprar catê te cŏjkwa pīn iwryc, ne cô atato ipicwryc na me hikaj. Pê ajco hân ne hŏtpê jŭa mā ahna amcro pê ajco irôrôc, ne cô ata to acwryc. Ne pê ampo na me hikaj nare. Quê ha cô ata acwryc, quê ha me hà atajê nŏ mam cumã mrŏ, ne impej pyrentu. Na pê ipu na mento tŭm me, cute me xwý me, me cukrã xàpec me, me nŏ.

5 Mā curia me cahê na jŭm xŭmre xà na, ramã ahna caku te trīnta ne ihkôt ôjtô ata nŏ.

6 Mā Jeju curi cator ne cute ramã hà ita na ahna caku jàhtôa nahŏmpun, ne hahkre pej. Ne cute ihcukij to:

— Xà amã amji caprãr na amji to prãm? — hajÿr.

7 Mā cute Jeju par ne cumã:

— Hewhÿ, jŭm te cô ita kam ito mrŏr xà caxuw hamreare. Cwÿrjapê ri hân ne acwryc, wa tee hÿrmã icuhkwÿr, mãma mam me ikwÿ kwÿ me ire ne kam me mrŏ. Ne quêt mempej ne ma me pra, wa ita ri mehkĩntê ijikwa xà ita kam ijikwa — hajÿr.

8 Mā Jeju cumã:

— Hã to xa, ne anŏr xà ata py ne to amŏrpyrentu — hane.

9 Me ajkaam mā hŭmre ata pej ne hãm, ne cute nŏr xàata pyr ne ma to ihtēm pyrentu. Ne mehkôt xà jŏ amcropê xap na, pê ita hane.

10 Mā Juta catêjê jŏ pahhi catêjê kwÿ te jŭm ata te nŏr xà pyr ne to ihtēm na me hŏmpun, ne me cumã harkwa to:

— Pÿhàpà, he ita kam me pahkôt xà jŏ amcro pê xap, nŏ na mã ca ajte ate anŏr xà ita pyr ne to tē? He ate amji kam gapac xà ita nee me pahte amji kam me pajapac xàcajuaw nare, ne ihkaj na! — hajÿr.

¹¹ Mã cute mempar ne me cumã:

— Por hŭmre te icaprãr ata te imã harkwa to: “Anŏr xàpy ne to amŏr pyrentu” hajÿr. Wa harkwa kôt tē — hajÿr.

¹² Mã cute mempar ne mehcukij to:

— Jŭm te mã anŏr xà ita pyr ne to atēm na amēn, mã ca apu to tē? — hajÿr.

¹³ Mã me cumã:

— Pÿhàpà, nee cute icaprãr catê ata te imã amjijapry jarēn nare, ne ite hŏmpun pej nare kam, ma me hàhtô mã hàr — hajÿr.

¹⁴ Mã ramã ahna ahtŭm ryre mã Jeju te Pahpãm to me amji kam hapac xà jŭrkwa kam ihcajpar ne cumã:

— Ramã acaprãr ne apez ita na amji pupun peaj ne he. Nehipêr mŏ ne amji caxuw ampo kên nŏ ton nare. Nãmri caha ate ihnŏ ton na, quê ha mam ata jirôa pê acaxuwihkêanre ne — hajÿr, ne ma tē.

¹⁵ Mã hŭmre ata xwÿjê cator ne ma tē, ne cute mecupê Juta catêjê jŏ pahhi kwÿ mã amji jarēn to:

— Xãmte nee jŭm te icaprãr nare, Jeju te ri icaprãr — hajÿr.

Pê Jeju cupê Pahpãm na amji jarē

¹⁶ Ne cute me Jeju te mehkôt xà jŏ amcro na, cuthàhcaprãr na me harēn par ne me ajpēn mã:

— Cute me pahkôt xà jō amcro kam hàhcaprãr, ne apu to kên, cwÿrjapê cu ha hanea ne ame to kêanrene — hajÿr. Ne ma Jeju wÿr me pra, ne cute me cumãn kammehtêm.

¹⁷ Mã Jeju me cumã:

— Me ikampa, rÿ jũ caxuw cōjkwa kam Inxũ Cati te ihkôt xà caxuw hàpên xà impejti atajê to hàpên jicu nare. Na wa ha hanea ne cuxà hàpên xà ita to ijâpên to ipa kam to icrà tu — hane.

¹⁸ Pê me cupê pahhi catêjê kwÿ harkwa ita na me kampa ne ame kam incryac to ame kam incryc, na pê me cumã ihcuran prãam to ihcuran prãm. Ampo na? Nee mã ampo na nare, pê mehkôt xà jō amcro kam hà atacaprã, ne cormã hipy cupê Pahpãm kraa to ihkra na me cumã amji jarê, ne Hũm me ipipêan na amji jarê. Na pê ihtÿj cupê Pahpãm kra na cute amji jarên to apu ihhêj na amehcãmjĩ, cwÿrjapê pê kam amencryac to amencryc.

Pahpãm kra himpej xà

¹⁹ Mã Jeju cormã me cumã:

— Ikam me gapac to impeaj ne he. Ipê Pahpãm kra, na wa hanee amjia kôt ampo itajê nõ ton nare. Ne por Inxũ ampoto, wa ahna hõmpu atajêa to wa ijâpên to ipa. Ne por Inxũ ampo cunea to atajê, wa itÿj hanea ne to.

²⁰ Ampo na? Inxũ mã ikĩnti, na ri ihtÿj imã cute ampocunea ton xà itajê to ipipê to ipa, wa hõmpu. Ne quê ha cormã imã cute ampo ton xà itajê jirôa pê cute ton xà atajê to ajpê, wa ha to, ca ha ahna me ipupu. Ne atÿj hõmpun xà ata to me amji mã ajkra.

²¹ Ne pom Inxū hacpÿa mã mehtyc to ihtĩr, ita na wa haipê hũràac ne ite amji mã jũm tyc to ihtĩrprãm ata to, itÿj hacpÿ mã ihtĩr.

²² Ne nee Inxū Cati pê mehkên me, mempej to ipicokjêr catê nare. Ampo na? He ite ita to ijâpên xàa caxuw ri cute imãhõr. Ne pa wa ha cute mempejti ton atajê jahpan xà na, mecumã ijâmjõr xà impejti atajê to amgõ. Ne cute mehkênton atajê jahpan xà na, wa ha me cumã ijâmjõr xakêanre atajê to amgõ, ne cama mehkên mã ame curê.

²³ Quê ha icati na me ipupu, ne amji mã me icupa to hanea, pom quê amji mã me Inxū cupa he. Ne por jũm amji mã ipê Pahpãm kra na icupa nare ata ri, hanea ne nee amji mã, por Inxū te ikujahêc ata cupa nare.

²⁴ — He ampeaj kam wa ha me amã awjarê. Por quê ha jũmicakôc xà itajê cunea to amji mã ihhimpej ne kampa, neInxū te ajpên ikujahêc na amji mã ito ihhimpej ata, quê ha ihtÿj ihtĩr rohnÿtti mã. Ampo na? He wa nee ite jũm ata kên mã mên nare, ne cama quêt to ihtyc xà jahpan, na quê haihtĩr rohnÿtti mã na ipa, Inxū cahê na.

²⁵ He ampeaj kam wa ha me amã awjarê. Quê ha ita caxuw, por cormã mehtĩar na ame ipa, mãramã Inxū mã mehtyc itajê, jũ caxuw ipêihkra na me ijõkre kampa, ne hacpÿ mã ihcunea na amehtĩr pyrentu.

²⁶ Ne pom Inxū pê mehcunea mã, cute me amji kam hapac xà jõr catê xakatata te ri imã hõr. Na wa itÿj hacpÿmã mehtyc to ihtĩr.

²⁷ Ne ampeaj kam ri ipê Pahpãm kra, ne hanea

ne ipê me Ahàkà, cwÿrjapê ri hajÿar neInxũ Cati te ito mempej me, mehkên catêjê cukij ne me to ipicokjêr catê.

²⁸ — Ne nee ca ite icakôc xà to icakôc itajê impar xà to ame amji mã me apikrar nare. Ampo na? He ramã amehtyc catêjê te meijökre par, ne hacpÿa mã amehtÿr ne kre pê me hapôjxàa kam ri ramã hàhhuc to mō.

²⁹ Ne por mempejti ton to me ipa atajê, quê ha mehtyc xà jirô pê hacpÿamã mehtÿr, ne Pahpãm cahê na amji to me ipijaparrohnytti mã. Ne por mehkÿnte mehkêanre ton to me ipaatajê, quê ha mehtÿr, ne cama mehkên mãme axà, ne ampÿa mã, Pahpãm pê amji to me acto.

³⁰ — Ne pa wa nee amjia kôt jũm kên mã mën nare, ne Inxũ te catyt kam amji jahkre pejti te me hahkre pej xà ata kôt, wa ha me to ajcokjê. Na wa nee apu ampo itajê to ihcupan nare. Ampo na? He wa nee ite amji kam ijapac xàa na jũm kên mã mën nare. Ne por Inxũ te ikujahêc ata te amji kam hapac xàa kôt wa hãn nemehkên catêjê kên mã me curê, ne mempejti catêjêatajê impej mã me curê.

Pê Jeju hàpên xà ton atajê, ihtÿj cupê Pahpãm na harê

³¹ — Ne wa ha pa ipyxit peaj ne me amã amji kôt harê na mã, quê ha ite amji jarên xà itajê kôt hamreare ne.

³² Ne nee mã ipyxit peaj nare, ne ihtÿj icaxuw jũm ata, ne cupê ijōInxũ. Ne por ito ampo na awjarê atajê, ampeaj kam ri, neemã Inxũ apu ihhêj xi jarên nare na, ramã imã hahkre pej.

Inxū teijarēn xà ata ampeaj kam ri, ne nee ihkôt hamre xà nare.

³³ — Ne ate me ina gâhcukjêr ne me ijarēn par prāmte, Jowāw te me cumrār catê wÿr me jūmjêkujahêc, mǎ cute me cumǎ ito hūjarēn paratajê ri nee ihhêj xi xà nare, ne ampeaj kam ri.

³⁴ Ne nee imǎ pjê ita kam, cute me cumǎ me ito hūjarēn xà ita na prām nare, ne quêt Inxū te ito hūjarēn xà atajê ri imǎ impej, ne nee ihkôt hamre nare. Ne mēr ampo na ri Jowāw te mecumrār catê te me amǎ ijarēn to hajÿr? He ca ihhêaj toijarēn par xà atajê kôt me ikampa, ne ate amji mǎ meito ahimpej na, ca ha nee me akên mǎ me axàr nare, neatÿj me atyc xà jahpa.

³⁵ — Ne pom ihpôc xà hǎn ne amji na ampo jarare jàhtôa ne to cuprô, ita jĭkjê na ri Jowāw te me cumrār catê ata amji na me ato cuprô. Ne cupê ihpôc xà pyrâac ne me amǎ ahcujro, ca atÿjahna ate me cuprôn to amcro to incrêre xà, mǎr quê me amǎ ampo to hahkre. Ca hūrên amegakry cakrô, ca ajte nee ate me hūjarēn xà atajê cunea na me kam gapac nare.

³⁶ Ne ampeaj kam pê Jowāw hirǎa pê me amǎ ijarê. Mǎ cormǎ Inxū Cati te ijâpên xà catia ita na imên, wa to ijâpên to ipa, atajê ri Jowāw jirôa pê, hirǎa pê ijarê, ne hanea ne ihtÿj ajpên Inxūte ikujahêc na ijarê.

³⁷ Ne hanea ne Inxū te ikujahêc ata, ihtÿj ito me amǎawjarê cakrô, ca rÿ jū caxuw ate me hōkre par ne mehōmpun nare.

³⁸ Ca nee ajte icakôc xà itajê na me ipar, ne amji mǎme ito ahimpej nare. Ne ca rÿ jū caxuw

ate me Inxū teajpên ikujahêc ata jökre me, cute me amã harkwa jirên atajê nõ impar nare.

³⁹ Ne cormã ihnõ xwỳjê, he ca atỳj me Inxū pêPahpãm jarkwa na ihkàhhôc to hahkre to me apa. Neate me to hahkre xà atajê kôt atỳj nee jũ caxuw ate ame atyc nare na, ame amji cãmjĩ. Ne por ihkàhhôc ata ihtỳj ito awjarê.

⁴⁰ Cakrô ca ma ajte ite me amãme atĩr rohnỳtti mã xà ata jôr xà wỳr ame gitôt.

⁴¹ — Ne imã Inxū te ito ihcakôc to impejti naa pit mã to prãm. Cwỳrjapê ri imã pjê kam me hũmre te ikôt me harên to impejti na me to prãm nare.

⁴² Ne wa ite ramã me akrãhky na me amã Pahpãm kĩn name gahkre pej, ne nee me amã caxwãm catia mã Pahpãm kĩn nare.

⁴³ Ne wa Inxū te amji kam hapac xàa na ajpên me awỳricator cakrô, ca ajte ma ame icaca. Ne quê ha pjê ita kam, ita ri, ajte jũm xũmre amjia kôt cute amji kam hapac xàa na me awỳr cato, ca ha atỳj ahna me amji capa, ne ihkôat me amji to.

⁴⁴ Ne ate pjê kam me hũmre te me apejti na me garênna ri, me amã impar prãm. Ne Pahpãm te me apejti na megarên na ri, nee amji to me amã gàhcukjêr to prãm nare, ita kam jũ mã ca ha ne ito amji mã me ahimpej? Wỳr ca ha amji mã hamã ne me to.

⁴⁵ — He xà pa wa ha ajkĩ Inxū cuna mã me garên to kêanre ne? Hãpà. Ne pom ca me Mojxe xwỳ te me hapackre xà to me amji kampa, ne cute me atehcajpar xà na amji mã me to hane ita, quê haPahpãm mã me apê mehkên ton catêjê na

me amã hacjê.

⁴⁶ Nãmri ca ha me ate caxwãm catia mã amji mã me Mojxe kam gapac na, ca ha atỳj hanea ne ito amji mã hane. Ampo na? Taa mã pê ina ihhóc.

⁴⁷ Ca nee ramã Mojxe to amji mã me ahimpej nare ita kam, jũ wỳr ca ha ito amji mã me ahimpej — hajỳr. Hõ, Jeju te Juta catêjê jõ pahhi kwỳ mã harkwa to hajỳr.

6

Pê Jeju hõ incire to me hàhtôa mã harte

¹ Ita jirô pê mã, wa ma Jeju me, me ikwỳ me, Hĩpôjajo jõ cô na me irêr, ata japrỳ nõ te Tiperij jõ cô.

² Mã me ikôt me hàhtôa ne me mõi. Ampo na? Cute meJeju te me hà caprâr, ne me to impej pyrentu na me hõmpunna ri.

³ Wa hàhkà jakôt nõ na Jeju me, me ipê ihkôt me ipacatêjê me, me ijàpir ne me ijỳr.

⁴ Pê caxuw ramã me Hakren xà jõ amji kĩn me Pãwtỳjre jõ amji kĩn na ahtipre.

⁵ Mã Jeju te amji wỳr, por ihkôt me hàhtôa ne me mõi atajê pupun, ne cute Pirip mã harkwa to:

— Jõ ri cu ha ajte me hàhtôti itajê mã me hõ nõ mãme pahcato, ne me hũhkà? — hajỳr.

⁶ Ne pê ramã cute me cumã pãw kryj ata kam to hàhtô to amji kampa, ne cama cute Pirip cajpêar prãmte pê cumã hane.

⁷ Mã Pirip cumã:

— Ahpỳanre na me pyxit te me pãw kryjre ne mencwỳr xàcaxuw, cu ha me putwrỳ te ôjtô

jàpên xà jŏ pore jirôa pê ahna me cumê cakrô,
quê ha nee me cahuc nare — hane.

8-9 Mă Antre pê Petrô tŏ te cumă harkwa to:

— Ihnăm hă ahkrare xŭmre nŏ ita mă păw kryjre texîc, ne caxuw cumă tep pijakrut ne hâr hiahpuro mă to jŷ he, ne jŷ wŷrquê me hàhtôti itajê catwŷ! — hajŷr.

10 Mă Jeju te me imă harkwa to:

— Me cumă, quê mehcunea pjê kam me to jŷ — hajŷr. Nepê ampeaj kam pjê ata kam pŏre. Mă mehcunea jŷr, pjê kam, ne por me hŭmre me hŷr atajê pê me hàhtô na me xîc mir, me hŭmre pît.

11 Mă Jeju te păw kryjre atajê incwŷr nehŭrên hakryti na Hŭm pê Pahpăm mă to amji jarên. Ne cute ihcokjêr neme imă hŏr, wa ite me cumă hŏr par, mă cute tep pijakrut atajê to hajŷr.

12 Mă ajte me hŏ păw kryjre itajê to mehcunea jarte partu. Ne cute me hàpàn tohhijrô pê mă ri, Jeju te me imă harkwa to:

— Cute ame cahhur tohhi itajê to kàhà kam me cuprŏ, quê neehnŏ ipictor nare — hajŷr.

13 Wa ite me to cuprŏn, ne me to kàhà to tôxi ne me to hipu par, por păw kryjre te xîc atajê cahhur to.

14 Mă cute Jeju te ampo pejti ton xà ita na mehŏmpun, ne amji mă me harên to:

— He ampeaj kam ri hŭmre ita pê me pamă Pahpăm jarkwa to ihcakôc catê, por pê Pahpăm me pamă cator xà na to awjahkre ata mă he — hajŷr.

¹⁵ Mā Jeju te, cute me hàprêa kam amji mā me to hōpahhi na me hahkre pej, ne ma ahte tē, ne kēnti kàa nō na hàpir.

Pê Jeju cô incwÿrpê mō

¹⁶ Mā ramā me ina caxwa, wa curia ite me Jeju rer, ne ma me iwÿrc, hīpô tohkà wÿr.

¹⁷ Ne pàr kre mā meicjêj, ne ma Capernam jō krī wÿr ite me to irêr na me amji to hajÿr. Ne ramā ihcaypuaw pàr kre to me mō, mā ramā awcapàtkô, mā nee cormā me iwÿr Jeju cator nare.

¹⁸ Mā kôc pahtÿjti ata te hàpêrkam ihtēm, ne cô to harô to pra.

¹⁹ Wa ramā ite me imōr jūwry to me rec pyxit, cô kam, ne ma me to cakrÿn to mō. Ne me ite amji wÿr ajpên cô jipy Jeju te mōr na me hōmpun, ne ampeaj kam me imā hūpa.

²⁰ Mā pea me ina hàhtêp, ne cute me imā harkwa to:

— Ame icupa nare, pa wa mō, nee mā ipê me carōnare — hajÿr.

²¹ Wa ite me hahkre pej, ne hacpÿa mā hūrên ame ijakry, ne itÿj ite ahname amji caxàr. Mā me iwÿr hàr, ne jū mā cute pàr kre ton, mā cyt ne me imōr xà ata wÿr me ito icator.

Pê me hàhtôti atajê ame Jeju japê

²² Ne pê Jeju curi me cumā harte xà ata ri, wa ahte ite pàr kre pyxit peaj mā me icjêj na cute me ipupuan na, curia cormā me ahtwÿ, ne me Jeju jikaj. Ne nee pê ramā me iwÿr Jeju cator na me hahkre pej nare.

²³ Mā ma me ijakàn pê Tiperij jō krī jō pàr kre kwỳ cator, por curi Jeju te Hũm mā pāw pyrên hakryti jarên, ne me cumã kryj, mā cute ame to harte tu ata ri.

²⁴ Ne cute me ijapên, ne curia ame Jeju jikaj atajê kwỳ te pàr kre kwỳ mā mencjên, ne ma me ikôt Capernam jōkrī wýr me to cator, cute me Jeju japên prãmte.

Jeju pê me pahto ihtir rohnýtti mã catê

²⁵ Ne curia ri me hàhtôti atajê te me Jeju mãcator ne me cumã:

— Hàpà me Ikrã tũm! Jũ caxuw mã ca ita ri acator? Wa ihcapryna curi ame gikaj, ca ate jũ mã ajte ne ramã ita riacator? — hajýr. Mā Jeju me cumã:

²⁶ — Ampeaj kam wa ha me garê! Ca ate ijapên xà catia na me ipupun, ne Pahpãmkra na ate amji mã me ito hajýr to, ca ikôt me acator nare. Ne ame garte prãm ita to pit mã, ca ikôt me acator.

²⁷ He ame hajýr nare! Nee ca pjê ita kam, ate amji to me apijapar prãmte, me gápàn to pit mã ameamji kam gapac nare. Ne quêt Pahpãm cahê na ate amji to me apijapar rohnýtti mã xà ata to, ca ha me amji kampa. Ampo na? He ate meto amji kam me gapac ata pê ihhêj rũm me gō te me ato meatir rohnýtti mã xà. He ipê me Ahàkà, na wa ite me axũmrea na amji ton, ne me amã Inxũ Cati to hahkre, ca ate cahê na amji to me apijapar rohnýtti mã xà caxuw. Mā ihtýj Inxũ pê Pahpãm te, ite to ijapên xà caxuw imã carôt jōr. Ampo na? He cumã ipej na ri — hajýr.

²⁸ Mā cute ita na mehcukij to:

— Ampo ton na ri Pahpām mā me ito prām, wa me cumā to? — hajÿr.

²⁹ Mā Jeju te me cumā harkwa to:

— Ate ito amji mā me ahimpej na ri, Pahpām mā me ato prām, cwÿrjapê ri cute me awÿr ikujahêc — hajÿr.

³⁰ Mā me cumā:

— Ca ha hipêr acarôat to ampo pihho pejti to! Wa ha ahna me apupu, ne itÿjamji mā me ato ihmpej!

³¹ He pê me panquêtjê pō kam me hamreare ata kam ajcome hō pê mana ata pit kur to me ipa, ata pê Pahpām jō kàhhôc kam harên to: “Cute cōjkwa pīn me cumā me hōjōr, mā cute mehkrêr” hajÿr. Na ca ha pijamā ajkī cuxà me imā to? Wa ha me hōmpu, ne me cukrê, ne itÿj amji mā me ato ihmpej — hane.

³²⁻³³ Mā Jeju me cumā:

— Ÿhÿ, ampeaj kam wa ha me amā cōjkwa jō ata kôt harê. Pêrÿ pêa mā Mojxe xwÿ jō caku kam, cute pjê kam amji tome ipijapar xà caxuw pit mā, pê Pahpām me cumā me hōjaprÿ te mana ata gō. Ne nee mā pê Mojxe me cumā hō ata jōr nare, Pahpām pê me cumā cugō. Ne pom curmā cōjkwa pīn Pahpāmjō intuwti cator ita pê ri cōjkwa kam Pahpām cahê na ate amji to meapijapar rohnÿtti mā xà caxuw impej — hane.

³⁴ Mā me cumā:

— Me Ikrā tūmti, gōtpê amcro cunea kam, mēr me imā Pahpām jō intuwti ita gō! — hane.

³⁵ Mā me cumā:

— He ipê ri ihhêj rŭm cōjkwa pīn Pahpām jō intuwtiata, na wa ha me to ihtīr rohnÿtti mā.

Quê ha jŭm ty, ne ihtyc jirô pê hacpÿa mã ihtĩr, ne nee hipêr jŭ caxuw ihtyc nare. Quê ha prãm na jŭm te apu ipa na, quê ha apà ne hacpÿa mãihtÿj, ne cumã amji kĩn, ne harte pyrên hakry. Ne quê ha hanea ne jŭm kôr na apu ipa ne ikô, ne hacpÿa mã ihtÿj ne cumã amji kĩn. Jĩkjêna, quê ha jŭm te Pahpãm jahkre pej ne cumã amji jôr, ne ahna mehwÿ mã hàr to prãm na, quê ha iwÿr apkjê ne ito amji mã ihhimpej, nePahpãm jahkre pej, ne ahna mehwÿ mã hàr pyrên hakry.

³⁶ — Wa ramã ite me amã me atoa icakôc to, ca atÿj me ipupun cakrô, ca nee cormã me ikam gapac nare.

³⁷ Ne por Inxũ te ijũhkra mã me hacjên xà atajê, quê ha ihtÿj ijũhkra mã me acjêj, wa ha itÿj amji mãme huwahi, ne jŭ caxuw pô mã, amji pê, jŭm to ijũcapêr, quê ha ipictor nare.

³⁸ Ne por Inxũ te ampo na amji mã ito prãmti xà atawÿr pê wa còjkwa pĩn wrÿ. Ne nee amjia kôt ite amji mã ampo na prãmti ata wÿr, iwryc nare.

³⁹ Ne ite, cute ijũhkra mã me hacjên atajê tohajÿr xà caxuw ri, cute me awÿr ikujahêc he. Quê ha nee jŭm ipê ipictor nare. Wa ha jô ri pjê jamre xà ata kam, me to ipicokjêr xàjô amcro kam, itÿj amji kôthacpÿa mã mehcunea to ihtĩr. Hôhõ, ita caxuw ri Inxũ te ikujahêc.

⁴⁰ Ita na ri Inxũ ito prãm he. Quê ha ihtÿj ipêPahpãm kra te hajÿr romã mã iwÿr me apkjê. Ne por quê ha ito amji mã mehhimpej atajê, wa hajũ caxuw, pjê jamre xà ata kam, hacpÿa mã me to ihtĩr. Quê ha me to ipicokjêr xà jirô pê Inxũ cahê na mehtĩr rohnÿtti mã na ameipa — hajÿr.

⁴¹ Mā Juta catêjê kwỳ te ajpên mã me Jeju toiĥcakôc kên kam mehtêm. Ampo na? Cute cōjkwa pîn cupême hõ tuaw pyrác ne iwryc na amji jarên, na riame ajpên mã harên to hane he:

⁴² — Pom cupê Joje me Marij kra ita? He wa ramã ite me hõmpun pejtu, nõ na mã ajte cōjkwapîn iwryc na amji jarẽ? — hane.

⁴³ Mā Jeju te mempar ne me cumã:

— Nãmhã ne apu ihêj xi na amji mã me ito hajÿrjicu.

⁴⁴ Jũ wÿr quê jũm amjia kôt amji to ikôt ipa catê. Nãmri quê ha Inxũ te jũm pê ikôt ipa catê na ton na, quê haihtÿj cupê ikôt ipa catê. Na wa ha itÿj hacpÿa mã toihtÿr, ampo cunea jamre xà ata kam.

⁴⁵ Ne Pahpãm jarkwa to mehçakôc catêjê jõ kàhhôckam hũjarên xà te hajÿr he: “Quê ha Pahpãm pê mehçunea mã ampo to hahkreatê” hane. Quê ha cute me kamhapac, ne amji mã me to ihhimpej atajê, quê ha ajpên iwÿr me apkjê, ne iwÿr me pra, neihtÿj amji mã me ito ihhimpej.

⁴⁶ Ne rÿ jũ caxuw ita ri, pjê kam catêjê nõ te Inxũ pupun nare, ne pa nare. Wa ipyxit peaj ne itÿj quêt hõmpu. Ampo na? Hecurũam wa icator, na ri imã hahkre pej.

⁴⁷ — He wa ampeaj kam me amã awjarẽ, quê ha jũm te amjimã ito ihhimpej na, quê ha ihtyc jirô pê hacpÿa mãihtÿr, ne ihtÿr ita na apu ipa rohnÿtti mã.

⁴⁸ Na ri ipê me gõ te me ato atÿr rohnÿtti mã xà ata.

⁴⁹ Ne pê mam me panquêtjê põ kam me hamreare ata kam ame hõ pejti japyr te mana

ata pit ku cakrô, pê ihtỳj amehwej ne amehtyc partu, ne nee camahacpÿa mã jũm tĩr nare.

⁵⁰ Ne por mehwÿr cōjkwa pĩn me hō tuwti wrÿc ata, quē ha jũm te ihkwÿ krēr na, quē ha Pahpãm cahê na ihtĩr ita na apu ipa rohnÿtti mã.

⁵¹ Ne ipêa ri cōjkwa pĩn me cumã me hō tĩar wrÿc ata. Ne ipêa ri me to ihtĩr rohnÿtti mã xà. Wa ha pa, pjê kam mehcunea mã amji gō. Na quē ha jũmte ihhêj ne ikwÿ krēr na, quē ha Pahpãm cahê na ihtĩr ita na apu ipa rohnÿtti mã — hajÿr.

⁵² Mã Juta catêjê kwÿ ame kam incryac to ame kam incryc, na ri cute meajpẽn mã harẽn kên kam ihtêm, ne me harẽn to:

— Jũ mã quē ajte hũmre ita ne me pamã amji jĩa gō, cu ame cuku? — hajÿr.

⁵³ Mã Jeju me cumã:

— He ampeaj kam wa ha me amã amji jarê, ca ha me ateame ipê Ahàkà jĩ kur nare, ne nee ame icaprô ita to ameakôm nare na, ca ha nee Pahpãm cahê na amji to ame apijapar kam me toacrà nare, ne atỳj ame atyc pa, ne me akôt hamre rohnÿtti mã.

⁵⁴ Ne quē ha jũm te ijĩ kwÿ krēr, ne icaprô ita kwÿ to ihkôm na, wa ha itỳj jũm ata to hacpÿa mã ihtĩr, por jũ caxuw me to ipicokjêr xà jō amcro pê ampo cunea jamre xà ata kam.

⁵⁵ Quêt ijĩ ita ri pjê kam me hō itajê jirôa pêimpej. Ampo na? He ijĩ ita pê ri quêt me hàpàn xàimpejti ata, ne icaprô ita pê ri quêt mehkôm xà impejti ata, me to ihtĩr rohnÿtti mã xà caxuw.

⁵⁶ Na quē ha jũmjê te ijĩ kwÿ krēr, ne icaprô tomehkôm na, wa ha ramã me ajcacwa, ne ajpẽn

kam me ihônco tu ne. Quê ha ramã Icarõ Pejti me cumã acjêj, quê ha Icarõ Pejti ata carôat kôt me ipa.

⁵⁷ Ne por Inxũ pê mehtîr xà cunea xakat ata te riajpên ikujahêc, na wa itîar na ipa. Na quê ha jũm te ijĩ kwỳ krêr na, quê ha hanea ne ihtîr ita na apu ipa.

⁵⁸ Hõhõ, pê mam me panquêtjê me hõ pejti pê mana krêr cakrô, ihtỳj amehwej pa, ne amehcyc partu. Ne pom curmã cõjkwa pĩn ipê me hõintuwti wrỳc ita caca xà te nee hajỳr nare, ne ajtearemã, wa quêt mehtîr rohnỳtti mã na me to — hane.

⁵⁹ Pê Capernam jõ krĩ kam, cute me cuprõn xà jũrkwakam Jeju me cumã hũjarên xà ata to awjarê tohane. Ne nee pê cormã ne Jeju mecumã amji to ipipê nare, mehcunea te me hahkre pej cupate. Cwỳrjapê pê ajco cute me cumã amji jarên xà itajêcwỳrpê me cumã amji jarên to ipa. Ne Jeju jĩ kur xàata kôt harên xà te hajỳr he. Quê ha ihtỳj jũm amji mã Jeju to ihhimpej, ne ihkôat ipa, ne ihkôt ipa xà ata pê ri cute hĩ kur xà.

Pê me hàhtôa ne me Jeju mã hikra

⁶⁰ Mã Jeju kôt me ipa catêjê jàhtôa ne cute me itapar, ne ajpên mã me harên to:

— Pom me pamã ampo to hahkre itajê impar kôt hakop jahkre kêatre! Ne jũ mã quê ha jũm kam hapac to, ne hahkre pej ne ahna amji capa? — hajỳr.

⁶¹ Ne nee jũm te Jeju mã me harên nare kam, mã cutearamã me ahna ihcakôc xà ata jahkre pej, cwỳrjapê ri cute mehcukij to:

— Xà ita cwÿrjapê mã ca ame icaca, ne ame imã hikranprãm?

⁶² He ca ha atÿj jũ caxuw cõjkwa wÿr ipê me Ahàkà te hacpÿa mã hàpir na me hõmpu. Jirô pê mã ca ha cormã me ijũjarên xà itajê kôt me hakop, ne me hahkre pej.

⁶³ Ne Pahpãm Carõ Pejti ata ri cahê na me ato ipijaparrohnytti mã. Ne jũ wÿr ca me anõ amjia kôt amji mãhamã ne ca amji to ajpa, ne me ca ajpên to me ajpa. Ne ca ha ate me icakôc xà ita naikam me gapac na, quê ha Pahpãm Carõ Pejti me amãacjêj, ne me ato ipijapar rohnytti mã. Hõhõ, ita pê ri ate me ijĩ kurxà ata, pom wa me amã harê ita. Ne wa ampeaj kamme amã ampo itajê jarên cakrô, ca ajte nee me akwÿito amji mã me ahimpej nare — hajÿr.

⁶⁴ Ampo na pê Jeju me cumã ita jarê? Nee mã ampo nanare. He pê ramã rÿ pëa mã, mam jũmjê atajê te to amji mã mehhimpejxà nare na me hahkre pej, ne hanea ne jũm te ihkên mãmên xà ata na hahkre pej.

⁶⁵ Ne cute me cumã:

— Cwÿrjapê wa ite ramã me amã harên xà ata na, quê ha Inxũ te ikôt jũm te ipa catê na hãm nare na, quê ha nee cupê ikôt ipa catênare — hajÿr.

⁶⁶ Na ri Jeju kôt me ipa catêjê jàhtôa ne cute ihkôt me ipa jicu, ne nee hipêr ihkôt me ipa nare.

Pê Jeju kôt me ipa catêjê te tôxi atajê nee me cumã hikran nare

⁶⁷ Mã cute me ipê ihkôt me ipa catêjê te tôxi itajê cukij to:

— Xà ca ha hanea ne me ijicu, ne ma me aprarprām? — hane.

⁶⁸ Mā Ximāw Petrô te cumã harkwa to:

— Jūm wa ha ajte me hūnā? Me ijō Pahhiti, pom acakôcxà itajêa ri quêt me imã ite amji to me ipijapar rohnýtti mã xà to hahkre.

⁶⁹ Wa ite me Pahpām te apê jūm pejti ata kujahêc name gahkre pej, na wa itýj ite amji mã me ato hajýr — hajýr.

⁷⁰ Mā Jeju me imã harkwa to:

— Ýhý ita cwýrjapê wa ite amji mã me ate tôxi itajê capi cakrô, mã me anō pyxit ne kam me pahcurê xwýn carō kên jō pahhi — hane.

⁷¹ Ne pê Jeju, Juta Carijot pê Ximāw Carijot kra ata to, pê meimã ihcakôc. Ampo na? Juta ata pê ihkôt me ipa catêjête tôxi atajê nōa cakrô, quê ha ihtýj jū caxuw Jeju curê xwýn tehcajpa, ne ihkên mã cumê.

7

Pê Jeju kjêjê intuwre atajê ame cumã xwý

¹ Ita jirô pê mã ri ma Jeju ame ito mō, Hīpôjajojō pjê kam, ne pê nee Juta jō pjê kam ajco apu ipa nare. Ampo na? Pê curi me hō pahhi catêjê apumehcuran prām na pê.

² Mā ramã caxuaw Juta catêjê jō amji kīn nōjaprý te Ikrere jō amji kīn ata to me cator xàakam. Pê ajco me hōamji kīn ton xàa na, ihtýj ikrere atajê kam amehkrī, ne nee me hūrkwá pej kam amehkrī nare.

³⁻⁵ Mā cormã hapu na Jeju kôt mehkjêjê atajê teihtō kà pê Pahpām kra na amji mã me to hajýr

nare, na ri cute me hapactua kam cumã harkwa to:

— Juta jŏ pjê wÿr atēm pyrentu, ne curi acato, ne acarôat to me cumã ampo pihho catihti itajê cunea to, quê me hàhtôti atajê me hŏmpu! Quê ha jŭm mã amji to cati prãm na, quê ha nee apuipimxur to ihcuhkwÿr nare. Ne mërampo na quê ate ampo jahkre pej xà itajê na me apupunnare? Me cumã to, quê ahna mehcunea me apupu! — hajÿr.

⁶ Mã Jeju me cumã:

— He cormã nee ite mehcunea mã amji to ipipê xà jŏ amcro kamhàhhuc nare! Ne me amã amji kÿn wÿr meaprar xà caxuw amcro cunea impej.

⁷ Mã pjê kam catêjê itajê nee quêt ame acurê nare. Ne pa nare, me ikam incryc kam ame ipa. Cwÿrjapê ri ma ameicurê, ne ma ame icaca! Ampo na? Wa itÿj me cumã, cute meampo to kên atajê jarên to ipa na ri, ma ame icurê.

⁸ Ne me ca nare, gapacta ne amji kÿn ita wÿr me mŏ. Waha ita ri apu mŏ. Ampo na? He cormã amji kÿn wÿr imŏrxà caxuw nee ijŏ amcro kam hàhhuc nare — hane.

⁹ Hŏ, Jeju te me cumã amji jarên to hajÿr, ne curiaHÿpôjajo jŏ pjê kam hàhhuc, ne apu mŏ, me hakàn pê.

¹⁰ Wa me hakàn pê ame ipa, mã me ina jŭ mã amcro te, wa ma me ipimxuar pê Jeju me, me mŏ. Mã nee jŭm te me imŏr xà na meipupun, ne me ijahkre pej nare.

Me hàhtôti atajê mã Jeju to cute amji kam me hapac xà pijakrut

¹¹ Mā tee Juta catêjê jŏ pahhi kwỳ amji kĭn ata na, me hàhtôti atajê catàtkre na ame Jeju japê. Ne amehapên to me ahna hàhcukjêr to hajÿr to me ipa he:

— Jŏ ri mŏrmŏ Jeju apu mŏ? — hajÿr.

¹² Mā me hàhtôti atajê kwỳ kàjpej pê, ajpên mã me Jeju jarên to:

— Ampeaj kam jŭm ita pej — hane. Ne mehkwy ajpên mã meharên to:

— Quê, he jŭm ita ihtÿj mehkwy mã ihhêj xi to ipa — hane.

¹³ Mā Juta catêjê jŏ pahhi kwỳ mã Jeju kĭnnare na, cute me hahkre peaj xà na, nee jŭm me kam mare mãajpên mã Jeju kôt harên nare, me hŏ pahhi kwỳ te ame kam incryc, ne ame to kên cupate.

Pê Jeju me cuprŏn xà kam me cumã ampo to hahkre

¹⁴ Ne ramã cute me to amji kĭn ata krã curan xà wÿr, ihcahti na cute me to hajÿr. Mā ma Jeju Pahpãm to meamji kam hapac xà jŭrkwa wÿr mŏ ne hàr, ne curia hÿr ne ame cumã ampo to hahkre.

¹⁵ Mā Juta catêjê kwỳ te mehcahôc xà atajê na mempar, ne me amji mã harên to:

— Pÿhàpà! Pê nee ihkàhhôc to hahkre cati nare cakrô, ampeaj kam cute amji jahkre pej — hajÿr.

¹⁶ Mā Jeju me cumã amji jarên to:

— Pom wa me amã ampo to hahkre itajê, wa nee amjia kôthahkre pej, ne me amã to hahkre nare, ne nee cupê itekjênare. Ne cupê Pahpãm

te ikujahêc ata tekjê. Necurũam ri ajpên ampo itajê pra, wa cama me amã to hahkre.

¹⁷ Ne quê ha jũm mã Pahpãm te amji kam hapac xâjahkre pej, ne ihkôt amji ton to prãm na, quê ha ite ampo to hahkre xà itajê na ikampa, ne hahkre pej pyrentu, Pahpãm pîn hapôj na, ne nee ikrã pîn hapôj nare.

¹⁸ — Ne quê ha mehcunea te amji mã me jũm cupa to prãmto, quê ha ihtÿj amjia kôt, ihkrãa kam me cumã ampojarên to ipa. Ne pa nare, wa nee ite hajÿr nare. Ampo na? Imã ate amji mã me icupa ita na me ato prãm nare, quêt ate me amji mã me Pahpãm te ikujahêc ata cupahti na ri, imã me ato prãm. Na wa itÿj catyt kam me amãijũjarên xà, hêj xi nare ita to ijũjarên to ipa, ne nee wa ame amã ihêj xi jarên to ipa nare.

¹⁹ Ne pê ramã Mojxe xwÿ me panquêtjê mã Pahpãm jarkwa gô cakrô, ca ajte nee amji mã me kam gapac nare, ne mër ampo cwÿrjapê mã ca tee ame icuran to hahkre? — hane.

²⁰ Mã mehcunea te Jeju mã me harkwa to:

— Mõrmõ ca apu akrã kam waj, na mã ca apu amji na meikraj! Jŏ ri mã jũm apu acuran prãm ita? — hajÿr.

²¹ Mã Jeju me cumã:

— Por wa ite me pahkôt xà jŏ amcro na icarôat to ampo pihho pyxit peaj ton, ne ite jũm xà ata caprãr, ne to me amã ipikrar ata to, wa ite amjina me amên, ca ajte ame ikam acrylic.

²² Ne ca hanea ne atÿj me pahkôt xà jŏ amcro na meapê. Ampo na? Quê ha me pahkôt xà jŏ amcro na jũm cahãj mã ihkrare ihpÿm, ca ha atÿj ajte mepahkôt xà jŏ amcro itajê nŏ na me

cumã impy kà kwỳjakep, pê Mojxe xwỳ me amã to hahkre xàa na. Ne nee mã pê Mojxea ita to ipipẽ nare, ne mam Mojxe quếtti pê Aprãw xwỳ ata mã pêita to me amã ajpẽ.

²³ Ne Mojxe xwỳ te me hapackre xà ita kôt, mã ca atỳj me pahkôt xà ita na me ahkrare mã mempy kà jakep. Ne nee ipê me apyràc, wa ite jũm ita pê ihkà kwỳ jakep nare, ne quết cumã ihkà cunea na to impejti, ca ajteita na ame ikam acryc?

²⁴ Ne ca hãn ne ajte ampo na me hõmpun pyxit peaj kam, ramã ihkêanre na me harẽ. Ahna cute hajỳr nare, ca ha xaate hõmpun xà ata kôt to amji kampa, ne ihkôt hakop, neimpejti na hahkre pej, nare, ihkêanre na hahkre pej jirô pê, ca ha cormã atỳj harẽ — hane.

Jeju pê ri Mexij pê me to awjahkre ata

²⁵ Mã Krĩpinkrên catêjê kwỳ Jeju na me ajpẽn cukij to:

— Xà Jeju ita mã me pajõ pahhi catêjê amehcuran prãm? Ne mër ampo na mã cute mehpro nare?

²⁶ Pom me pahcuneajipôc ri xa ne ame pamã ihcakôc ita? Mã nee ajte jũm te cumã ampo jarên nare? Nare, mõrmõ me pajõ pahhi catêjê, por pê Crixto toPahpãm me pamã awjahkre ata na, mõrmõ amji mã me to hane?

²⁷ He me imãa, nee cupê Crixto nare! Quê ha jũ caxuw me pahwỳr Crixto ata cato, cu ha neejũ rũm cator xà na me hahkre pej nare. Ne pom jũmxũmre ita ri ihtỳj jũ rũm cator xà ata na me

pamãhahkre pej, he cupê Naxare jŏ krĩ catêjê nõ — hane.

²⁸ Mã cormã Jeju Pahpãm to me amji kam hapac xàjũrkwa kam xa, ne cute me cumã ampo to hahkre xà ata kam, ihkrãhhia kam me cumã:

— Xà ajkĩ ampeaj kam me amã jũ rũm icator xà ita najahkre pej? Hãpà! Wa nee amjia kôt icator nare, ne me apê, por ajpên cute ikujahêc ata jahkre kêatre. Ne por jũm te ikujahêc catê ata pê ri amji jarkwa par catê, ne catyt kam ipa!

²⁹ Ne imãa ri quêt hahkre pej. Ampo na? Heihpĩan wa icator, ne cutea ri ajpên ikujahêc — hane.

³⁰ Mã cute mempar, ne tee amehpro to hahkre, ne neejũm te ihcupên nare. Ampo na? He nee cormã cute mehpro, ne ihkên mãme mên xà kam hàhhuc nare na ri.

³¹ Mã me hàhtôti atajê jipôc ri me hàhtôa te ihtÿj Pahpãm te Jeju to me cumã hũjahkre na amji mã meto ihhimpej. Na ri me ajpên mã harên to:

— He ihhêj ne me imãa, cupê, por pê Crixto to Pahpãm me pamã awjahkre ata! Ne quê ha jũ caxuw ajkĩ Crixto cato, ne ajkĩ, pom Jeju te ampo ton xà itajê jirôa pê ajkĩ to? Hãpà. Taa mã ri ramã cator — hane.

Pê krãhtare amji capry to Jeju pro to, hÿrmã pra

³² Mã Parixêw catêjê kwÿ te kajpej pê cute amji mã me harên to hajÿr na mempar, cwÿrjapê ri cute Pahpãm mã mehcajrên catêjê jŏ pahhi kwÿ me, cute Jeju pro na me ajpên par. Ne cute hÿrmã me hŏ krãhtare kwÿ kujahêc, cute mehpro ne

me haxàr prāmte. Mā hÿrmā me cator ne cama mehcuuhê ne me kampa.

³³ Mā cormā Jeju me hàhtôti atajê jipôc ri xa neme cumā:

— Wa ha itÿj cormā ijôtpê ame acahê na imôr crirene, ne quê ha ina ahtûm nare, wa ha ma hacpÿ mã cute ajpên ikujahêc ata wÿr amji jaxà ne tẽ.

³⁴ Ca ha me ipupun prāmte, tee ame ijpê ne nee me ipupun nare. Ampo na? Jũ wÿr ca me anõ, por wa curi apu mō ata ri ikôtacato! Na ca ha nee me imā acator nare! — hane.

³⁵ Mā Juta catêjê te ajpên mã me harên kam mehtêm, ne me ajpên mã harên to:

— Jũ kam mã quê ha ajte tẽ, cu ha ajte neecumā me pahcator nare? Xà quê ha ajkĩ ma me cupê Crec catêjê jō pjê wÿr tẽ, ne curia me cupê Juta catêjê kwÿ mã apu ampo to hahkre to ipa?

³⁶ Ne mër ampo mã hãn ne harên kam pra ne harên to: “Wa ha ma tẽ, ca ha tee ame ijpê, ne nee hipêr me imā acator nare”, ne “Jũ wÿr ca me anõ curi itêm xà ata wÿr ikôt tẽ” hane? — hajÿr. Hõhõ, pahhi catêjê te ajpên mã harên to hajÿr.

Pahpām Carō Pejti ata pê cô te me pahto ihtÿr xà rohnÿtti mã ata pyràac

³⁷ Ne pê me hõ amji kÿn cahhur ata, cute kam meto ihtêm xà jirôa pê impej, na pê Jeju me hipôc ri xa, neihkrâhhia kam me cumā hÿjarên to:

— Quê ha me anõ mã, Pahpām jahkre pej xà pê amā kôr pyràcti ata naprām na, ca ha iwÿr tẽ, wa ha amā Pahpām to ajpẽ, ca ha hahkre pej pyrên gakry.

³⁸ He pê ramã Pahpãm jarkwa ita jarën to hane he:

“Quê ha jũm te amji mã ito ihhimpej na, quê ha cute amji kam hapac xà tuw pejti atakôt me hàhtôa ne Pahpãm wÿr me apkjê, quê ha taa mehtîr rohnÿtti mã na me to. Quê ha cute amji kam hapac xà tuw pejti ata pê cô catiapijapjêr ata pyrâac, ne ipijapjêr ita na” — hane.

³⁹ Ne por cô to mehkôm xà to Jeju te me cumã ihcakôcata pê Pahpãm Carõ Pejti incwÿr xà. Ampo na? Por quêha jũmjê amji mã me Jeju to mehhimpej atajê, quê haihtÿj me Pahpãm Carõ Pejti ata cwa. Ne ampo na pê cormã ne nee ame Pahpãm Carõ Pejti ita cwÿr nare? Pê cormã Jeju nee hacpÿ mã ihtîr ne Hũm wÿr amji jaxàr, ne hacpÿa mã amji to cati nare na pê.

Pê me hàhtôti atajê ahpÿanre na Jeju na cute me amji to hajÿr xà

⁴⁰ Ne pê me hàhtôa ne cute cô to mehkôm tome cumã ihcakôc na me kampa, atajê ajco ajpën mã me harën to:

— Ampeaj kam ri hũmre ita pê me pamã Pahpãm jarkwa toihcakôc catê catia, cu me hikaj ata, ne taa mã ri cator — hane.

⁴¹ Ne pê mehkwy ajpën mã me harën to:

— Me imã cupê Crixtô to Crixtô, ne toa pê Pahpãm me pamã awjahkre — hane. Ne mehkwy ajco ajpën mã me harën to:

— Pom Jeju pê Hīpôjajo catêjê nō ita? Xà quê ha ajkī ihtỳj Crixto jū caxuw Hīpôjajo jōpjê pīn cato? Jū wỳr quê ha curũm cato!

⁴² Ampo na? Pê ramã Pahpãm jō kàhhôc kam tohũjarẽn to hane he:

“Quê ha ihtỳj jū caxuw pahhi pê Tawi xwỳ tamxwỳ nō kam Crixto cato,
ne por pê curi Juta jō pjê kam, Pãw jōkrĩ kam Tawi xwỳ ihkrĩ ata kam, quê ha ihpỳm” — hane.

⁴³ Mã pea me hàhtôti atajê te Jeju to me amji kam hapac xà to me ipicapôn.

⁴⁴ Ne pê mehkwy ihtỳj me pro ne ihkên mã me mênprãm, ne me hacjên xà mã me haxàr prãm. Ne pê nee jũm ajte ihcupên nare.

Pê krãhtare nee me Jeju pro nare

⁴⁵ Na ri ma hacpỹ mã krãhtare atajê te me amji jaxàr, ne me hũ kam me pra, Pahpãm mã cutemehcajrẽn catêjê jō pahhi kwỳ me, Parixêw catêjê atajê wỳr. Mã cute me Jejujapên ne ahna mehcukij to:

— Ampo na mã ca nee ate mehpro ne ajpên iwỳr me to amõrnare, ne ajpên gũ kam me pra? — hajỳr.

⁴⁶ Mã krãhtare atajê me cumã harẽn to:

— Wa rỳ jū caxuw ite me jũm te ihcakôc xà nōto ihcakôc to hajỳr na mempar nare, ne ihcakôc xà itajêajteare mã — hane.

⁴⁷ Mã Parixêw catêjê atajê krãhtare atajê mã:

— Pỳhàpà? Xà hanea ne ajte cute me amã ihhêj?

⁴⁸ Xà ajkĩ me ipê pahhi catêjê kwỳ me Parixêwcatêjê kwỳ nŏ te mã amji mã Jeju to ihmpej? Hãpà!

⁴⁹ He por Jeju to amji mã mehhimpej to me ipa atajê pê me pahte amji kam me pajapac xà jŏ kàhhôc jahkre kêatre! Cwỳrjapê quê ha Pahpãm ame to kêanre ne, nemehkên mã me cumê — hane.

Pê Nicotem Jeju tehcajpar prãm to prohti kam ihcakôc

⁵⁰ Pê Nicotem ramã jũ caxuw caxwa ri Jeju mã ihcakôc ata pêmehkwỳa nŏ, ne cute mehwỳ mã harkwa to:

⁵¹ — He cu nee me pajŏ kàhhôc kam pahte amji kam me pajapac xà ata rer, ne me jũm atacukij ne mempar nare kam ihkên mã me mên nare. Cu ha xa mehcukij, ne me kampa, ne ihkên na me hahkre pej, ne cormã ihkên mã me cumê — hajỹr.

⁵² Mã mehwỳ me cumã harkwa to:

— Pỳhàpà, xà ajkĩ apê Hĩpôjajo jŏ pjê catêjê nŏa, mã caatỳj apu Hĩpôjajo jŏ pjê pĩn Crixto ata cator na amjimã to hane? Apu hajỹr nare, ne cama Pahpãm jŏ kàhhôc to ca hahkre ne hahkre pej, he nee rỳ jũ caxuw Pahpãm jarkwa to mehcaôc catêjê nŏ te Hĩpôjajo jŏ pjê pĩn cator nare — hane.

8

Pê Jeju cahãj xyre ata te hipêr ampo kên ton nare xà caxuw hũtà

¹ Jirô pê mã ri ikre wỳr mehcunea cutor, mã ma JejuPĩxô jŏ kẽn wỳr mŏ.

² Mã amcro nŏ na, awcahti xà wỳr, Jeju te amji jaxàr, Pahpām to me amji kam hapac xà jũrkwa wỳr, ne hàr ne jỹ. Mã me hàhtôa ne ahna me ipixêr, ne me xa, ne cuteampo to me cumã hahkre xà atajê na ame kampa.

³ Mã cute me cumã Mojxe xwỳ jŏ kàhhôc to hahkreatêjê me, Parixêw catêjê te me pyjê nŏ te ahti naimpjê kaj na jũm me nŏ ata pro, ne ma me to mŏ. Ne cute Jeju cuna mã me hãm xà caxuw, ame cumã quêt. Mã mehcunea jipôc ri hãm ne xa.

⁴ Mã cute Jeju mã me harên to:

— Me Ikrã tũm, pom cahājre ita ihtỳj ahti na mŏ ne hũmre ita to nŏ, impjên kaj na. Mã jũm te ajpên kam me hŏmpun, wa ite mehpro, ne ajpên awỳr me to mŏ.

⁵ Ne pê Pahpām jŏ kàhhôc kam Mojxe xwỳ me pamã pyjê te hajỹrjê atajê kẽn to curan to hajỹr na, awjahkre he: “Quê ha pyjê nŏ apu hajỹr to mŏ ata ri kẽn to cutemehcuran xà” hane. Ne ca? Jũ mã ca ha cute hajỹr xà ita na me imã ihkôt harên to? — hane.

⁶ Ampo na pê pyjê nŏ ata kôt ame Jeju mã harên tohane? Nee mã ampo na nare. Jeju te me hapackre xà nŏ to ihcupan, mã cute mempar ne mehpro prãmte, pê tee ame to hahkre. MãJeju te cama hỹr ne me kam hapac, ne pjê na hikôt nehũhkrahhi to kam ihhôc to mŏ.

⁷ Mã mehcukij ita na. Mã cute amji capô ne hỹr pej, ne me cumã harkwa to:

— Por rỳ jũ caxuw me anõ te Pahpãm cuna mã ampo kenton nare ata, ca ha mam kën nõ to cahãjre ita kamawcapê, ate to ihcuran xà caxuw — hajÿr.

⁸ Jirô pê mã ri hacpÿa mã pjê na hikôt, ne ihtÿj jÿ ne kam ihhôt.

⁹ Mã cute me Jeju te me cumã hũjarën to hajÿr na kamme hapac atajê, ma me pyxit ne me pra. Ne por mam jũm kàhtu ata ri mamam me cumã tẽ. Ne ahnaa me pyxit ne ajkôtmemprar ita kam me cutor. Mã ahte Jeju me jũm cahãjre ata pit jàhhuc.

¹⁰ Mã Jeju te amji capô ne hÿr pej, ne jũm cahãjre ata mã:

— Hàpà? Ne mër jõ ri mã kën to cute ame acapêr prãmatajê? Ne mër jõ ri mã ame akôt harën to kèanre atajê? — hajÿr.

¹¹ Mã jũm cahãjre ata Jeju mã:

— Hamreare, nee jũm jàhhuc nare — hane. Mã cumã:

— Wa nee pa xwÿjê ato kën nare. Mër gapacta netẽ, ne nee hipêr mō ne ampo kën tonnare — hane.

Jeju pê hàhcujro xà pyràac, ne me pamã ampo cunea to ajpê

¹² Jeju te hipêr me hàhtôa mã ampo to hahkre kamihtêm, ne me cumã amji jarën to hajÿr he:

— Ipê, pom hàhcujro xà ampo cuneacujro, ca me hõmpu ne me hahkre pej ita pyràac. Ipê Pahpãm wÿr me amã ijàhcujrocatê. Na ca ha ate me amji mã ito me ahimpej na, ca ha jũcaxuw awcapàtkôti kam, me apê amji jahkre kêatre

kam, mePahpām pê apictor xà ata kam ame apa nare — hajÿr.

¹³ Mā Parixêw catêjê kwÿ te me Jeju kam hapac ne mecumã:

— Ca ramã ca apu amji to acakôc, na ri acakôc xà itajêkôt hamreare — hajÿr.

¹⁴ Mā Jeju me cumã:

— Pom wa ampeaj kam me amã amji jarên to ipa itajê kôt nee hamre nare. Ampo na? He ampeaj kam, wa nee apu ihêj xi nare. Ne pa ri quêt imã, por jũ rûmicator xà ata na amji jahkre pej, ne hanea ne imã hacpÿ mã ite amji jaxàr xà ata na amji jahkre pej. Ne me ca nare, me apê jũ rûm icator xà ata na ijahkre kêatre, ne hanea ne jũ kam itêmxà ata na me apê ijahkre kêatre.

¹⁵ Na ca me ate amji kam me gapac xàa kôt, amji mã meikêanre na me ito hane, nare, mORMÕ ca amji mã me ipej na me ito hane. Ne imãa, ate me ijarên xà itajê cunea kôt hamreare. Ne nee cormã ite mehkênme, mempejti cukij ne me to ipicokjêr xà jŏ amcro cator nare.

¹⁶ Wa ha ite ramã me ato ipicokjêr xà na mã, wa ha itÿj catyt kam me akên me, me apejti to ipicokjêr to ipa. Ampo na? He wa ha ite ton xà ata kam, nee ahte ton nare. Quê ha hanea ne, por Inxũ te ikujahêc ata icahê na jÿ, ne ite me atohajÿr xà to imã hahkre.

¹⁷ Ne Mojxe xwÿ te me amã incaca xà te hajÿr ata rer, na quê ha jũmjê ajkrut ne jũm te ampo ton xà ata na mehõmpu, ne cute me hõmpun xà ata na ajwar ajpêan kôt me harên na, quê ha me amã ampeaj kam ri cute ton.

¹⁸ Ita jĭkjê na wa Inxũ te ikujahêc ata me ajwar me ijũjarêñ xà caxuwme ipijakrut, cwÿrjapê ca ha atÿj ite amji jarêñ xà itana me ikampa — hane.

¹⁹ Mã me cumã:

— Jŏ ri mã apãm ita? — hane. Mã Jeju me cumã:

— He me apê Inxũ jahkre kêatre, ne hanea ne me apêijahkre kêatre, quê ha me amã ijahkre pej na mã, quê hahanea ne me amã Inxũ jahkre pej — hane.

²⁰ Ne por cute Pahpãm to amji kam me hapac xà jũrkwa kam, cute me cumã ihporeto cuprôn xà ata cahê na, pê Jeju me cumã hũjarêñ xaitajê to awjarê. Mã nee cute mehpro ne me haxâr nare, mehacjên xà kam. Ampo na? Pêcormã nee cute mehpro xà jŏ amcro hÿrmã cator nare, na pê.

Pê Jeju pahhi catêjê cunea mã amji jarê

²¹ Mã Jeju te hipêr me cumã amji jarêñ to:

— He wa ha ma tẽ, ca ha ate me ipupun-prãmte, tee ame ijapê, ne nee me ipupun nare. Ampo na? Jũ wÿr ca me anŏ, por wa ha curi tẽ ata ri, ikôt acato. Na ca ha ita ri ame apa, ne ca ha atÿj me akên itajêa kam ame ty. Ampo na? He Pahpãm te nee me amã me akên itajê to impej ne to tojnŏ nare ata kam, ca ha ame ty — hajÿr.

²² Mã Juta catêjê ajpên mã me harêñ to:

— Jũ kam mã quê ha ajte tẽ? Cu ha nee hipêr mehŏmpun nare? Xà quê ha ajkĩ amji cura? — hane.

²³ Mã Jeju me cumã:

— He me apê pjê kam me apa catêjê, ne quêt ipê kÿj pê, cōjkwa kam Pahpām na mehkwȳ, na ri nee ipê pjê kam me akwȳ nare. Ne ate amji kam me gapac xà itajê pê pjê te amji kam hapac xà, ne ite amji kamijapac xà pê ri kÿj pê, cōjkwa kam, Pahpām te amji kam hapac xà.

²⁴ Ca ate nee ite me amã amji jarēn xà ita to amji mǎ me hajÿr nare, cwÿrjapê wa ite me akên atajêa kam me atyc na me amã harēn. Ca me ate, por Pahpām teajpên ikujahêc ata to amji mǎ me hajÿr nare, ne amji mǎ me ito ahimpej nare na, ca haatyj me atyc partu, ne nee hacpÿa mǎ me atÿr ne Inxũ cahê na me akrÿ nare — hajÿr.

²⁵ Mǎ cute me Jeju cukij to:

— Ne mēr me anō mǎ ca? — hajÿr. Mǎ Jeju me cumãamji jarēn to:

— He ipê, por pê wa mam ramã me amã amji jarē ata, nepa wa cormã.

²⁶ Ne wa ha cormã, hipêr me amã me ate me akên ton itajê cunea jarē. Ne nee wa ahte cama me amãme akên xà itajê to icakôc to ipa nare. Ampo na? He wa, por Inxũ Cati pê cute amji jarkwa par catê, ne catyt kam ipa, ne ajpên cute ikujahêc atajarkwa to, wa pjê kam mehkri atajê cunea mǎ icakôc to ipa. Ne wa ha itÿj jũ caxuw amjia kôt me amã me akên xà ton itajê cunea jarē — hane.

²⁷ Pê nee cute me cumã cōjkwa kam Hũm to ihcakôc xà ata na me hahkre pej, ne me kam hapac nare.

²⁸ Cwÿrjapê pê Jeju me cumã amji jarēn to:

— He ca ha jũ caxuw, ipê me Ahàkà te me hũmre na amji jahkre, mã cute pĩ na menxôr na me hõmpu, ne cormã me ijahkre pej pej. Na wa nee amjia kôt ampo itajê ton to ipa nare, ne Inxũ te ahna imã harkwa ne to imã hahkre atajê to pit mã ijàpên to ipa.

²⁹ Ne ampo na ri ajpên cute ikujahêc ata nee amji pê irer nare, ne ihtÿj apuicahê na ipa? Wa cumã cute amji mã ampo na prãmti xàatajê to pit mã ijàpên to ipa na ri — hane.

³⁰ Ne Jeju te ihcakôc xà to hajÿr jirô pê mã ri mehãhtôa te cupê Pahpãm kra na amji mã me toihhimpej kam mehtêm.

Jeju pê me pahcunea pytâr catê

³¹ Mã Jeju te Juta catêjê kwÿ te amji mã me to ihhimpej kam mehtêm atajê mã:

— Ca ha ate amji mã me ito ahimpej kam me to acrà na, caha me apê ikôt me apa catêjê impej pit.

³² Na ca ha me ite amji kam me ijapac xà impejti itajê cunea jahkre pej partu. Na ca ha nee me apê cama me jũm jarkwa kôt me cumã hàpêncatêjê atajê pyrác nare, ne atÿj quêt ameapa — hajÿr.

³³ Mã me cumã:

— He me ipê Aprãw xwÿ tàmwxwÿ tàmwxwÿ, mã nee rÿ jũcaxuw jũm te amji mã me ito cama me harkwa kôt me cumã hàpên catêjê nare, ne wa itÿj ameipa, nõ na mã ca ajte jũmpê ate me ipytâr na amji jarê? — hane.

³⁴ Mã Jeju me cumã:

— Jũ wỳr quê cama jũm pê me cumã hàpên catê ataapu hàpên to mŏ, ne amjia kôt hìcu. Quêha hŏ pahhi cute hìcu na cumã harkwa, quê ha cormã hìcu. Ita jĩkjê na mã, me pahcurê xwỳn pê Xatanaj me ato hane, ne ihtỳj cormã me ato ihhimpej ita kam, ca nee me akên ton jìcunare. Ne ampeaj kam wa me amã awjarê, wa nee ame amã ihêj xi jarên nare.

³⁵ Ne ihnŏ xwỳjê te hajỳar he. Quê ha nee cama me hŏ pahhi jarkwa kôt me cumãhàpên catêjê nŏ hŏ pahhi jũrkwa kam ihkrĩ kam in-crànare. Ampo na? Quê ha ramã hŏ pahhi mã ihkĩn nare, quêha ihtỳj hũrkwa tête cator, ne jũ kam ihkujate. Ne quêtihkra ata quê nee amji tête cator nare, ne nee jũm mã ihpore na to hàhpan nare. Ampo na? Cupêihkra, na quê ha hũrkwa kam ihkrĩ rohnỳtti mã.

³⁶ Ne ipêa ri Inxũ Cati kra. Nãmri wa ha itea me acurê xwỳn pê Xatanaj pê me apytàr na, ca ha atỳj cama ame apa rohnỳtti mã, quê ha nee iràn xà na hipêr jũm me ato ihhimpej nare.

Pahpãm pê me pajŏ Inxũ Cati

³⁷ — He ampeaj kam ri me apê me panquêt xwỳ Aprãw tàmxwỳ tàmxwỳ, wa ramã ite me gahkre pej. Nŏ na mã ca ajte ame icuran prãm. Ne mêr ampo na mã ca ame icuran prãm? Nee mã ampo na nare, ca ma ame ite me amã ampo to hahkre xà itajê caca, na ca ame icuran prãm.

³⁸ Ne Inxũ te imã ampo jahkre, ne imã to hahkre xà atajêa na wa to icakôc to ipa. Ne me amã ajtea mã, me apãm pê Xatanaj ata ihkrĩ, ne

me ato ihhimpej. Na ca ihkôat me amjikampa, ne atÿj me ampo kên ton to me apa — hane.

³⁹ Mă me Jeju mă:

— He me ipăm pê Aprăw xwÿ — hane. Mă Jeju me cumă:

— Quê ha me apê Aprăw xwÿ kra na mă, ca ha cute amjikam hapac xăa to amji kam me gapac to me apa. Ne imăa, neeme apê ihkra nare. Ampo na? Ca nee me cute amji kam hapac xăa to me amji kam gapac nare.

⁴⁰ Na wa ite ampeaj kam me amă Inxū te imă ampo to hahkre na harên. Atajê jarên cwÿrjapê mă, ca ame icuran prăm. He pê Aprăwxwÿ nee jū caxuw jūm pejti curan prăm nare.

⁴¹ Ne ajteare mă, Inxū Cati kaj na me apăm te me amă ampo ton to hahkre xă atajêa mă, ca me ton to me apa he — hane. Mă Juta catêjê Jeju mă:

— Ne nee me ipê jūm mă ajteare mă hūm ata nare. He Pahpăm ita pê ri me ipăm, wa me to amji mă me ijŏ Pahpăm, ne me ipê mehkra impeaj wa me — hane.

⁴² Mă Jeju me cumă:

— Hamreare, me apê Pahpăm pê Inxū Cati kra nare. Quê ha me apêPahpăm kra na mă, quê ha ihtÿj me amă ikîn. Ampo na? He ihpian wa icator. Ne nee wa amjia kôt apu ipa nare, necute amji kam hapac xăa to wa apu ipa. Ne cutea ri ajpênikujahêc.

⁴³ Ne ampo na mă ca nee me icakôc xă itajê impar jahkre pej nare? Nee mă ampo nanare. Ca nee caxwăm catia mă ito amji kam me gapac prăm nare. Cwÿrjapê ca ha nee me icakôc xă itajê impar jahkre pej nare.

44 Ne me apê Pahpām curê xwỳn pê Xatanaj ata kra, na ca cumã ampo kĩnti itajê to pit mã me gápên to me apa. Ne cute amji kam hapac xàato, ca me amji kam gapac to me apa he. Ne pjê te amji ton pê mã, pê ramã me apãm ita mehcuran kam tẽ. Ne nee cupê catyt kam, ampeaj kam ampo to ihcakôc catê nare, ne amji cãm tâa rũm ri cupê ampo cunea to ihhêj xi to ihcakôc to ipa catê. Ne cupê ampo cunea hêj xi pãm, na ri ampo hêj xi xà to pit mã ihcakôc to ipa. Ne rỳ jũ caxuw ampeaj kam ampo to ihcakôc nare. Ne ramã cute me acaxuwincaca xà ita ton to amji pyrác tu.

45 Ne wa quêt catyt kam, ampeaj kam ampo hêj xi xà nare to ijũjarên to ipa, ca ampo ita naajte ma ame ipar caca. Ampo na? Ca nee caxwãm catia mã itoamji mã me ahimpej, ne me ipar nare to prãm to mã caame hane.

46 Ne gapacta ne ite ampo to kên japê ameamji cukij, ca ha nee me anõ amji mã ite ampo to kên xà nõ na ijarên nare. Ampo na? He wa rỳ jũ caxuw ite ampo kên ton nare. Na wa hãn ne catyt kam ampo atajê jarẽ, ca ma ajte ame ipar caca. Ne mêr ampo na mã ca ajte nee amji mã ito me ahimpej nare?

47 Ne me cupê Pahpãm kra catêjê ihtỳj amji mã meharkwa cunea na me kampa, ne mempar to kênre nare. Ne me ca nare, nee me apê ihkra nare, na ca ma amempar caca — hane.

Pê Jeju Aprãw xwỳ pupu

48 Mã me Jeju mã:

— Nee mã apê Juta catêjê kra impeaj nare, ne me ikĩnteapê Krĩrĩtpej jŏ pjê catêjê nŏ, ne ihpĩan pê ca acato, ne akam ampo carŏ kên te hipu tu — hane.

⁴⁹ Mã Jeju me cumã:

— Hamreare, ikam quêt ampo carŏ kên hamreare, na waquêt amji mã, por Inxũ te ajpên ikujahêc ata pit cupahtito ipa, ne ma haprý to cati to ipa. Ne me ca nare, ca ajte nee amji mã me icupa nare, ne cama me ito icrire to prãm.

⁵⁰ He wa nee cute amji mã me icupa to prãm to icator nare cakrô, quê ha ihtýj Inxũ Cati ata, por nee amji mã me icupanare itajê cukij, ne mehkên mã me cumê.

⁵¹ Ne ampeaj kam wa ha me amã awjarê. Por quê ha meijarkwa kampa, ne amji mã me icupahti to me ipa atajê, quê ha jũ caxuw amehtyc nare, ne mehtĩr ita na ame iparohnýtti mã, Pahpãm cahê na — hane.

⁵² Mã me cumã:

— Hamre, ita caxuw wa ite me akam ampo carŏ kên na megahkre pej pejtu. Ne pê ramã Aprãw xwý me, por me cupêPahpãm jarkwa to mehcahôc catêjê catia atajê mehtycpartu. Nŏ na mã ca ajte amji jarên to: “Quê ha jũm amji mã ikampa, ne cute ijarkwa kôt ipa na, quê ha nee jũ caxuw ihtyc nare” hane?

⁵³ Pom me ipãmjê pê Aprãw me, cute Pahpãm jarkwa tomehcakôc catêjê atajê ihtýj ramã amehtyc par ita? He xà ajkĩ me hirôa pê acati? Jũ mã mã ca apu amji to, amji kam gapac xà itajê to? Mŏrmŏ ca atýj apu amji catia na amji cãmji? — hajýr.

54 Mã Jeju me cumã:

— He wa ha ipyxit peaj ne amji mã ipejti to icakôc to ipa na mã, quêha icakôc xà atajê kôt hamreare ne. Ne pom ca Inxũ toamji mã me Apãm ata ri ihtÿj ijaprỳ to cati to mŏ.

55 Ne ikĩnte me apê Pahpãm jahkre kêatre, ne imãa riquêt hahkre pej. Wa ha ipê hahkre kêatre na amji jarê namã, wa ha ipê me apyràac ne ampeaj kam ihêj xi. Ne neeite hajÿr nare, ne itÿj quêt imã hahkre pej, na wa amji mã harkwa na kampa, ne amji mã hũpahti to ipa.

56 Ne me aquêt xwÿ pê Aprãw ata pê ramãicator xà ata na ipupu ne ijahkre pej, cwÿrjapê pê ampeaj kam hũrên hakry — hane.

57 Mã me Jeju mã:

— Pÿhàpà? Xà pê ca atÿj ajte Aprãw xwÿ pupu? Pomnee cormã ana caku te xĩncwënta nare ita? Ne cormã atuwre, nŏ na mã ca ajte ate Aprãw xwÿ pupun na amjijarê? — hane.

58 Mã Jeju me cumã:

— He wa ha ampeaj kam me amã amji jarê. Pê wa ramãAprãw pÿm xwÿjrea na apu ipa, ne cormã apu ipa rohnÿtti mã — hane.

59 Mã Juta catêjê te mempar, ne caxuw kên to me amjityj, cute me to kam hũcapêr, ne to mehcuran prãmte. Ampo na? Cupê Pahpãm pyràac ne rÿ pêa mã mam ipa rohnÿttimã na cute amji jarên, na ri kên to amehcuran prãm. Mã me cupê Jejupimxur ne ma Pahpãm jũrkwa pê cator ne tẽ.

9

Pê Jeju jūm to tūm ita caprã

¹ Ne Jeju cormã mōr kwya kam, cute jūm to tūam naihpým ata pupun.

² Wa me ipê ihkôt me ipa catêjê te ahna mehcukij, neme cumã:

— Me ijō Pahhi, ampo na mã pê hūmre ita into tūm ita na ihpým? Xà pê ajkĩ ihkên xà nõ to jahpan xà na mã cute hajýr? Nare, xà ajkĩ hūm me inxi te ihkên xà nõ ton jahpan xà na mã into tūam naihpým? — hajýr.

³ Mã Jeju te me ipar ne me imã:

— Nee mã ihkên nõ cwýrjapê into tūm nare, ne nee mãhūm me inxi kên nõ cwýrjapê cute hajýr nare. Ampona ri into tūm? He Pahpãm te hūmre ita kôt carôt týjti to ipipê to prãm to ri, cute to into tūm.

⁴ Pom hãn ne ihtýj amcro kam me hàpên xà to mehàpên to me ipa, ne caxwari nee me hàpên nare. Itajĩkjê na mã ite hajýar. Na wa ha cormã ita ri pjê kamapu imōr reria mã itýj, por cute ajpên ikujahêc ata mã, apu ijàpên to ipa. Ne wa ha ma jū caxuw hacpý mã tē, ne nee hipêr ita ri cumã ijàpên nare.

⁵ Ne pom pyt me parīt xà caxuw me pamã pjê kujro, cu me rīt, ne me ampo pupu ne me hàhkre pej, ita jĩkjê na mãipê me cumã Inxū te amji kam hapac xà cunea tohahkre catê, mār quê mehcunea me hàhkre pej — hajýr.

⁶ Hō, cute ita jarên to hajýr jirô pê mã ri cutepjê kam harcô mên, ne to pjê to incire ne to ihtô,

ne to carêc necumã into na to ihtêm, ne cumã harkwa to:

⁷ — Tê ne Kujahêc jô cô kam akuccuhhõ — hajÿr. Mã into tûm ata te mõi ne ihkuc cuhhõn, ne hacpÿ ne amji jaxàr, ne ramã ampo cunea pupun to mõi.

⁸ Mã cahi na mehrĩ catêjê me, hàhwÿr na cute mehõmpun pejtu atajê te me hõmpun, ne ahna me ajpẽn cukijto:

— Xà into tûm ihkrĩ ne me pahna ahwÿ ata mã? — hajÿr.

⁹ Mã mehwÿ me cumã:

— He taa mã ri! — hane. Mã mehwÿ me cumã:

— Quê nare! Taa mã nare! — hane. Mã mehwÿ me cumã:

— He mã ajte cupê hũràcti — hane. Mã me cumã amjijarên to:

— He pa wa! — hane.

¹⁰ Mã cute mehcukij ne me cumã:

— Ne mër jũ mã mã ate ne atÿj rĩt? — hajÿr.

¹¹ Mã me cumã:

— He jũm japrÿ te Jeju ata te ri harcô to pjê incirene carêc na ton, ne ito na imã to ihtêm ne imã: “Tê ne Kujahêc jô cô kam ca akuc cuhhõ” hane. Wa ma mõi ne ite ikuc cuhhõn, ne amji jaxàr, ne ramã ampo cunea pupun to imõi pyrentu — hane.

¹² Mã ahna mehcukij ne me cumã:

— Jô ri mõi mõi jũm xũmre ita apu mõi? — hane. Mã mecumã:

— Pÿpÿn — hane.

Pê Parixêw catêjê me ahcukij

¹³ Mā ma me cupê Parixêw catêjê wÿr, por pê mam into tûm ata to me mō.

¹⁴ Ne por pê amcro nō na Jeju carêc to ihtô, ne hūmre into tûm ata na to tē, ne hacpÿa mā cumã irīt to impej jō amcro ata kam pê mehkôt xà jō amcro.

¹⁵ Mā Parixêw catêjê kwÿ te ahna mehcukij ne me cumã:

— Jū mā mā cute aton ne acaprār? — hajÿr. Mā mecumã:

— Pjê kam cute harcô mēn ne to carêc to ihtô, ne ito na imã to ihtēm, wa ma tē ne ite ihcuhhōn ne irīt pejpyrentu — hajÿr.

¹⁶ Mā Parixêw catêjê kwÿ ajpēn mā me harēn to:

— Por jūm te ita ton ata pê nee Pahpām tekjê nare. Xàajkī Pahpām jarkwa kôt mā cute hàpēn xà ita to hajÿr? Ne mēr ampo na mā nee me pahkôt xà jō amcro ita pupun, ne amji mā hūpanare, ne ihtÿj apu ahna apê? — hane. Mā mehkwyā nō te me cumã harēn to:

— Xà quē ajkī jūm kēanre ata ihtÿj carôat to ampo piħho catia pejti atajê nō ton to hane? — hajÿr. Ne ajpēn mā me harēn itacwÿrjapê cute amji to me ipicapōn.

¹⁷ Mā hipēr Parixêw catêjê atajê te ahna mehcukij ne me cumã:

— Ca ate cute amã ato tûm caprār na amji jarēn, nejū mā mōrmō ca to amji kam gapac to? — hajÿr. Mā mecumã:

— Imã cupê Pahpām jarkwa to ihcakôc catêjê nōari — hane.

¹⁸ Mā Juta catêjê jō pahhi kwÿ te nee amji mā, jūm te into tûm caprār, mā hacpÿa mā irīt

na, amjimă me to hajÿr nare. Cwÿrjapê ri cute hÿm me inxi na mehăhwÿr, cute ahna mehcukij prămte.

¹⁹ Mă hÿrmă me cator, mă cute ahna mehcukij to:

— Xà me akra mă ita? Pê ca into tÿm ita na ihpÿm na me imă harê, nŏ na mă ajte ihtÿjrît? — hajÿr.

²⁰ Mă hÿm me inxi atajê me cumă:

— Wa cupê me ikra na ite me hahkre pej, ne pê into tÿamna ihpÿm.

²¹ Ne pom jÿm te caprăr, mă hacpÿa mă irît ita na ri, me ipê hahkre kêatre. Ne ramă ihkăhtu. Mehcukij, quê ha taa me amă amji jarê — hane.

²² Ampo na pê hÿm me inxi me cumă harên to hane? Nee mă ampo na nare. Quê ha jÿm te Jeju pê, por pê Crixto to Pahpăm awjahkre ata jarên pejti to harên na, quê ha ma cute me cuprôn xà pê me jÿm cator, quê ha jÿ caxuw hacpÿ ne amji jaxăr nare na, cute me hahkre pej. Na ri nee me kam mare măm cumă Jeju pê me pahkritxwÿ jarên xà impejti nŏ jarên nare.

²³ Cwÿrjapê pê me hÿpate hÿm me inxi me cumă harên to:

— Ramă ihkăhtu, mehcukij, quê ha taa me amă amji jarê — hane.

²⁴ Ne hipêr cute me hÿmre into tÿm ne hacpÿa mă irît ata na hăhwÿr, ne me cumă:

— Me imă ahêj jicu ne Pahpăm kam mare mă ampeaj kam me imă gÿjarên na amji to. Ampo na? He waite me Jeju kėanre na me hahkre pej — hajÿr.

²⁵ Mă into tÿm ne hacpÿa mă irît ata me cumă:

— Pÿpÿn, ipê Jeju kêanre ita na hahkre kêatre, ne ampopijakrut ita na ri imã amji jahkre pej he, mam ito tũm, newa itÿj ita caxuw rît — hane.

²⁶ Mã hacpÿ ma mã cute mehcukij to:

— Jũ mã ri cute aton ne amã ato tũm ita toimpej? — hajÿr.

²⁷ Mã hipêr me cumã:

— Wa ite ramã me amã amji jarên, ca ma ame ipar caca. Nemêr ampo caxuw mã ca hipêr ahna me icukij? Xà ca ha ajkĩ hanea ne amji to ihkôt me apa catêjê na me amã amji to prãm? — hane.

²⁸ Mã cute me hũn kam ihtêm, ne me cumã:

— He apêa ri ihkôt apa catê, ne me ipê ri Mojxe xwÿ teamji kam hapac xà kôt me ipa catêjê.

²⁹ Ne wa ite me Pahpãm te Mojxe xwÿ mã ihcakôc, necumã ampo to hahkre na me hahkre pej. Ne jũm xũmre ita, wanee ite jũ rũm cator na me hahkre pej nare — hajÿr.

³⁰ Mã me cumã:

— Pÿhàpà! Xãmte me apê jũ rũm cator xà ita na hahkre kêatre? Cakrô mã ihtÿj cute icaprâr, wa hacpÿa mã itÿj rît.

³¹ He me pahcunea mã Pahpãm te mehkên catêjê imparnare na me pamã hahkre pej. Ne por amji mã me Pahpãm cupa, ne me cumã, cute ampo na ihprãmti xà ton to me ipa atajê ri, ihtÿj quêt me kampa.

³² Ne cu rÿ jũ caxuw pjê te amji ton pê mã, me pahnô te jũm te jũm to tũam na ihpÿm ata caprâr na me harên parnare. Mã ihtÿj Jeju te icaprâr, ne imã ito to impej.

³³ Xà quê ajkĩ Pahpām ihkujahêc nare, quêihtỳj ajkĩ ampo itajê nõ to? Hãpà, ne imãa ampeaj kam ri Pahpām te ihkujahêc — hane.

³⁴ Mã cute mempar, ne me cumã harkwa to:

— Pê ca apỳm pê akên ton kam tễ, nõna mã ca ajte cormã me ipê pahhi catêjê mã ampo tohahkre prãm? Me ipê ahna ihkaj na! — hajỳr. Ne ma cute pō mã cute me cuprôn xà jũrkwa pê me into tũm atato cator. Cwỳrjapêquê ha nee jũ caxuw hipêr cute me cuprôn xà ata mã hàr nare.

Me cupê Pahpām te amji kam hapac xà jahkre kêatre atajê

³⁵ Mã Jeju te, cute me cuprôn xà jũrkwapê pō mã me hũmre ata cator na harên par. Na ri apu hapê ne ahna cator ne cute ihcukij to:

— Xà ca ha ajkĩ atỳj Pahpām kra to amji mã ahimpej? — hajỳr.

³⁶ Mã cute Jeju mã harkwa to:

— Ijō Pahhi, jũm pê mã Pahpām kra ita? Wa itỳj amjimã to ihmpej — hajỳr.

³⁷ Mã Jeju te cumã amji jarên to:

— Pom ca ipupu ita! He pa wa amã icakôc — hajỳr.

³⁸ Mã hũmre ata te Jeju kĩnte amji crire na Jeju mã amji jarênprãm to, cuna mã ihkôn krã na hỳr, ne cumã:

— Wa ha itỳj ato amji mã ihmpej — hajỳr.

³⁹ Mã Jeju te cumã hũjarên to:

— He wa nee mento tũm caprãr to pit mã pjê ita wỳricator nare. Ne ite mempej te amji kam me hapac xà me, mehkên te amji kam me hapac xà pupunprãmte wa icator. Ne wa itỳj mento

tũm caprã, mār quêhacpỹa mã me irĩt pej, ne ihtỳj me ampo cunea pupun to me ipa. Ita jĩkjê na mã wa itỳj me cumã Pahpãm te amji kam hapac xàto hahkre to ipa, mār quê me hahkre pej, ne ihtỳj ihkôtme ipa. Mã mehkwỹ ihtỳj, cute ramã me Pahpãm jarkwacunea jahkre pej na ame amji cãmjĩ, atajê pê ihhêj rũm mento tũm pyrãac. Ampo na? He nee cormã me cumã Pahpãm jarkwa jahkre pej nare, na wa ite me cuna mã icakôc to prãm to, wamehwỳr icator — hajỹr.

40 Mã curi me cahê na Parixêw catêjê kwỳ ihcuhhêatajê te me Jeju cukij to:

— Pỳhàpà! Xà mōrmō ajkĩ hanea ne me ipê mento tũampyrãac, ne me ipê Pahpãm jarkwa jahkre kêatre? Hãpà! He wa itỳj ite me Pahpãm jarkwa jahkre pej — hajỹr.

41 Mã Jeju me cumã:

— Quê ha jũm to tũm amji jarên to: “Me anõ itehcajpa, jũ wỳr wa ito tũm ita kam ahte mō” hane, ne me kam mare mã kre kam ihpỳm na, quê ha nee taa amji curê caxàr nare. Ne me apê Parixêw catêjê te neeme hajỹr nare. Me apê jũm to tũm te amji jahkre kêatre ata pyrãac. Ne ihtỳj irĩt na amji jarê, ne ma jũm te ihtehcajpar na apuihcaca, ne amjia kôt kre kam ihpỳm ata pyrãac. Ne ca me amji jarên to: “Ramã meimã Pahpãm jahkre pej” hajỹr cakrô, cormã me apê Pahpãm jahkre kêatre. Cwỳrjapê ca rỳ ate me amji curê caxàr ne me akên mã me axàr — hane.

10

Jeju pê me pajamār catê

¹ Mā Jeju te hipêr mehcunea mā harên to:

— Wa ha me amā ijūjarên xà nō ita jarê. Ca ha ihkôatme ijahkre pej. He Pahpām himpej xà atapê ihhêj rŭm kwÿc kam, cute me carà cahàcre hôhtijamār xà ata pyràac. Ne hÿrmā harkwa pyxıt peaj. Ne por quê ha jŭm nee carà cahàcre jŏ kwÿc jarkwa na hâr nare, ne ihtÿj intoj ne hâr ata pê ri me hàhkĭjxi, ne cupê me hàprêa kam me cupê ampo cwÿr catê.

² Ne por quê ha harkwa na axà ata pê ri carà cahàcre hôhti jamār catê.

³ Quê ha harkwa jihê rên catê caxwām pê jÿ ata ihtÿj cumā harkwa jihê mē, quê ha axà ne hŏ carà cahàc mā haprÿa na akij, quê ha ihtÿj hŏkre kampa.

⁴ Ne hÿrmā pra, quê ha ma kwÿc pê to cato, pŏ mā, ne ma mam cumā mŏ, quê ha ihtÿj ihkôt ĩpa. Ampo na? Ihtÿj hŏkre kampa na ri.

⁵ Ne jŭ wÿr quê ajteare mā jŭm kôt pra. Quê ha ma cama jŭ kam cupê pra. Ampo na? Jŭ wÿr quê cute jŭm cahkrit jŏkre par nare ne hahkre pej nare kam ihkôt pra — hajÿr.

Jeju pê Pahpām wÿr me pancjêj xà jŏ pry

⁶ Hŏ, Jeju te me cumā hŭjarên xà ita to hajÿr. Mā nee cute mempar ne me hahkre pej nare cormā, por cute me cumā ampo jarên xà ata na.

⁷ Cwÿrjapê ri hipêr Jeju te me cumā hŭjarên xà ita kôt harên to impej ne me cumā:

— Wa ampeaj kam me amā amji jarê. He ipê, por harkwa nacarà cahàcre incjêj xà ata pyràac.

Cwÿrjapê wa ha nee me hÿrmã me curê xwÿn cjêj na me hamãr, quê ha me hÿrmã mencjêj nare.

Jeju pê me pajō Pahhiti impeaj

⁸ — Ne por quê ha icumam ramã me pra atajê pê ri me hàhkĩjxi, ne me cupê me hàprêa kam me cupê ampo cwÿr catê, mã me ikwÿ pê carà cahàcrepyràc atajê te nee me hōkre par nare.

⁹ Ỡhÿ, ipê Pahpãm te me hamãr xà ata wÿr harkwa. Ne quê ha jũm ina Pahpãm wÿr axà ata, quê ha ampo kên cunea pê amji pytà. Quê ha cupê hō parxa pyràc ne ihtÿj acjêj ne hapôj, ne apu hàpànto ipa.

¹⁰ Ne ikĩnte me hàhkĩj xi atajê quê ha cama me hàhkĩj me, cute mecarà cahàcre hōhti curan ne me to hamre to prãm to, quê ha hÿrmã me pra. Ita jĩkjê na mã me ikwÿ curê xwÿn me hÿrmã pra, cute me to kênprãmte. Ne pa, wa quêt ajpên mehwÿr icator, cute catyt kam amji to meipijapar xà impejti cunea to me amji to ipijapar prãm to.

Jeju pê me pajamãr catê impejti ata

¹¹ — Ipê me ikwÿ pê carà cahàcre hōhti jamãr catê impeaj ata pyràc. Ne ipê cumã cute amji kam hapac xà jōr catê, na wa itÿjme hÿtãr prãmte ityc to prãm.

¹² Ne por ihpore na pit mã me hàpên catêjê atajê ikĩnte nee mecarà cahàcre jamãr to impejti nare. Ampo na? Caràcahàcti hōhti atajê pê nee me hō tekjê nare. Cwÿrjapê quê ha rop cahàc jàprêhti nō ihwÿr cato ne apu cucrà, quê ha cute me hamãrto kēanre atajêhÿpate nee me to amji japackre nare, ne me cumã hikra, ne ma ame

pra. Quê ha pea rop cahàcti jàprêhti ata carà cahàcre hôhti atajê kam tẽ, ne ihtỳj apu cucrà ne ihcura.

¹³ Ampo na? Ihpore na pit mã me apê, na rinee me cumã carà cahàcre hôhti jamãr to impejprãm nare.

Jeju me mehwỳ mã ajpẽn jahkre pej

¹⁴⁻¹⁵ — Ne ipê carà cahàcre hôhti jamãr catê impejti ata pyrãac naInxũ mã ijahkre pej, ne hanea ne imã Inxũ jahkre pej. Ita jĩkjê na mã ite hajỳar, ne imã me ikwỳ pê carà cahàcre jahkre pej, ne hanea ne me cumãijahkre pej. Na wa itỳj me hamãr to impejti to prãm to ityc to prãm.

¹⁶ Ne mehwỳ pê itekjê atajê, nee ite me hamãr xàita mã cormã mencjêj nare. Na wa itỳj hanea ne ajpẽn amji wỳr me to ijàhtêp prãm. Na wa ha me cumã akij, quê ha me ijökre kampa, ne mehwỳ me ina me cuprõ, ne ajkam me pyxitpeaj. Na wa ha ipê me hamãr catê pyxit peaj ata.

¹⁷⁻¹⁸ — Ne pê Inxũ ramã imã harkwa to: “Ca ha ate jũm te acuran na hamãr nare na, quê ha nee acuran nare. Nãmri ca ha ate cute acuran na amji na hamãr na, quê ha ihtỳj acura, ca ha atỳj hacpỹa mã atĩr. Xà caxuw wa iteamã icarôt cunea jõr, ne ate hajỳr xà na ri imã atoprãm” hane. Wa ite Inxũ jarkwa kôt hajỳr, cwỳrjapê ri cumã ikĩn — hajỳr.

Jeju to cute me amji kam hapac xà pijakrut

¹⁹ Mã Juta catêjê te me ita par, ne hipêr amji to meipicapôn.

²⁰ Ne me hàhtôa ne ajpẽn mã me harẽn to:

— Apu into kam waj! Ne kam ampo carō kên! Ampo kôt mã ca, cute me amã ampo jarên xà itajê na ame kampa? — hane.

²¹ Mã mehkwȳ ajpên mã me harên to:

— Jũ wÿr quê jũm kam ampo carō kên quê ihcakôc xà to hane! Xà quê ajkĩ jũm kam ampo carō kên quê ihtÿj jũm to tũm caprâr to hane? — hane.

Pê Juta catêjê kwÿ ma ame Jeju caca

²² Ne pê hacpÿa mã Pahpãm jũrkwa to impej xà jŏ amji kîn na, Jeju Krĩpinkrên kam apu mŏ, ta jŏ putwrÿa kam.

²³ Pê Jeju Pahpãm to amji kam me hapac xà jũrkwa jarkwa mã mencjêj xà cwÿrpê hãmkrã xà japrȳ te Xarômãw Jŏ Amkrã ata krac ri apumŏ.

²⁴ Mã Juta catêjê kwÿ te Jeju na me cuprŏn, ne ahna me ipixêr, ne cute mehçukij to:

— Ne rÿ pêa mã wa tee ate me imã amji jarên, wa ite me apar pej japê tee meakampa. Ne jũ caxuw ca ha me imã amji jarên to impej, wa me akampa ne me gahkre pej to impej? Ne me imã amji jarê, xà ampeaj kam riajkĩ apê Crixto pê, por pê Pahpãm me imã ato awjahkre ata mã ca? — hajÿr.

²⁵ Mã Jeju te me cumã amji jarên to:

— Wa ite ramã me amã amji jarên, ca nee ate ijũjarên xà ata kôt amji mã ito me ahimpej nare. Nepom wa Inxũ carôt kôt ijàpên xà pihho pejti ton to ipa itajê, hanea ne ihtÿj ito awjarê.

²⁶ Ca nee ajte ikam me gapac nare. Ampo na? Me apê me ikwÿ nare, na ca nee me ikam gapac nare.

27 Ne quêt me ikwỳ atajê pê carà cahàcre hôhti atajê pyràac, neipê me hamâr catê impejti atapyràac. Na wa ite ramã me ikwỳ pê me ijō parxa kwỳ pupunpejtu, mã ihtỳj me ijōkre kampa, ne ma ikôt me ipa.

28 Cwỳrjapê wa ha nee ampo te me to hamre na me hamâr nare, quê ha Pahpãmcahê na amji to me ipijapar rohnỳtti mã, ne nee jũ caxuw Inxũ pê me ipictornare. Ne jũ wỳr quê jũ caxuw ijũhkra pê jũm mehnō capa.

29-30 Ampo na? Por Inxũ te imã me hōr ata ri quêt mehcunea carôt jirōa pêcarôt tỳj, cwỳrjapê quê nee jũm hũhkra kam cupêjũm caxâr nare. Ne taa mã pê imã icarôt ita gō, na wa me ipipēan. Ne quê ha nee jũ caxuw jũm ijũhkra kam ipê jũm caxâr nare — hajỳr.

31 Mã hacpỹ ma mã Juta catêjê kwỳ te kên to me amji tỳj, cute me to capêr, ne me to ihcuran prãmte.

32 Mã Jeju te me cumã harkwa to:

— Wa ite me akam mare mã icarôat to ampo pejti pihho jàhtōa ne ton, por Inxũte ton xà na imã harkwa atajêa na. Ne mēr ampo pejti itajê nō incwỳrjapê mã, ca kên to ame ikam gũcapêr prãm? — hajỳr.

33 Mã Juta catêjê te me cumã:

— Wa nee ampo pejti itajê nō incwỳrjapê apu kên to meacapêr prãm nare, ne pom ca apu apê Pahpãm na amji toacakôc, ita to ca ramã apu Pahpãm mãn kēanre. Neihkĩnte apê me hũmrea to me hũmre, nō na mã ca ajte apu amji to Pahpãm to apa — hajỳr.

34-35 Mã Jeju te me cumã harkwa to:

— Pê Pahpãm me panguêtjê mã cute amji kam hapac xà me harkwa gō, pè me amã ihkàhhôc kam ihhôm. Cu me pahcunea teihkàhhôm ita kam ihhôm itajê nõ te ihhêj xi xà nõjarên nare na me pamã hahkre pej. Ne catyt kam ampeaj kam hũjarênrohnýtti mã. Ne pê Pahpãm me panguêtjê te me kamhapac xà caxuw me cumã ihkàhhôm ita gō, ne me cumã:

“Me apê me ikraa to me ikra, cwýrjapê ri me ate amji kam gapac xà me, iteamji kam ijapac xà pipëan” hane.

36 — Ne pa nare, pê Pahpãm icapi ne ajpên ikujate, ite ate me harkwa ita par na me atehcajpar xà caxuw. Cwýrjapê ri me panguêtjê jirôa pé icati. Na wa itýj ipê Pahpãmkra impeaj na amji to icakôm. Ne mër ampo na mã ca ame ikam acryc?

37 Nãmri wa ha ite Inxũ jàpên xà ton nare na, ca hanee me ikam gapac nare.

38 Nãmri wa ha ite hàpên xà ton na, ca ha atýj ite Inxũ Cati carôt kôt jàpênxà pihho ton ata kôt me ikampa. Ca ha ate ite me amãijũjarên xà to ijũjarên itana me ikam gapac nare cakrô, ca ha atýj, pom wa hàpên xà to apê itajê kôt meikampa. Ne ihkôat ca ha Inxũ me ipipëan, ne me ipyxit peaj na me ijahkre pej — hajýr.

39 Mã hacpỹ ma mã amehpro prãm cakrô, mã ma me hũhkrápê cator.

Pê Cõpijapjêr jõ cõ jĩkjêa kam Jeju apu mõ

⁴⁰ Ne ma Jeju te amji jaxàr, Còpijapjêr jŏ cò jĭkjê wÿr, măr pê curi Jowăw xwÿ ajco cò kam mehcumră ata ri. Ne curia apu ipa.

⁴¹ Mă me hàhtôa ne hÿrmă me ipa, ne ajpën mă meharën to:

— Pê Jowăw xwÿ pê me cumrăr catê ata, nee Pahpăm carôt kôt hàpên xàpihho pejti te hajÿrjê nŏ ton nare cakrô, pê ihcunea na ihtÿj Jeju jarën xà to harë atajê, ampeaj kam pê — hane.

⁴² Mă curi me hàhtôa ne cute me Jeju kam hapac, neamji mă me to ihmipej to me ipa.

11

Raxaro tyc xà

¹ Pê hÿmre nŏ ita japyr te Raxaro ita xà. Ne pêmekjêjê pê Marij me Marta mea mă krĭ jacot japyr teMehkênpupunxà jŏ krĭ ata kam mehkrĭ.

² Ne Marij ata pê amcro ata na Jeju par kam ampo cacôcuxwati ata jaxwÿ, ne ihkĭa to cumă încră.

³ Mă Raxaro kjêjê cahăj itajê te Jeju mă hÿjarënto hajÿr xà ata kujahêc he:

— Me ijŏ Pahhi, por amă gŏ ikwÿ nŏ kĭnti ataxà! — hajÿr.

⁴ Mă Jeju jÿpar ne cute harkwa to:

— Quê ha nee hıcu xà kam hà ita ihcuran nare. Ne hàata kôt quê ha me hàhtôa ne quêt ipê Pahpăm kra carôt tÿjti na meijahkre pej. Ne hà ata kôt quê ha me hàhtôa ne quêt me Pahpăm carôt tÿjti ata pupu ne amji mă me hÿpa — hajÿr.

⁵ Ne pê ihtÿj Jeju mă Marta me ihtŏj Marij ata kĭn, ne hanea ne cumă Raxaro kĭn.

⁶ Mā Jeju te Raxaro xà na harën par cakrô, curia hàhhuc xà ata kamapu mō, ne apu ihkên, ne ahna amcro pijakrut.

⁷ Jirô pê mā ri cute me ipê ihkôt me ipa catêjê mäharkwa to:

— Hacme, hacpỹ mā Juta jō pjê wỳr — hajỹr.

⁸ Wa me cumã:

— Me ijō Pahhi, mār curmã curi Krĩpinkrên catêjê kên to ame acapêr prãm ta? Ca ajte ramã hacpỹa mā amji jaxàr prãm? — hane.

⁹⁻¹⁰ Mā Jeju me imã:

— Nee ita na cute imã jũ mãn nare, ne jũ wỳr quê jũ na me ito. Pom ca me pyt pupu, mā hapôj ne ma acjêjmã caxwa ata jĩkjê na ri ite hajỹar. Ne wa cormã iteijapên xà jipêj nare kam, quê nee jũ na me iton nare. Ne hanea ne cu caxwari me papa, ne pahťyj me papihur to ame papa. Ne pom pyt me pamã ahcujro, cu kam ame papa, ne me pamã papa xà jahkre pej, ne nee amepapihur, ne me pahkên mā me pancjêj nare. Ita jĩkjê na mā Inxũ te ito hajỹar. Mā Pahpãm teikrã kam imã ite amji jahkre pej jōr, cwỳrjapê ri imãampo te amji kam hapac xà cunea jahkre pej, na wa nee ikênmã icjêj nare.

¹¹ — Me pajō ikwỳ nō Raxaro ramã nō ne apu gōr cakrô, wa ha itỳj ihcujrō ne hỹr — hane.

¹² Na wa me cumã:

— Pahhi, quê ha cute nō ne hôt na, quêt taa nō ne gōr, ne amji cajpê. Ampo na? He cormã me hỹrmã me pahcator xà ita ampỹa mā — hane.

¹³ Ne pê tee Jeju ame imã ramã Raxaro tyc na harën tohahkre, na wa itỳj amji mā me to hōtxwa mā hôt na amji mā ame to hane!

14-15 Mã Jeju hirãa pê me imã:

— Ramã Raxaro tyc, ne me acwÿrjapêa ri, ampeaj kam hūrên ijakry. Quêt taaty, wa nee curi apu imōr nare na ri ihtyc. Ne ihkôat ca ha atÿj ito amji mã me ahimpej. Hacme, ne me hōmpu — hane.

16 Mã Tome ita me imã:

— Hacme, me pajō Pahhi kôt, quê cuxà me pajipej — hajÿr.

Jeju pê me pahto ihtir catê

17 Mã ramã cute kên kre kam me Raxaro jarêt na amcro te cwat, wa Jeju me, me icator.

18 Mã Mehkênpupunxà jō krī ata ri rec pyxit jīkjê kam xa, Krīpinkrên wÿr.

19 Cwÿrjapê pê Juta catêjê hàhtôa ne me cato, cute me Marta me Marij pupun, ne me cupê hūjapê cutor prāmte.

20 Mã Marta te Jeju te ajpên hàhtêp to mōr na harên par, ne ma hÿrmã tē ne cute pry kôt ihcajpar. Pê Marij curia ikre kam jÿ.

21 Mã Marta Jeju mã:

— Ijō Pahhi, ca ha ita ri apu mō na mã, quê ha neeikjê ipê ihtyc nare, ne ramã ihtyc, ca hakàn pê acator.

22 Cakrô ca ha ahnaa Pahpãm na ahwÿ, quê ha amã ateampo cunea na gâhwÿr xà atajê gō — hane.

23 Mã Jeju cumã:

— Quê ha akjê ihtÿj hacpÿa mã me amãihtir — hane.

24 Mã Marta cumã:

— Quê ha ampo cunea jamre xà ata jŏ amcro kam ihtÿj hacpÿa mã ihtÿr na, imã hahkre pej — hane.

²⁵ Mã Jeju cumã:

— He ampeaj kam ri, ipê hacpÿa mã mehtyc to ihtÿr catê. Na quê ha jÿm te ihkên ton to ipa na, quê ha ramã Pahpãm mãa jÿm ata tyc pyrác. Cakrô quê ha ito amji mã ihhimpej na, wa ha cumã cute amji kam hapac xà tuw pejtì gŏ, quê ha Pahpãmmã jÿm ita ihtÿr rohnÿtti mã.

²⁶ Ne por jÿm ito amji mã ihhimpej to ipa ata, quê hanee jÿm ata ihtyc ne ihtyc tu nare. Ne ca? Xà ca ha ajkÿ pijamã ijÿjarên xà itato amji mã ahimpej? — hane.

²⁷ Mã cumã:

— Ÿhÿ ijŏ Pahhi, wa itÿj apê Pahpãm kraa to ihkra naamji mã ato hane, ne imãa apê Crixto pê, por pê Pahpãm pjê ita kamate me ito ahimpej xà na ato awjahkre ata mã ca — hane.

Pê Marij pê Raxaro tŏj Jeju cajpa

²⁸ Jirô pê mã ri Marta te amji jaxàr ne ihtŏj mã hàkjêr ne kyre pê cumã hÿjarên to:

— Pajŏ Pahhi cator ne cute ana hàhwÿr — hajÿr.

²⁹ Mã Marij te harên par, ne hãm pyrentu, ne ma Jejuwÿr tê.

³⁰ Pê nee cormã krÿ mã hàr nare, ne cormã Martaihcajpar xà ata kam, curia pry kam apu mŏ.

³¹ Ne pê ramã hŏtpê Juta catêjê kwÿ ikre kamame ipa, cute me Marij jÿjapê tète me cumãn prãmte. Ne cute me Marij xãm na me

hōmpun, mā hūjarêan kam hām ne ma tē, mā ma ihkôt me pra. Ne pê ihtÿj cute kre wÿr ihtēm ne kam apu incwÿr na amji mā me to hane.

³² Mā Marij Jeju wÿr cator, por curi xa ata ri, ne ihpar cahê na ihkôn krā na hÿr, ne cumā:

— Ijō Pahhi, ca ha ita ri apu mō na mā, quē ha neeikjê ipê ihtyc nare, ne ramā ihtyc, ca hakàn pê acator — hane.

³³ Mā Jeju te Marij cwÿr na hōmpun. Ne hanea ne cuteJuta catêjê kwÿ incwÿr na me hōmpun. Ne hōtpê ahna incrycre, ne cumā amji kīn nare.

³⁴ Mā cute mehcukij, ne me cumā:

— Mēr jō ri ca ate me hir? — hajÿr. Mā Marij cumā:

— Ajpên mō ne hōmpu — hane.

³⁵ Mā Jeju te ahna kēn kre pupun ne apu kam amrā.

³⁶ Mā Juta catêjê me ajpên mā:

— Me hōmpu he, cumā Raxaro kīan to ihkīn na mā apu kamamrā! — hane.

³⁷ Mā mehkÿ me harēn to:

— Hōtpê cute into tūm caprār, ne quē rÿ mā Raxaro tyc xwÿjrea na jū na to, quē ha nee ihtyc nare. Nehamre ramā ihtyc, ne jū mā mā quē ha to? — hane.

Pê hacpÿa mā Raxaro tīr

³⁸ Mā hipêr ahna Jeju crycre, ne cumā amji kīn nare, mā ma kēn kre wÿr tē, ne cute kēn kre jarkwa pupun, mā kēn nōa te kre ata jarkwa jihê, Juta catêjê te amji jarêt xà ata kôt.

³⁹ Mā cute kre na harkwa hyr to:

— Me kēn te kre jarkwa jihê ita capa — hajÿr. Mā Raxaro kjê pê Marta ita te cumā harēn to:

— Ijō Pahhi, ramã harêt na amcro te cwat ita kam ramãihkro — hajÿr.

⁴⁰ Mã Jeju cumã:

— Xà wa ite curmã me amã amji jarën to: “Ca ha ate me ipar na, ca ha atÿj me Pahpãm carôt pupu” hajÿr nare? — hane.

⁴¹ Mã cute me kën kre ata jihê mën. Mã Jeju kàj mã irīt ne cute Hũm mã harkwa to:

— Inxũ, wa hōtpê amã icakôc, ca atÿj ikampa pyrên riijakry.

⁴² Ampo na mã wa ite icakôc xà ita ton? He me hàhtôti atajê mã wa ite icakôc xà ita ton, mã cute me ipar. Ne ate ikujahêc na me ijahkre pej to prãm to wa ite me cumã hajÿr — hajÿr.

⁴³ Ne cute hũjarën to hajÿr jirô pê mã ri cute Raxaro mã hàkjêr to:

— Ikwÿ nõ Raxaro, ajpên pō mã acato! — hajÿr.

⁴⁴ Mã por Raxaro tyc ata tĩr pyrentu. Mã cupêhkà te ihpar me hũhkra cunea cajpre ita kam, jũ wÿr quê mōr pej, na ri ajpên pō mã toamji rën to mō. Mã hanea ne ihkuc na hê. Mã Jeju te ame hōmpu atajê mã harkwa to:

— Intête me cupêhkà te ihcupu ata pō, quê ihtÿjtê — hajÿr. Mã cupê ipôt par, mã ma pō mã tẽ.

Jeju cuna mã mencaca xà kêanre

⁴⁵ Mã Juta catêjê jàhtôa ne me Marij pupun to mōatajê, te me Jeju te Inxũ carôt kôt hàpên xà piho pejti ton ata na mehōmpun, ne ihtÿj amji mã me to ihmpej pyrentu.

⁴⁶ Ne mehkwȳ te nee me haj̄yr nare, ne ma cute me amji jacjên, ne Parixêw catêjê mã, Jeju te ampo tonxà atajê na harên.

Pê Jeju curan na, me curê xwỳn me ajpên pa

⁴⁷ Mã Parixêw catêjê me, cute Pahpãm mã mehcajrên catêjê jō pahhi me, cute me cuprôn, prohti kam catêjê me, ne cute me ajpên par, ne me ajpên mã:

— Ampo to mã cu ha ajte me? Nãmri jũm xũmre itacarôt catia to hàpên xà pihho pejti pit ton to mō.

⁴⁸ Cu cama ahna me hamã, ne nee intête mehcahpêrkâr nare, quê ihtỳj me cumã ton to mō, quê ha mehcunea ahna me hõmpu, ne me kampa, ne ihkôat meamji kampa. Quê ha Roman catêjê jō pahhi me hõmpu, neihtỳj hacpỹa mã me pahna apkjê, ne me pahkam tẽ, ne mepapê Pahpãm to amji kam me hapac xà jũrkwa pytà, neame pajō krĩ to kêanre ne — haj̄yr.

⁴⁹ Mã caku ata na Cajpa ata pê Pahpãmmã cute mehcajrên catêjê jō pahhiti. Na ri cute harkwa to:

— Pỳhàpà, ajte me acunea pê amji jahkre kêatre!

⁵⁰ Ne imãa ite amji kam ijapac xà te haj̄yr he. Quê ha jũm xũmre pyxit peaj nety, cu ha nee me pahcunea me pahtyc nare. Nãmri quêha pyxit peaj te ihtyc nare na, cu ha me pahcunea me pahhi tu. Cwỳrjapê ri Jeju pyxit peaj ne ihtyc xà — haj̄yr.

⁵¹ Ne pê Cajpa ihcakôc xà ata kam, nee amjia kôtihcakôc nare, Pahpãm pê cumã ihcakôc xà ita tohahkre. Ne pê cupê Pahpãm mã cute

mehcajrën catêjêjō pahhiti. Cwÿrjapê pê Jeju te Juta catêjê cuneaïncwÿrjapê ihtyc na, me cumã amji jarê.

52 He nee mã Juta catêjê incwÿrjapê pit mãihtyc xà nare. Ne pjê cunea kam, mehcunea pê Pahpãm kraame ipicràn atajê to cute cuprôn, ne me to pyxitpeaj prãm to, quê ha ihtÿj ty.

53 Ne amcro ata kam cute me Jeju curan prãmte pê me cupê Juta catêjê jō pahhi kwÿ cunea ahna me ajpën pa.

54 Cwÿrjapê pê nee Jeju hirã pê ajco apu Juta jō pjê kam ipa nare. Na wa ma, por pō na pire mã, pjê kam pō kam me hamreare ata wÿr Jeju me, me mō, por Pïxôhrôt jō pjê ata wÿr, necuria wa me ijàhhuc.

55 Ne pê ramã amcro încrêre me Hakren xà jō amji kÿnwÿr. Pê amji kÿn ata xwÿjrea na Juta catêjê jàhtôa ne Krîpinkrên wÿr me cato, cute ame ampo kên ton atajê to me hapac kêt, ne ame amji cÿmpej. Ne amji kÿn ata na mempejti na ame ipa xà caxuw.

56 Ne pê mehcunea ame Jeju japên to me ipa, ne ajco ahna ame ajpën cukij, Pahpãm to me amji kam me hapac xà jÿrkwa kam. Ne me ajpën mã:

— Pÿhàpà, mōrmō quê ha ajkÿ ihtÿj ajpên Jeju amji kÿn ita wÿr mō, nare, quê ha nee mōr nare? — hajÿr.

57 Me Pahpãm mã cute mehcajrën catêjê jō pahhi kwÿ me, me cupê Parixêw catêjê kwÿ me, cute me Jeju jaxàr na me ajpën par. Cwÿrjapê ri cute ahna meharkwa, quê jÿ ri jÿm hōmpu, ne

uua ne me cumã harẽ, por jũ ri apu mŏr xà ata ri.

12

Pê Marij Jeju par kam ampo cacô na hĩ jàhwÿrti ata jaxwÿ

¹ Ne ramã me Hakren xà jŏ amji kĭn wÿr amcro te xêj, wa ma Jeju me, Mehkênpupunxà jŏ krĭ wÿr me mŏ. Por pê curi hacpÿa mã Raxaroto ihtĭr mã ihkrĭ ata ri.

² Mã cute Jeju te hacpÿa mã Raxaro to ihtĭr na me toamji japackre, ne amji mã me to catia to prãm to ri, cute me cumã hŏ ton. Mã Marta apu mehtehcajpa, mã Raxaro me cahê na me hàpan xà na jÿ.

³ Mã Marij te ampo cacô cuxwati atajaprÿ te nartô cacô te rit cahti na hajÿr ata pyr. Ne pê ampeaj kam nartô cacô ata na hĩ ahwÿ. Mã cute Jeju par kam haxwÿr, ne ahna haxwÿr partu ne cute to cumã ihpar cuhhŏn, ne ihkĭa to cumã incrà, mã ikre cunea cuxwaa to cuxwa.

⁴ Mã me ikwÿa nŏ pê Juta Carijot te cormã Jejukên mã mên catê ata te harkwa to:

⁵ — Pom ampo cacô ita na ihpore jàhtô na cute xêj crê, ne cupê caku pyxit jàpên xà jŏ pore. Ne mër ampo na mã cama cutehaxwÿr, ne nee cute ihpore na to hàpan ne imã hŏr, wa ite me cupê hamreare atajê mã hŏr nare? — hajÿr.

⁶ Ampo na pê Juta Carijot ihcakôc xà ita to hane? Nee mã pê ampo nanare. Pê hàhkĭj xi, na pê harkwa ita to hane. Pê neecute me cupê hamreare atajê tehcajpar prãmte harkwa ita to hajÿr nare. Pê ajco me cupê me hŏ pore incjên

xà cwa, ne ajco me cupê ihpore to ahkĩ na pê. Pê ramã hàhkĩj ita to amji pyràc tu.

⁷ Mã Jeju te cumã harkwa to:

— Quêt taa Marij ito hane! Cute ijarêt xwỳjrea na ramã icuxwa, me panquêtjê te amji ton xàa kôt.

⁸ Ne me cupê hamreare atajê, quê ha hõtpê ame ipame acahê na. Ne pa nare, wa ha nee ame acahê na imõrkam to icrà nare — hajỹr.

Pê Raxaro curan na me hõ pahhi kwỳ ajpẽn pa

⁹ Mã Juta catêjê jàhtôti atajê te meJeju te Mehkênpupunxà jõ krĩ kam apu mõr na me harẽn par. Ne ma curi me cator. Ne nee pê Jeju pit wỳr me mõr nare, ne Raxaro me ajwar hỹrmã me mõ, por hacpỹa mã Jeju te to ihtĩr ata.

¹⁰ Mã hamre, Pahpãm mã cute mehcajrẽn catêjê jõ pahhi kwỳ te meajpẽn par, ne hanea ne ihtỳj me Raxaro curan prãm. Ampo na? Nee mã ampo na nare.

¹¹ Pê Juta catêjê jàhtôa ne Raxaro tĩr xà ata kôt, me hõ pahhi mãme hikra, ne Jeju to amji mã mehhimpej to me ipa na pê.

Pê me hakrya kam, Krĩpinkrên mã Jeju axà

¹² Ne amcro ata na, pê me hàhtôa ne me Hakren xà jõ amji kĩn na ame ipa. Ne cute me Krĩpinkrên wỳr Mehkênpupunxà jõ krĩ pĩn Jeju mõr na me harẽn par.

¹³ Ne cute me ampo hô pê crowràti hô pyràcti ita to me amji tỳj, ne ma hỹrmãme to pra, cute me to ihcajpar prãmte. Ne me to ihcajpar, ne me hakryte cama cumã ame to hàpêr to me ipa, ne ame cumã caràr to:

— Pahpām cati ne impej! Pahpām ri me pahwÿr mō! Pahpām te amji japrya na mepahwÿr me pajō Pahhiti kujahêc! Me imã Pahpām te me pajō pjê to ihhimpej na to prām! — hane.

¹⁴ Mã Jeju cawrô cahàcre nō ita na cator, ne kam hÿr ne to mō. Por ahnaa rÿ pêa mã ramã Pahpām jō kàhhôc kam harên to:

¹⁵ “Krîpinkrên pê Xijāw jō hàpkàjti me, ca kam me akrî atajê, ca hanee hipêr amji mã ame ampo cupa nare.

Nāmri ramã ajpênme gō Pahhiti cawrô cahàcre intuwre nō kam hÿr ne to mō he” hane,

mã ahnaa.

¹⁶ Ne amcro ata kam pê wa nee me ipê ihkôt me ipacatêjê nō ampo atajê nō kam ijapac, ne hahkre pej nare. Mã Jeju tyc, ne hacpÿa mã ihtîr, ne ma Pahpām wÿr hàpir, wa cormã ite me ita toamji japackre, por ramã ampo te to hajÿr xà ata na Pahpām jō kàhhôc kam ahna ihhôc ata to. Na pê ihtÿj to hanea to hane.

¹⁷ Mã me hàhtôa ne Jeju kôt me mō, mã me kam maremã cute carôt tÿjti to Raxaro mã hàkjêr, ne hacpÿamã to ihtîr ata na, cute me hōmpun catêjê te ihtÿj meharên cràn.

¹⁸ Mã me hàhtôa te me harên par, na ri ma mehcajpar to me mō.

¹⁹ Mã Parixêw catêjê kwÿ ajpên mã me harên to:

— Me hõmpu he, wÿr cu ame amji mã hamã ne intête mecuta. Ne ramã pjê cuneapîn mehcunea ihkôt ame ipa — hane.

Cu ha mam pahte me amji kam me pajapac xà kên ita mã hikra

²⁰ Ne por Krîpinkrên wÿr, amji kîn wÿr me mō atajê kôt hõtpê Crec jō pjê catêjê kwÿ me mō.

²¹ Atajê ma me ikwÿa nō japry pē Pirip ata wÿr me pra. Ne Pirip ata pē Tep jō krî kam Hîpôjajo jō pjê kam me xa atajê jō xūmre nō. Mã cute ahna me hàhwÿr, ne me cumã:

— Jeju pupun prãnte wa me mō — hajÿr.

²² Mã Pirip hō ikwÿ nō Antre wÿr tē, ne cutecumã hūjarēn, ne ma ajwar Jeju wÿr me mō, ne me cumã:

— Crec catêjê kwÿ cator, ne ame amã ihcakôcto prãm — hane.

²³ Mã me cumã:

— Ipê me Ahàkà, ne ipê, por pē côjkwa kam amji to incire ne hūmrea na amji to, ne me awÿr wrÿ ata. Ne hamre ramã ite hacpÿ mã amji jaxàr, ne icati ta to, icati xàa kam ramã hàhhuc to mō.

²⁴ Wa nee ame amã ihêj nare, ampeaj kam wa me amãawjarē. Quê ha pjê kam jūm ampo hy kre, quê ha cute amji to ipixô nare na, quê ha nee kam hiprāj ne ihhy nare, ne ihhy atapit cormã nō. Nãmri quê ha cute me hãmîr na, quê haamji to ajxô ne kam hiprāj ne ihtÿj kam ihhy hàhtôa tohàhtô. Jîkjê na mã ite hajÿr. Wa ityc ne amji jarêt nare na mã, waha nee hacpÿa mã me acunea to atîr nare.

²⁵ Jîkjê na mã me acunea te me hajÿar. Ca ha me amã mam ate amji kam me gapac xà kên tūm

ata kĭn, ne me amã hapêti na, ca ha nee me amji mã intuw pejti ita nõ pyr nare. Nãmri ca haate mehcaca, ne me cumã hikran na, ca ha hirôa pê me amji mã ate amji kam me gapac xà tuw pejti ita py. Ata quê ha me amã irya to iry, caha cõjkwa kam Pahpãm cahê na ame apa rohnÿtti mã.

²⁶ Ne quê ha jũm te ikôt amji ton, ne imã hàpên prãm na, quê ha jũm ata ipynã, ne ikôt amji to. Ne wa ha jũ ri apu mõi, quê ha hanea ne ikôt imã hàpên catê apu mõi. Quê ha Inxũ pê Pahpãm, por jũm imã apê ata to impejti ne.

Pê Pahpãm Jeju pê ihkra na harê, cõjkwa pĭn

²⁷ — Wa ita kam imã amji kĭn nare catia na ite amjicajpêr. Ne jũ mã wa ha ajte? Xà wa ha ajkĭ amji mã Inxũ na ahwÿ ne cumã: “Inxũ, itête ampo kên te ito jũ mãn xà itacamê” hane? Hãpà, jũ wÿr wa ha cumã ijarkwa to hane, he ita caxuw wa icator, pjê ita kam — hajÿr.

²⁸ Ne cute Hũm mã:

— Inxũ, imã ate amji mã gaprÿ to catia to cati na atoprãm — hajÿr. Mã cõjkwa pĭn jũm jõkre ita tecumã:

— Wa ramã ite to cati, ne wa ha cormã hipêr itÿj to cati to mõi — hajÿr.

²⁹ Mã me hàhtôti atajê te me hõkre ita par, ne mehkwy ajpên mã me harên to:

— Pahhàjê jàwrãrãc mõrmõ — hane. Mã mehkwy amji mã me to:

— Cõjkwa kam Pahpãm jarkwa to imprar catê nõ te cumãihcakôc — hane.

³⁰ Mã Jeju te me cumã harên to:

— Nee mã icwỳrjapê jũm jŏkre ita cakôc nare, meacwỳrjapêa ri hŏkre ita cakôc. Ampo na? Ate me hŏkrepar xà ata kôt ca ramã ate Pahpãm teihtỳj ikam hapac na, me ijahkre pej.

³¹ Ne ramã pjê cunea kam ame icurê catêjê cukij ne mehkên mã me hàr xàa kam ri hàhhuc. Ne por me pahcurê xwỳn pê Xatanaj pê pjê kam me toihhimpej catê ata, quê ha Pahpãm mentête hũrê. Quê hanee hipêr me kam ihhimpej nare.

³² Quê ha pĩ na me ixô, ne kỳj pê ina me hãm, wa ha kam ityc to imŏr me ajkaam amji wỳr me hàhtôa ne me to apkjê, mār quê ito amji m̄aihhimpej to me ipa — hajỳr.

³³ Ne hũjarên xà ata to pê ajco cute jũ mã mehcuran xà ata to amji jarên to ipa.

Jeju te amji kam hapac xàa to me papa xà

³⁴ Mã me hàhtôti atajê te me Jeju kam hapac ne me cumã:

— Pỳhàpà! He wa ijŏtpê hãn ne me Mojxe xwỳ jŏ kàhhôc cahyt, nekam me, por pê ramã Pahpãm me pamã jũm te jũ caxuw me pahto ihhimpej xà to me pamã awjahkre ata jarên par. Ca ajte cŏjkwa pĩn me hũmrea na ate amji ton, ne awrỳc ne apu apa na, me imã amjijarê. Cwỳrjapê ri apê ihhêj rũm, por pê Pahpãm jũm to me pamã awjahkre ata. Ne quê ha apê Pahpãm te ato hũjahkre ata mã impàràpên, ca haatyc nare, ne me icunea to ahimpej kam acrà tu ne, ne jũ caxuw atyc xà nare. Nŏna mã ca ajte, cute me acuran ita na amjijarê ita kam, me icunea pê gahkre kêatre. Na ca ha hirãa pê me imã apê jũm te cŏjkwa pĩn me hũmrea na amji

jahkre ne iwrȳcita na amji jarē, wa me gahkre pej — hajȳr.

³⁵ Mā Jeju me cumā:

— He cormā nee ate me ite me amā ampo jarēn xà itajê cunea par xà hamreare, ne jūa caxuw ca ha cormā me kampa ne me hahkre pej. Ne me ijūjarēn xà ita kampa ne mehkôt hakop. Ne me hōmpu he, cu ha hāhcujro xà nō to ampo cujro, ne hōmpun kēnre nare, quē ha ampo kēanre na, cu ha me hōmpu ne me hahkre peypyrentu. Na ri ipē hāhcujro xà nō ata pyrāac. Na wa ha ihhēj ne me acujro, ne me amā ate amji kam me gapac xà pupu, mōrmōajkī impej, nare, mōrmō ajkī ihkēanre. Na ca haihkōat amji mā ate amji kam me gapac xà jahkre pej. Ampona? He wa ha nee ita ri me acahē na apu imōr kam to icrā nare, ite me amāijāhcujro xà caxuw. Na wa ha ita ri cormā apu imōr kwyakam, ca ha amji mā ate amji kam me gapac xà to antuw, ne me to intuw. Nāmri quē ha ahtūm nare wa ha ma me apē tē, quē ha me apē awcapàtkô, ne jū mā ca ha me, ne ite me atehcajpar nare kam, ame amji māhamā? Ne jū mā ca ha me amji mā me ate amji kam me gapac xà to meantuw? Wyr̄ ca ha ame amji mā hamā.

³⁶ Nāmri ca ha ate amji mā me ito ahimpej na, ca hagāhcujro jarwrȳhti ita na me akrī, ne icuxà jūmjê kwý cujro, mār quē cute amji kam me hapac xà to me antuw — hane. Hō, Jeju te me cumā ihcakôc xà to hajȳr, ne ma tē, ne me cupê ipimxur.

Pê me hàhtôti atajê nee amji mā me Jeju to

ihhimpej nare

³⁷ Ne pê ramã me kam mare mã Pahpãm carôt tỳjti ata to hàpên xà pihho catia to, pê me hõmpu cakrô, nee me kam hapac ne amji mã meto ihhimpej nare.

³⁸ Na pê Ixaj xwỳ pê Pahpãm jarkwa to ihcakôccatêjê nō ata ramã ita na ihhōc to hane he:

“Yhỹ me ijō Pahhiti, ca ate me cumã acarôt tỳjti ata to apipẽ,
ne to gápên xà catia ton na ite me cumã garẽn cakrô,
mã nee jũm te me ipar nare” hane.

Hõ, ita na pê Ixaj xwỳ ihhōc, mã ahnaa cute.

³⁹ Ampo na? He mehkwỹ amjia kôt ma amempar caca, na pê Ixaj xwỳ me ahna ihhōc to hane he:

⁴⁰ “Pahpãm te cute ampo pupun cupate, ihhêj ne me to into puror, ne cute mempar cupate, ihhêj ne me to me hapacture.

Cute amji kam hapac xàto me ipintuw ne hỹrmã amji to me ipipkjêr, mãcute me to impej cupate” hane.

Hõ, pê ma ame Pahpãm parcaca, na pê me to hane.

⁴¹ Ampo na pê Ixaj xwỳ ihhōc to hane? Nee mã ampo nanare, pê ramã mam rỳ pêa mã Jeju te carôt tỳjti to ampo catiato hàpên xà ata na me hõmpu, na pê ahna ihhōc to hane.

Pê pahhi kwỳ cupate, nee ame Jeju jarēn pejti to me harēn nare

⁴² Mā me hàhtôa ne nee me Jeju par nare cakrô, mā Juta catêjê jōpahhi kwỳ te hōtpê mempar. Ne nee cute mekam mare mā, amji mā me Jeju pejti na me harēn nare. Ampona? Nee mā ampo na nare. Parixêw catêjê te cute mecuprôn xà intête, pō mā me hapôj mā hipêr na mencjêj nare cupate.

⁴³ Ne me cumã Pahpãm te mempejti na me harēn na ihkīn nare, nê ajte me cumã me hũmre te mempejti na me harēn na, amji to prãm.

Pê Pahpãm Jeju mā ampo to hahkre atajêa to ri, me cumã hahkre

⁴⁴ Mā Jeju te ihkrāhhia kam mehcunea mā hũjarēn to:

— Quê ha jũm te amji mā ito ihhimpej na, quê ha neeipyxit peaj ne amji mā ito ihhimpej nare. Quê ha cute ito amji mā ihhimpej me ajkaam, por cute ajpên ikujahêc ata to hanea ne amji mā ihhimpej.

⁴⁵ Ne hanea ne, por jũm ipupu ata, ramã ajpên cuteikujahêc catê ata pupu.

⁴⁶ Ne pjê ita kam cute me amji kam hapac xà kêanrejãhtô, ne me cupê cute amji to me ipintuw jahkre kêatre. Na ri ihhêj ne awcapãtkô kam ame ipa. Na wa ihhêj rũm ipê mehcujoyxà, ne me hỹrmã icator, ite cute amji kam me hapac xà to ipintuw ne ihhêj ne awcapãtkôti to mentêtehamre xà caxuw. Na quê ha jũm te amji mā ito ihhimpejna, wa ha itỳj cumã cute amji kam hapac xà to antuw.

47-48 — Ne por ma ame icaca atajê me, ma apu ite mehapackre xà itajê caca atajê, quê ha ihtÿj jũ caxuw hahpan xà na Pahpãm mã meamgõ. Ne pa nare, wa nee ite me hũhkra kam ijãmcwÿr xà caxuw pjê ita wÿr icator nare. Quêt ite me to impej nê mehkên catia pê mehÿtâr xà caxuw wa icator. Ne pom wa me cumã icakôc xà ton to ipa itajê, quê ha me ahna ahwÿ, quê ha, por jũ caxuw ampo cunea jamre xà ata kam, ihtÿj me cumã amgõ.

49 — Ampo na? Inxũ rũm ri ajpên icakôc xà itajêimã pra. Na wa Inxũ te ampo to, ite icakôc xà nairên atajê to pit mã, me cumã icakôc to ipa. Wa neeamjia kôt icakôc to ipa nare.

50 Na quê ha jũm te icakôc xà atajê kam hapac, ne toamji mã ihhipej na, quê ha Inxũ cahê na amji toipijapar rohnÿtti mã. Caxuw ri, Inxũ te imãite to ijũjarên xà itajê jôr — hajÿr.

13

Pê Jeju ihkôt me ipa catêjê mã ihpar cuhhõ

¹ Pê ramã me Hakren xà jõ amji kîn jõ amcro wÿr amcropÿxit peaj ne nõ. Pê Jeju te ihtyc, ne pjê ita rer, ne mahacpÿ mã cõjkwa wÿr, Hũm wÿr cute ihtêm jõ amcro ramã hàhtêp na, cumãhahkre pej. Ne pê hõtpê cumã pjê kam me cupê mehõ tekjê atajê kîn, ne cumã mehkian to mehkîn ita na mã ahnaa ihtyc xà ita mã cute to hahêr. Mãcute me ikinti ita to me imã hahkre tohajÿr he.

² Wa Jeju me, me ipê ihkôt me ipa catêjê me, ramã caxwa xàa kam, meikrĩ ne ame apà. Pê

ramã caxuw mepahcurê xwỳn pê Xatanaj ata me ikwỳ nõ japrỳ pê Juta Carijot ata mã, cute amji kam hapac xà kêanre ata jŏr, mã ihkôt aracri cute Jeju kên mã mên xà caxuw.

³ Mã Jeju te, Hũm te cumã carôt cunea jŏr na, cumã amji jahkre pej. Ne hanea ne cumã Hũm pĩn cator, ne quêha hacpỹa mã hỹrmã api na, cumã amji jahkre pej.

⁴ Cakrô mã hãm ne cute ihkà ata caxàr, ne cutecupêhkà nõ ita to amji cahti na hê.

⁵ Ne cute crat nõ ita kam cô kwỳ mên, ne ahpỹanre na kam me imã me ipar cuhhõn kam ihtêm. Ne ihcuhhõ ne ma cupêhkà ata to me imã incrà.

⁶ Ne ma Ximãw Petrô na to cator, mã cute Jeju cukij to:

— Pỳhàpà ijŏ Pahhi, pom ampeaj kam acati ita, nõ na mã ca ha ajte me ipar cuhhõ? — hajỹr. Mã Jeju te cumã harkwa to:

⁷ — Ca ha nee ita kam ampo caxuw ite amã apar cuhhõn xà ita jahkre pej nare, ne jũa caxuw ca ha hahkre pej. Na ca ha ito tojnõ wa amã apar cuhhõ — hajỹr. Mã Petrôcumã:

⁸ — He apêa ri ijŏ Pahhi, na wa ha nee ate imã ipar cuhhõn ita na ato tojnõ nare — hane. Mã Jeju cumã:

— Wa ha ite amã apar cuhhõn nare na, ca ha nee hipêr apê ikôt apa catê nare — hane. Mã Petrô te ahna hàhwỳr to:

⁹ — Ijŏ Pahhi, mêr imã ipar pit cuhhõn nare, ne hanea ne imã ijũhkra me ikrã cuhhõ! — hajỹr.

¹⁰ Mã Jeju cumã:

— Hamreare, nee mǎ gǐ cunea xwỳr xà nare, ne apar pitcuhhōn xà. Por ramǎ jǔm xwỳr ata tǔm nare, ne cumǎ ihpar pitcuhhōn xà. Ampo na? Pjê kam apu to ipa mǎ ihtǔm, cwỳrjapê ri cumǎ ihpar pit cuhhōn xà. Ne imǎ ihhêj neramǎ me acunea tetet pit, ne por jǔm ata ri pyxit peaj ne nee ihtetet nare ne ihtǔmti — hajỳr.

¹¹ Ne pê ramǎ Jeju cute ihkên mǎ mên catê atajahkre peaj, na pê harkwa ita to hane he:

— Ramǎ me acunea tetet, ne jǔm ata ri pyxit peaj, ne nee ihtetet nare ne ihtǔmti — hajỳr. Ne nee mǎ mehtǔm to pê Jeju hũjarên to hajỳr nare, ne cute me amji kam hapac xà kên to pê hũjarên to hane.

Pê me hàpên catêjê me hàpên xà na me ajpên tehcajpa

¹² Mǎ cute me imǎ ipar cuhhōn par jirô pê mǎ rihacpỹa mǎ cute ihkà mǎ amji jaxàr, ne meijàpàn xà na hỳr, ne cute me icukij to:

— Xà ate me ite curmǎ ampo ton xà ita kam me gapac, ne me hahkre pej? Mõrmõ nee ate me hahkre pej nare, cwỳrjapê wa ha me amǎ ihkôt harê.

¹³ Ca me ito amji mǎ: “Me imǎ ampo to hahkre catê” hane. Ne hanea ne amji mǎ me ito: “Ijō Pahhi” hane. Neampeaj kam ri ate me ijarêan to me ijarêan.

¹⁴ Ỡhỹ, he te ipê me gō pahhi, ne ipê me amǎ ampo to hahkre catê cakrô, wa itỳj me amǎ ijàpên, ne ite me amǎ me apar cuhhōn par. Cwỳrjapê ca ha me caa icuxàajpên mǎ me apar cuhhōn pa. Ne ampo cunea na me ajpên

tehcajpa, ne ajpěnto me acati, ne ajpěn mã me apê.

¹⁵ Ne ite me amã to hahkre na, ca haikôat me to, ne ajpěn mã me apar cuhhôn pa.

¹⁶ Wa ampeaj kam me amã awjarê, he me hàpên catêjênõ hõ pahhi jirôa pê cati nare. Ne nee hõ pahhi japyre mã hàpên nare. Ne quêt hõ pahhi ri mehirôa pê cati. Ne hanea ne, por harkwa nacumã imprar catêata, nee cute ihkujahêc catê ata jirôa pê cati nare.

¹⁷ Hamre, ita caxuw ca ha ite amji kam ijapac xà na meijahkre pej kam me to tẽ. Na ca ha ate ikôat me ton to me amji pyrác na, ca haatyj hūrên me gakry.

Pê Jeju, por cute ihkên mã mẽn catê ata jarê

¹⁸ — Wa nee ite me acunea to icakôc nare. Ampo na? Wa ityj ite amji mã me acapi atajê pupu, ne imã me gahkre pej. Ne pê Pahpãm jŏ kàhhôc kam ramã me anõ ata to hũjarên to: “Por icahê na ijŏ pãw ku ata, quê ha ihtyj icuna mãahtwỳ ne amji to icurê xwỳn” hane. Ne ampeaj kam quê ha caxwa ita kam, jũm ita ito hane.

¹⁹ Ne wa ha ita kam ampo te ito hajjyr xà ita xwỳjrea na, me amã harê. Mãr quê jũm ita ito hane, ca ha ramã me ipê Pahpãm kraa to Pahpãm kra na me ijahkre pej.

²⁰ Ne ampeaj kam wa me amã awjarê, quê ha jũm te, porite jũm kujahêc ata na amji caxàr me ajkaam, hanea ne inamji capa. Ne quê ha jũm te ina amji caxàr me ajkaam, hanea ne Inxũ te ajpěn ikujahêc ata na amji capa — hajjyr.

Pê Jeju cute ihkên mã mên catê jahkre

²¹ Cute ita jarên jirô pê mã ri cumã amji kîn nare, ne hĩ cunea kam ihpeacre. Mã hirãa pê me imã amji jarên to:

— Wa ampeaj kam me amã amji jarẽ, ca ha atỳj me anõ meicurê xwỳn tehcajpa ne me cumã igõ, neikên mã imẽ — hane.

²² Wa tee ame ajpẽn pupu, ne nee me ite, por cute jũm to ihcakôc ata jahkre pej nare.

²³ Ne pê ampeaj kam Jeju mã ikîn, cwỳrjapê pê wa cahĩ na jỹ.

²⁴ Mã Ximãw Petrô te hũhkra to imã hàpêr, ne hũhkra to imã, ite jũm ata na Jeju cukij na awjahkre.

²⁵ Wa Jeju wỳr ipipkjêr ne ite kyre pê ihcukij to:

— Ijõ Pahhi, jũm mã ajte? — hajỹr. Mã Jeju imã:

²⁶ — Por wa ha jũm mã pãw co ne cugõ ata — hajỹr. Ne cute pãw kwỳ hyr ne crat kam cô cacro to inco, ne Juta Carijotmã hõr.

²⁷ Mã cute pãw ata pyr me ajkaam mã Xatanaj te cumã amji jõr. Mã Jeju te cumã harkwa to:

— Gapacta ne ate amji mã acaca xà nõ na prãm ata ton pyrentu — hajỹr.

²⁸ Mã me ikwỳ me ijàpàn xà na me jỹ atajê te nee me ita jahkre pej nare, por Jeju te imã harên xà ata na.

²⁹ Ne pê Juta ihpore incjên xà to amji pytà, ne ajcoapu to ipa na, pê ihtỳj cute amji kîn caxuw cute ampojaprôr na Jeju te cumã harkwa na amehcãmji, nare, cuteme cupê hamreare atajê mã ihpore nõ jõr na amehcãmji.

³⁰ Mã Juta te pãw pyr, ne ihkrēr ne ma ihtēm pyrentu. Mã ramã awcapàtkô ne caxwa.

Pê Jeju ihtēm xà na ihkôt me ipa catêjê mã amji jarē

³¹ Ne ma Juta tēm jakàn pê ri Jeju te me imãhũjarēn to:

— He ipê me Ahàkà ata pê wa me hũmre na amji to, ne còjkwa pĩn wrỳ. Ne ita caxuw quê ha mehcunea me hirôa pê icati na meijahkre pej. Ne icwỳrjapêa quê ha hanea ne me Inxũ japrỳto me catia to me cati na me hahkre pej.

³² Wa ha mehcunea mã Inxũ carôt catihti impejti cupahti ata to ajpê, ne ahtũm nare, quê ha hanea ne me cumã icarôt catihti impejti cupahti ata to ajpê.

³³ Me apê me ikrare pyràac. Ne wa ha nee me acahê na apu imõr kam icrà nare, ne ahtũm nare wa ha ma tē. Na ca ha tee ame ijapê. Nepor wa ite ramã Juta catêjê mã amji jarēn xà ata to, wa ha me amã amjijarē, ne me amã: “Jũ wỳr ca ha curi imõr xà ata ri memõ” hane.

Cu ha me pamã ajpēn kĩnti ne

³⁴ — Na wa ha me amã ite ijarkwa hyr xà intuwti ita ta, ne me amã harēn to: “Atỳj me acunea mã ajpēn kĩnti, to hanea, pom quê wa me akĩnti to amji kampahe, ita to quê ha hanea ne me amã ajpēn kĩnti ne” hane.

³⁵ Quê ha me acunea mã ajpēn kĩnti na, quê hamehcunea ajpēn na me apupu, ne me apê ikôt me apa catêjê na me gahkre pej pyrentu — hane.

Pê Jeju Petrô mã cute hõmpun nare na harên na cumã harê

³⁶ Mã Ximãw Petrô te Jeju cukij to:

— Jō ri ca ha ajte mō? — hajÿr. Mã Jeju cumã:

— Jũ wÿr ca ha ita kam curi imōr xà ata ri mō, ne jũacaxuw ca ha atÿj curi ikôt acato — hane.

³⁷ Mã hipêr Petrô Jeju cukij to:

— Mêr ampo na wa ha nee ita kam akôt imōr nare? Pomipê akôt ipa catê ita, cwÿrjapê wa ramã ita kam akôt ityc xàa caxuw apu mō — hane.

³⁸ Mã Jeju cumã:

— He xà ca ajkĩ ampeaj kam ikôt atyc xàa caxuw apu mō? Hamreare. Wa ha amãijÿjarên hiahpuro. Ca ha ita kam, hõxãhxãc kàr xwÿjrea na, ate ipupun nare, ne apêijahkre kêatre na, amji jarên to incrê — hane.

14

Pahpãm cahê na ampeaj kam me pamã me pahkrĩ xà jàhtô

¹ Jirô pê mã ri cute me pahcunea mã harkwa to:

— Nee ca me amji mã pa, ne ameakrihkrit nare. Ne Pahpãm to ca quêt amji mã me ahimpej, ne hanea ne ito amji mã me ahimpej.

² Ne Inxũ krĩ xà kam ampeaj kam mehkrĩ xà caxuw mehkrĩ xà jàhtô, na wa ha ma hacpÿ mã tẽ, ne me amã ihnõ cùmpej hiahpuro. Wa nee ame amã ihêj xi jarên nare, quê ha curimehkrĩ xà caxuw ikre caxwÿn atajê hamreare na mã, wa ha nee me amã harên to hajÿr nare.

³ Na wa ha ihcũmpej par jirô pê mã, wa ha hacpỹane me awỳr amji jaxà, ne me gaprô, mār wa curi apuipa ata ri, ca hanea ne ikôt curi ame apa.

⁴ — Ne ramã me amã jũ kam itēm xà ata jō pryjahkre pej — hajỹr.

Jeju pê ri Pahpãm wỳr me pancjêj xà jō pry

Mã me ikwỳ nōa pê Tome ata te ihcukij to:

⁵ — He me ipê cormã jũ kam atēm xà ita na gahkre kêatre ita kam, jũ mã wa ha ajte me, ne me gō pry ita jahkre pej? — hajỹr.

⁶ Mã Jeju cumã:

— He Pahpãm wỳr pry pyxit peaj. Ne ipêa ri pry ata. Cwỳrjapê ca ha ipyxit peaj kôt Inxũ wỳr me acato. Ne ipê me amã iteInxũ to ipipê xà to ihêj xi nare xà xakat. Ne ipê meate amji kam me gapac xà impejti cunea xakat.

⁷ Ne ramã ate me ipê Pahpãm kra na me ijahkre pej, na ca ha atỳj hanea ne ita caxuw meInxũ jahkre pej. Ýhỹ, he pê ca ramã me hõmpu — hane.

Jeju me Pahpãm pipēan

⁸ Mã me ikwỳ nōa pê Pirip ata te Jeju mã:

— Me ijō Pahhi, me imã Apãm to ajpê, wa me hõmpu, netahnaa mã ihkôt me amji kampa, ne nee wa iràn xà na me ampo pupun prãm nare — hajỹr.

⁹ Mã Jeju cumã:

— Pỳhàpà, he rỳ pêa mã wa me acahê na ipa, ca ajte nee cormã ate me ipupun nare? Põr jũm ipupu ata, ihtỳj hanea neInxũ pupu, ne mēr

ampo na mã ca cormã imã: “Me imãApãm to ajpê, wa me hõmpu” hane?

¹⁰ Pirip, xà ca nee ajte, wa Inxũ me ajpên kam ihõnco, ne ajkam me ipyxit peaj na amji mã meito hajÿr nare? — hane. Ne Jeju me icunea mã:

— Ne pom wa me amã awjarê itajê, wa nee amjia kôtharên nare. Ne wa ite Inxũ me ajpên mã amji jôr, ne ajpên kam me ihõnco, na ri taa hàpên xà itajêcunea to.

¹¹ He, wa Inxũ me ite ajpên mã amji jôr, ne ajkam me ipyxit peaj, na wa me amãamji jarê, ca atÿj me ikampa. Nãmri quê ha me amã icakôc xà itajê na ipar jahkre kêatre na, ca ha meijâpên xà itajê pupu, ne ihkôat amji mã me itoahimpej ne me ikampa.

Ampo na pahte me Jeju wÿr xà atajê, ihtÿj me pamã cugõ

¹² — Wa ampeaj kam me amã awjarê, quê ha jũm te ampeajkam ito amji mã ihhimpej na, quê ha, pom waijâpên xà to itajê jirôa pé hàpên xà ton to ipa. Ampo na? Wa ha maInxũ wÿr hacpÿ mã tê, na quê ha ajpên me amã icarôt kujate.

¹³ Ne wa me ato amji kwÿ cwÿrjapê ca ha ampo na me iwÿ, wa ha itÿj me amã hõr pa, mãr quêmehcunea me acwÿrjapê Inxũ catia to cati na me hahkre pej.

¹⁴ Ne wa me ato amji kwÿ cwÿrjapê, ca ha ampo na me iwÿ, wa ha itÿj me amã cugõ.

Pahpãm Carõ Pejti te me pamã caprĩ xà

15 — Nāmri quē ha me amã ikĩn na, ca ha atỳj ite ampo na me amã ijarkwa jirên atajê na me ikampa.

16 Ne wa ha me amã Inxũ na ahwỳ, quē ha ijakàn pê ijaxà kam, me amã jũm kujate, quē ha me atehcajpa. Ne taa mã quē ha quêt me acahê na ipa rohnỳtti mã. Ne jũm ata pê riInxũ Carõ Pejti.

17 Ne taa mã quē ha me amã Inxũte amji kam hapac xà impejti to ipipě to mō. Ne porme cupê Inxũ tekjê nare, ne hanea ne me cupê me ikwỳnare atajê, quē ha nee amji mã me Inxũ Carõ Pejti itacwỳr nare. Ampo na? Jũ wỳr quē ha me hahkre pej, ne mehōmpu. Ne me ca nare, ca ha atỳj quêt me hōmpu. Ampo na? He quē ha ihtỳj quêt me acaxwãm pê ihkrĩ, quē ha me acahi na ipa.

Quē ha Jeju me parer, cu ahte ame papa nare

18 — Ne quē ha ina ahtũm nare, wa ha ma tē cakrô, wa ha nee me ato tojnō ne me amã hikran, ca ha ahte ame apa nare. Ne itỳj me awỳramji jaxà, ne me acahê na apu ipa.

19 Ne quē ha ina ahtũmre quē ha me cupêPahpãm tekjê nare atajê nee hipêr me ipupun nare, ne me ca nare, ca ha quêt atỳj hipêr me ipupu. Ne wa ha itỳj hacpỹa mã itĩr ne Pahpãm cahê na apu ipa. Cwỳrjapê ca ha icuxà hanea ne hacpỹa mã me atĩr, ne me atĩr ita na Pahpãm cahê na ame apa.

20 Ne quē ha jũ caxuw, amcro nō na me awỳr PahpãmCarõ Pejti cato, ca ha Inxũ me ite ajpẽn mã amji jōr, ne ajkam me ipyxit peaj na

meijahkre pej. Ne hanea ne me amã, wa Inxũ Carõ Pejti kôt, me akam ikrĩ na ijahkre pej, na cu ha ajpẽn mã me amji gõ, ne ihhêj ne ajkam mepahpyxit peaj.

²¹ — Ne por quê ha jũmjê ito amji kampa, ne ijarkwa kôt me ipa atajê, quê ha me cumã ikĩnti na me to ipipẽ to ipa. Ne quê ha haneane Inxũ mã, por jũmjê mã ikĩnti atajê kĩn, wa ha hanea ne imã mehkĩn, na wa ha me cumã amji to ajpẽ, mãr quê me ipupu ne me ijahkre pej pejtu ne — hane.

²² Mã me ikwỳ nõa pê ajtea mã Juta nõ ata, pê nee Juta Carijot nare ata te Jejucukij to:

— Jũ mã ca ha ajte ne me imã pit mã amji to ajpẽ? Nenee me cupẽ me akwỳ nare atajê mã amji to apipẽnare? — hajÿr.

²³ Mã Jeju cumã:

— Quê ha jũm mã ikĩn na, quê ha ihtỳj ite cumã ampona ijarkwa jirên itajê na ikampa. Cwỳrjapê quê ha ihtỳj Inxũ mã ihkĩn, wa ha Inxũ me ajwar me cumã amji to ajpẽ, ne ajpẽn kam meihônco, ne me cahê na me ipa rohnỳtti mã.

²⁴ Nãmri quê ha jũm mã ikĩn nare na, quê ha nee ite ampo na cumã ijarkwa jirên atajê na ipar nare. Ne cute hajÿr xà ita kam jũmã wa ha ajte, ne me cumãamji to ajpẽ, ne ajpẽn kam me ihônco to ipa? Jũ wỳr wa ha me to hane — hane.

Carõ Pejti ri pahte me Pahpãm te amji kam hapac xà impar na me pahto

Ne cute me icunea mã:

— He wa ampeaj kam me amã awjarẽ. Pom wa icakôc xà toicakôc, ca ahna me ikampa

itajê nee cupê icakôc xà nare, ne cupê, por pê Inxũajpên ikujate ata cakôc xà.

²⁵ — Ne wa ita ri cormã ame acahê na imõr xà ita kam, ramã ite me amã ampo itajê cunea to icakôc partu.

²⁶ Na quê ha Inxũ hacpỹ ne ajpên ijarkwa kôt me awÿr Carõ Pejtikujate, quê ha taa me atehcajpa, ne me amã ampo cunea tohahkre. Ne taa ite ampo to me amã icakôc xà itajê to, ateme amji japackre na me ato, ca ha me to amji japackre.

Quê ha Jeju me pahcaxwãm pê me pamã me pahcarĩcti gõ

²⁷ — Ne wa ha me amã, pom wa icarĩcti kam ipa ita gõ, mār ca nee amji mã ame ampo cupa nare, ne nee ampo cupate ame akrihkritnare. Ampo na? He wa ha pa me apê ate amji mã me ampo cupa, ne ame akrihkrit xà atajê to hamre, ca ha atÿj ame apa. Ne wa ha nee ipê me cupê Inxũ na mehkwÿ nare atajê pyrác, ne ijarkwacakrô to me amãn, ca ha me anõ akên nõ mã axār nare, ne me apej pēa mã ame apa, ne quêt me acarĩcti kam ame apa.

²⁸ Ne wa ramã ite me amã: “Wa ha matê, ne hacpỹa ne me awÿr amji jaxà, ne me acahé na apuipa” hajÿr na, ate me ipar. Ampo na? He wa ha ma, porijirôa pê Inxũ Cati ata wÿr amji jaxà. Ne quê ha me anõ mã ikĩn na, ihtÿj itēm xà ita pyrén hakry.

²⁹ Wa ha ampo itajê te ito hajÿr xà xwÿjrea na me amã harēn to ipa, mār quê jũ caxuw ito hane, ca haamji mã me ito ampeaj kam pyrentu.

³⁰⁻³¹ Ne jũ wỳr wa ha ahkri xa ne ame amã icakôc. Ampo na? Quê ha ahtũm nare, quê ha me pahwỳr me cupê Pahpãm na mehwỳnare atajê jŏ pahhi, pê me pajŏ xwỳn cato. Ne cupê me pajŏ xwỳn cakrô, quê ha nee jũ na iton nare. Ampo na? Hirôa pê icarôt cati na ri. Ne pê ramã Inxũ imã: “Cama amji na mepajŏ xwỳn jamã, quêt taa acura” hane. Na wa ha itỳjInxũ te imã harkwa to hajỳr xà ita na kampa. Ampo na? Mehcunea te imã Inxũ kĩnti na me ijahkre pej prãmte, wa ha hane. Me to xa cu uu ne me — hajỳr. Wa ite me ajpẽn mã:

— Měr hacme — hajỳr.

15

Jeju pê pĩxô pàr pyràc

¹ Ne wa cormã pry kôt me imõar kam, mã Jeju te me imã amji jarên to:

— He ipê pĩxô pàr ata pyràac, mã Inxũ pê pĩxôpàr ata jamãr catê ata pyràac, ne ma ijamã.

² Ne por amji mã me ito ihhimpej catêjê atajê pêihhêj rũm ipajũhtê atajê pyràac. Cwỳrjapê quê hanee jũm te amji mã ite amji kam ijapac xà impar nare na, quê ha ihtỳj Inxũ itête pŏ mã mẽn to hanea, pom quêhãn ne pĩxô pàr pajũhtê hô nare, mã hamãr catêhakep ne curê, ata jĩkjê na Inxũ te hajỳar. Ne quê hapĩxô pàr nŏ pajũhtê na hô pyxitre apu harij, quê hahamãr catê hŏmpu, ne intête ahna xà me, ahna ampo kêncunea harij atajê jũrên pa, cute cumã hô to hàhtôa toprãm to. Ita jĩkjê na mã Inxũ hãn ne cute amji mã me ito ihhimpej catêjê atajê to hane. Cute amji

kam hapac xà kam, cute me ampokên to me amji kam hapac atajê cuneajûrê, mã mempej, ne ma ijarkwa kôt, me hàpên xà impejti to amji mã me ipicamên to me ipa.

³ Ne ramã Inxũ te, ite me amã ampo to hahkre itajêakôt, cute me amã ate amji kam me gapac xà kên jûrên ne to impej.

⁴ Nãmri quê ha pîxô pâr pajũhtê nõ te impàt ne ihpým na, quê ha nee hô nare, ne cama incrà. Ita jîkjê na, ca ha me anõ, ate ijarkwa kôt gápên xà impejti to gápên toapa nare, ne amjia kôt gápên na, quê ha gápên xà atakôt apê hamreare ne. Cupate ca ha ikam me akrĩ kam me to acrà, wa ha hanea ne me akam ikrĩ kam to icrà. Na cu ha me ajpêan, neajkam me pahpyxit peaj, ne atýj ijarkwa kôt me apê. Ne me apê pîxô pâr pajũhtê pejti atapyràac, ne ampeaj kam me axô hũhhĩc itajê pê me gápên xà jàhtôa ne impej.

⁵ — Ipê pîxô pâr cati pyràac, ne me apê ihpajũhtêpyràac. Quê ha pîxô pâr pajũhtê nõ ipàar kamihcuhhê, ne ihtýj ahna hô. Ita jîkjê na, ca ha ikam me akrĩ kam me to acrà, ne atýj ijarkwa kôt me gápên xà impejti to me gápên to me apa. Nãmri caha ate ikam me akrĩ kam me to acrà nare, ne amjia kôt ame apa na, ca ha nee me ampo pejti tonnare.

⁶ Quê ha jũm te ijicu, ne nee ikam ihkrĩ kam to incrà nare na, quê ha cupê, cute me pîxôpajũhtê jakep mã incrà, mã cute me to cuprôn, ne cuhy kam me haxwýr, ne meto caxàr ata pyràac. Quê ha jũm te ipê ampýa mã apu ipa na, quê ha ihtýj amji to actô.

⁷ Ca ha ate amji mã me ito ahimpej kam me to

acrà, neatỳj ikam me gapac kam me to acrà na, cu ha me ajpēan, ne ajkam me pahpyxit peaj, ca ha ampo na me iwỳ, waha itỳj me amã cugō.

⁸ Na ca ha ate ijarkwa kôt gápên xà impejti jàhtôa to gápên to apa na, quê ha ahna me apupu, ne apê ikôt me apa catêjê name gōmpu, ne me akamihtỳj me Inxũ catia to cati. Ne cute amji kam hapac xà impejti ata na me gahkre pej, ne hanea ne Inxũ, ihtỳj jũm te amji kam hapac xà to impej na hahkre pej.

Jeju mã me pajakryti na me papa na me pahto prãm

⁹ — Ne pom Inxũ mã ikĩnti, mã ma ipupu ne ijamã ita na, wa ha hanea ne me ato, ne imã me akĩn, wa ha ma meapupu, ne ma me gamã. Cwỳrjapê ca ha nee amji tète amejarkwa curê nare, ne ikôat quêt ame apa, mār wa imã me akĩn ita na.

¹⁰ Wa hãn ne amji mã Inxũ jarkwa na kampa, na ri cumã ikĩn, ita na ca ha icuxà hãn ne ijarkwa na me ikampa, wa ha imã me akĩn ita na.

¹¹ — Ne mēr ampo na mã wa ame amã icakôc xà ita to icakôc? He icuxà me gakryti cunea kam me aparohnỳtti mã na ne ato prãm, cwỳrjapê wa ame amã icakôc xà ita to icakôc.

Cu ha me pamã ajpēn kĩnti kam me papa

¹² — Ne wa hãn ne ijōtpê me amã ijũjarēn to: “Pom imã me akĩnti ita cuxà, ca ha me amã ajpēn kĩnti ne” hane.

¹³ Imã me akĩn cràti ita kam, wa ha pa me icurê xwỳn mã amji gō, quê ha me acwỳrjapê

me icura. Ca ha cormã imã me akĩn cràti ita na me ijahkre pej.

Me papê, por Jeju te amji mã me pahcapi atajê jŏ ikwỳ nŏ

¹⁴ — Ca ha ate ijarkwa kôt me gápên na, ca ha me apê me ikwỳa to me ikwỳ.

¹⁵ Ne imã, nee me apê cama me imã me gápên catêjêatajê nare, ne me apê me ikwỳa to me ikwỳ. Ampo na? Nee mã ampo na nare. Hecama me cumã me hápên catêjê atajê pê me hŏ pahhi teamji kam hapac xà jahkre kêatre, ne me ca nare. Wa itỳj quêt me amã, por Inxũ te imã ampo cunea jarên atajê jarên to ipa.

¹⁶ He pê ca nee amji mã me icapi nare, ne pa pê waquêt amji mã me acapi. Ampo na? Nee mã ampo na nare. Heijarkwa kôt ate me gápên xà pejti ton to me apa toprãm to, pê wa amji mã me acapi. Ne me gápên xàimpejti atajê pé quê ha ampo pĩxô pejti te jũ caxuwhamre xà nare ata pyrãac, ne ihcuhhê rohnỳtti mã. Cwỳrjapê ca ha ijaprya naampo na me Inxũ wỳ, quê ha ihtỳj me amã cugŏ.

¹⁷ Ne wa ha hipêr me amã me ate me ajpên kĩnti xà ita na awjahkre.

Me cupê Pahpãm na mehkwy nare atajê ma ame cupê mehkwy atajê curê

¹⁸ — Ne wa ha ma itêm jakàn pê, quê ha me cupê Pahpãmna mehkwy nare atajê, ma ame acurê. Ca ha me acumam cute ame icurêna me to amji japackrea ne.

¹⁹ Ne me cupê Pahpãm na mehkwy nare atajê mã mehkwy pê me hũràcti catêjê pit kĩn. Na

quê ha me apê me hūràc na mã, quê ha ihtỳj me cumã me akĩn. Ne cama nee me apê me hūràcnare. Ampo na? He wa ite amji tekjêa na amji mã me acapi. Cwỳrjapê ri ma ame acaca ne ame acurê.

²⁰ Ne curmã ite me amã ijũjarên xà ata to ca me amjijapackrea ne. “Me cumã hàpên catêjê, nee me hõ pahhi catêjê jirôa pê me cati nare. Ne hanea nenee me hõ pahhi japyre mã, me amji pupun to kên to me ipa nare” hajỳr. Na quê ha me cupê Pahpãm na mehkwy nare atajê, me imã ite amjipupun xà kêanre na me ito. Cwỳrjapê quê ha hanea ne ameate amji pupun xà kêanre na me ato, ca ha ahna me amji pupu. Ne por me pyxitre amji mã me ijarkwa kampa atajê, quê ha hanea neihtỳj amji mã me akampa.

²¹ Ne mër ampo na mã quê ha ate me amji pupun xà kêanre na me ato? Nee mã ampo na nare. He me apê ikôt me apa catêjê, na quê ha me ato hane. Ne hanea ne me cupê Inxũ te ajpên ikujahêc ata jahkre kêatre, naquê ha ma ame acurê.

²² — Na wa ite me cumã cute mehkên ton xàatajê intête me cumãn, ne me cumã harên prãmte, wa mehỳrmã icator. Mã cute me hahkre pej cacrô, ajte nee cuteme ton jicu nare. Cwỳrjapê quê ha Pahpãm ame to kêanrene. Wa ha icator ne me cumã, cute mehkên xà ton ita jarên nare na mã, quê ha nee me hahkre pej nare, quê ha Pahpãm xwỳjênee ame to kên nare. Ne hamre, jũ wỳr quê ita caxuw, cute mehkên ton xà ata pê jũ kam me cato.

²³ Ne por ma ame icaca, ne ame icurê atajê,

hanea ne maame Inxũ caca ne ma ame curê.

²⁴ Wa icator, ne me kam mare mã ite icarôt tÿjti to, rÿ jũ caxuw jũm te ampo pejti pihho ton nare atajê cunea ton par. Wa ha me kammare mã ampo itajê ton nare na mã, quê ha nee Inxũ me cumã harkwa to: “Me apê ate me akên ton catêjê” hajÿr nare. Mã ajte cute ita name ipupun cakrô, ajte ma Inxũ me ajwar ame icurê.

²⁵ Ne pê ramã rÿ pêa mã Mojxe xwÿ ina ihhóc tohane he: “Wa ite ampo kên ton nare cakrô, mã ajte ma ame icaca, ne ma ame icurê” hane. Hajÿr ata na mã cute me iton he.

Pahpãm Carõ Pejti ri me pamã Jeju to hahkre

²⁶ — Ne quê ha ampo kên itajê te ame ato hajÿr cakrô, ca ha nee ame amjimã pa, ne nee ame akrihkrit nare. Ampo na? He wa ha itÿj me amã Pahpãm Carõ Pejti te catyt kam me amã ampo to hahkre catê ata kujate. Quê ha me atehcajpa, ne me amã ihcunea ikôt harên to hahkre.

²⁷ Ne me ca, ca ha hanea ne mehcunea mã ikôt harên to me apa. Ampo na? He pê ca mam quêt ikôt me apa, na ri ihcunea na ramã me amã ijahkre pej.

16

Quê ha me pahte amji pupun xà kêanre ata nee me pahto jũ mãn nare

¹ — Ne wa ha jũ caxuw ampo te ito hajÿr xà ata kam, ate ame icaca, ne ame imã hikran cupate, wa ite ramã me amã ampo itajê cunea jarên hiahpuro.

² Nāmri quē ha ihtỳj ikôt me cumã me acurê, ne quē ha cute me cuprôn xà jũrkwa pê, ihtỳj me gapôj. Ne quē ha mehkwykwỳ te amji to me Pahpãm cajpuaw na me amji cãmji xà to, quē ha ihtỳj hanea ne me acura.

³ Ne ampo na quē ha ame ato hane? He me cupê ijahkre kêatre, ne me cupê Inxũ jahkre kêatre, na quē ha ame ato hane.

⁴ Ne quē ha ampo itajê me ato hane, ca ha ite ramã meamã harên hiahpuro na, me ito amji japackre pyrentu. He pêwa mam aracri ame akôt ipa, ne nee ajco me amã ampoitajê jarên to hajỹr to ipa nare. Ampo na? Pê wa pa me apytàr to ipa na pê.

Quē ha Jezu me pamã Pahpãm Carō Pejti kujate

⁵ — Ne hamre, ramã ma hacpỹ mã ajpên cute ikujahêc catê atawỳr ite amji jaxàr xàa kam ramã hàhhuc to mỗ, na waitỳj me amã ampo itajê cunea jarên to mỗ. Canee ajte jũ kam itẽm xà ita na me icukij nare.

⁶ Ne wa ramã ite me amã hacpỹ mã amji jaxàr xà ata na amji jarên, cwỳrjapê ri ajte me amã amji kĩn nare, ne me apeacre. He nee ame apec nare!

⁷ He ampeaj kam wa me amã amji jarê, ne wa nee apu ihêj xà jarên nare he. Imãa hacpỹ mã ite amji jaxàr xà ita na ri me amãihkênre nare. Ampo na? He wa hacpỹ mã ne amji jaxàr nare, quē ha nee ajpên Pahpãm Carō Pejti te me atehcajpar catê ata me awỳr iwryc nare. Na wa ha ma tẽ, ne itỳj ajpên hacpỹ mã ne amji jaxàkam me amã ihkujate.

Quê ha Carō Pejti hÿrmã me cupê mehkwy nare atajê pipkjêr na me to

⁸ — Ne quê ha Inxū Carō Pejti te catyt kam me amã ampo to hahkre catêata te me awÿr cator na, quê ha taa me cupê Pahpãm namehkwy nare atajê mã ampo crê atajê to hahkre, quê hame hahkre pej. Atajê pê, cute me ampo kêanre ton xà na cute me amji jahkre pej xà me, cute catyt kam imã ite amji kam ijapac xà to impejti jahkre pej xà me, jÿ caxuwPahpãm te, cute me hâpên xà ton na amehcukijna cute me hahkre pej xà. Hõ, ampo crê itajê to, quê ha Inxū Carō Pejti ata cute me hahkre pej na me to he.

⁹ Quê ha Carō Pejti, pornee ito amji mã mehhimpej nare ne ame ampo kêanreton to ame ipa atajê na, cute me amji jahkre pej na me to.

¹⁰ Ne quê ha hanea ne ipê Pahpãm mã catyt kam ipa catê na, cute me ijahkre pej na me to. Na wa hama hacpÿ mã Inxū wÿr tẽ, ca ha nee me ipupun to acuhhê tu nare.

¹¹ Ne quê ha hanea cute mehkên ton xà atajê jahpan xà na, Inxū te mehcukij nemehkên mã me irên na, cute me hahkre pej na me to. Na ri cute me ampo kên ton xà itajê jŏ pahhipê Xatanaj ata kên mã mên xàa kam xa.

Quê ha Pahpãm Carō Pejti me pamã, ampo cunea to hahkre

¹² — Ne cormã ampeaj kam imã me amã ampo jarên xaitajê jàhtô, wa me amã ampo itajê cunea jarê na mã, ca ha nee mempar, ne me hahkre pej nare.

¹³ Ne nee ita na cute me amã jÿ măn nare. Ampo na? Quêha jÿ caxuw Inxū Carō Pejti te

catyt kam me amã ampo tohahkre catê ata ajpên me awÿr cato, ne taame amã ampo itajê cunea to hahkre pa. Ne catyt kam, harkwa kôt, Inxũ te amji kam hapac xà impejti itajê to pit mã me amã hahkre, ne nee mã, quê ha amjia kôt me amã to hahkre nare. Ne me amã, por ajpêncormã me awÿr ampo cator nare atajê to hahkre.

¹⁴ Ne me akam mare mã amji mã icatia to icati na ijarê, ne cute amji mã me icupa na me to, quê ha ihtÿj amji mã me icupa. Ampo na? Hequê ha icakôc xà to pit mã ihcakôc, na quê ha hane.

¹⁵ Ne por Inxũ mã ampo cunea atajê te hajÿr, ne cupê itekjê. Na wa ha Pahpãm Carõ Pejtimã ampo jarê, quê ha ma me amã to awjarê.

Pê Jeju hacpÿa mã ihtÿr na me cumã amji jarê

¹⁶ — Ne quê ha ina amcro hàhtô nare, ca ha nee hipêr me ipupun nare. Ne hanea ne ina amcro hàhtô nare, ca ha hacpÿa mãme ipupu — hajÿr. Jeju te me imã amji jarên to hajÿr.

¹⁷ Wa ite me ajpên cukij kam me itêm, ne me ajpên mã:

— Ne mër ampo na mã tee ame pamã amji kôt harênto hahkre. Ne ajte amji jarên to: “Quê haina amcro hàhtô nare, ca ha nee hipêr me ipupun nare. Ne hanea ne ina amcro hàhtô nare, ca ha hacpÿa mã me ipupu” hane. Ne hanea ne ajte amji jarên to: “Ita cwÿrjapê wa ha ma hacpÿ mã Inxũ wÿr tẽ” hane.

¹⁸ Ne mër ampo jarên xà pê mã: “...amcro hàhtô nare...” ita? Wa nee me ite ihcakôc xà itajê nõ na mempar, ne me hahkre pej nare — hajÿr.

19 Mã ampo na ite me Jeju cukij prãm ata na cute mehahkre pej pyrentu, cwÿrjapê ri me imã:

— Xà ite me amã: “Quê ha amcro hàhtô nare, ca ha nee me ipupun nare, ne ina amcro hàhtô nare ca ha hipêr me ipupu” ata na mã ca ame ajpên cukij?

20 Ampeaj kam wa ha me amã ijÿjarên xà ita toawjarê. Ca ha atÿj jÿ caxuw ame amrã, ne me amãamji kîn nare ne, ne me apeacre ne. Ne me cupê Pahpãm namehkwÿ nare atajê, quê ha ihtÿj quêt ame hakry. Cakrô, quê ha hacpÿ ma mã mam me amãamji kîn ata jirôa pê me amã amji kîn.

21 He pom hãn ne me cahãj mã mehkra hà mã me cumãamji kîn nare, mã me cumã ajhu, mã hacpÿ ma mã mehkàj xà to me hapac kêt, ne me cumãamji kîn, ne me cumã mehkra pÿpÿm pyrên ame hakry, ita jîkjê na ca ha me hanea.

22 Ne amcro itajê kam me amã amji kîn nare cakrô, cu ha hipêr me ajpênpupu. Jirô pê mã quê ha me amã amji kîan to amjikîn ata, quê ha nee jÿm me apêcaxàr, ne me apê to hamre nare.

Cu ha Jeju japrÿa na me Pahpãm mã me pahcakôc

23 — Ata caxuaw ca ha nee hipêr ampo na me iwÿr nare, neme apê me ikwÿ te hajÿr romã mã, ca ha ijaprÿa na, ampo cunea na ate Inxÿ na me gâhwÿr xà atajê, quê ha ihtÿj me amã cugô.

24 Ca ajte nee cormã me ate ijaprÿa na ampo na mePahpãm wÿr nare. Na ca ha ita caxuw atÿj ijaprÿa na ampona me Inxÿ wÿ, quê ha ihtÿj me amã cugô, ca ha me acwa, ne me to mam me amã

amji kīnti ata ràn, quē ha me girô pê ihp̄ym tu ne.

²⁵ — He wa nee cormã hirãa pê me amã ijũjarēn xà itajê jarēn to ipa nare, ne incw̄yrpê me amã harēn to ipa. Ne wa ha jũ caxuw quêt hirãa pê meamã Inxũ te amji kam hapac xà jarē, ne me amã to ajpê.

²⁶ Ne ca ha jũ caxuw me apê me ikw̄y te haj̄yr romã mã ijaprya na ampo na me Pahpãm w̄y, wa ha nee hipêr ahna cumã me acajrēn to prãm nare.

²⁷ Ampo na? He iht̄yj ita caxuw cumã me ak̄in, cw̄yrjapê quē ha taa me akampa, ne me amã ampo atajê gō. Ampo na ri cumã me ak̄in? He ca ihp̄ian icator xà na amji mã me ito me ahimpej, ne me amã ik̄inti incw̄yrjapê ri iht̄yj cumã me ak̄in.

²⁸ Ne wa Inxũ p̄in ajpên pjê ita w̄yr icator, na wa haita caxuw pjê ita re, ne ma hacp̄y mã h̄yrmãtê — haj̄yr.

Pê Jeju ihkôt me ipa catêjê mã cute me cumã hikran na harê

²⁹ Wa ite me cumã:

— Hamre, ca ita caxuw hirãa p̄egũjarēn xà itajê kôt harēn to mō. Ne nee incw̄yrpê me imã ihkôt harēn to amōr nare.

³⁰ Na wa ita caxuw, ite me ate ampo cunea jahkre pej na megahkre pej, ne amã cute ampo na me acukij xà xw̄yjrea na, ramã amã me hahkre pej, me hàhcukjêr xà atajê na. Cw̄yrjapê wa ita caxuw it̄yj Pahpãm p̄in acator na amjimã me ato ihmpej — haj̄yr.

³¹ Mã me imã:

— Xà ita kam cormã, ajkĩ ate amji mã ito me ahimpej?

³² Co he, nãmri ramã ihhêj ne ipê me apicràn xàa kam hàhhuc to mō. Ca ha atýj me irer pa, ne ma ame gũrkwa wýr mepra, wa ha ahte ahtwý cakrô, wa ha nee ahte ijàhhuc nare. Ampo na? Quê ha ihtýj Inxũ icahê na apu mō.

³³ Ne ame akrihkrit cupate, wa mam ite me amã ijũjarênxà itajê to ijũjarên. Mâr ca ikam me amji hõnco, ne meacaxwãm pê me acarĩcti ne. Ne pjê ita kam, me cupêPahpãm na mehkwy nare atajê kam, ca ha ame amji pupun xàkêanre to ame amji pupu. Cakrô, ca ha nee ame cumã me apec nare, ne me cumã amji to ihtýaj ne. Ampo na? He wa ramã me hõ pahhi mea mã ite me tojhê, ne me hirô pê ixãm — hajýr.

17

Pê Jeju Hũm Cati mã amji cajrên

¹ Jeju te me imã hũjarên to hajýr jirô pê mã rikàj mã, cõjkwa wýr irĩt, ne cute Hũm mã:

— Ýhỹ Inxũ, hamre ramã ityc xàa kam hàhhuc. Inxũ, ipê akra catia to icati na, cute me ijahkre pej xà na meto, quê mehcunea me ijahkre pej, mãr wa hanea ne acatia to acati na, cute me gahkre pej xà na me to, quê mehcunea gahkre pej. Cwýrjapê ca ha hacpýamã ityc jirô pê ito itĩr ne amji wýr ijaprô.

² Ne pê ca imã garkwa hyr to hane he: “Pjê wýr ateacator, ne ate amji to me hõ Pahhiti na, ne mehcunea toahimpej xà caxuw, ramã ite amã acarôt jõr. Ne wa haamã me hàhtõa ne

cugõ, ate me to gõ tekjê xà na, quê ha ato amji mã mehhimpej, mãr quêpahcahê na amji to me ipijapar rohnýtiti mã” hane.

³ He apyxit peaj ne quêt apê Pahpãm, ne nee aràn xà na jũm pê Pahpãm nare. Ne ipê por ate Jeju Crixto kujahêc ata. Ne me pahkwý te me pajahkre pej, cwýrjapê quê ha me pahcahê na amji to me ipijapar rohnýtiti mã.

⁴ Ite ramã acatia to acati na pjê ita kam, cute megahkre pej xà na me ton. Ne ate imã ijâpên xà jõrata, ramã ite hipêj xàa kam.

⁵ Ne pê wa ramã ate pjê ton xwýjrea na mam acahê na ipa, pê amã icatia to icati. Na wa ha ita caxuw ma awýr amji jaxà, ca ha amji cuna mã hacpýa mã ito icatia to icati.

Pê Jeju Hũm Cati mã ihkôt me ipa catêjê cajrën

⁶ — Ýhỹ, pê ca imã me cupê me akwý atajê gõ, ite mecumã ate amji kam gapac xà to hahkre, mã cute me gahkre pejprãmte.

⁷ Na ri ihtýj cute me garkwa kam hapac. Ne ihtýjita caxuw arũam iwýr me cumã ampo cunea imprar nahahkre pej.

⁸ Na wa ite, ate me cumã icakôc xà na gũjahkre xàatajêa to, wa ite me cumã icakôc, mã ihtýj cute mempar, ne ahna me amji caxàr. Ne ihtýj amji mã ate ajpên me hýrmã ipyxit peaj neikujahêc na me ato hane. Ampo na? He nee mã ita pê ahêj xi xà nare, ne ampeaj kam ri.

⁹ — Ne wa itýj amã mehcajrën, ne nee mehkôt amãmehcunea pê me pahkwý nare atajê cajrën nare, ne por ateme imã hõr atajê pit, wa amã

mehcajrën. Ampo na? Mecupê gō tekjêa, na wa apu mehcajrën.

¹⁰ Ne mehcunea pê itekjê atajê pê atekjê, ne mehcunea pê atekjê atajê pê itekjêa. Cwÿrjapê ri pahkôt me ipa catêjê atajê kôt, cute ramã icarôt tÿjti, ne icatia to icati na me ipupun.

¹¹ Ne wa ha ma hacpÿ mã awÿr amji jaxà, quê ha ahtepjê kam cormã me ahtwÿ ne ame ipa. Inxũ, ampeaj kam apeaj to apej. Cwÿrjapê ca ha ca atÿj acarôat to me pahkwÿ jamã. Ampo na? He ampeaj kam acarôt tÿj, na pê ca imã icarôt tÿjti ita gō. Cwÿrjapê ri ajkam pahpyxit peaj. Mār quê me pahkwÿ itajê pê me pahpyràac, ne meajpën hõnco tu ne, cute pahcuxà ajkam me pyxit peaj prãmte.

¹² Pê wa pjê kam cormã ame cahê na imõr reria mã, itÿj, por ate imã acarôt jõr ata to ajcome hamār to me hÿtār to ipa. Mã nee ijÿhkra pê mehnõ cator, ne ipictor nare. Ne por ramã gō kàhhôc te jÿm pyxit peaj ne, ne cupê Juta Carijot ataipictor na harën ata ri, amjia kôt ahnaa cute amji to ipictor.

¹³ — Ne wa hacpÿ mã ite awÿr amji jaxàr xwÿjrea na, cormã pjê kam ame cahê na imõrreria mã mecumã garkwa cunea to hahkre to ipa, mār quê me hahkre pej, ne me cumã amji kÿnti ne. Pom wa ahnaa mã imã amjikÿn na amji cajpê ita na, quê icuxà me amji cajpê.

¹⁴ Wa ite ramã me cumã garkwa to hahkre, ne me cumã hõr. Mã me cupê ipyràac, ne nee me cupê pjê ita tekjênare, cwÿrjapê ri me cupê pjê tekjê atajê maamehcaca, ne ame curê.

¹⁵ Ne wa ha me cumã ana ahwỳ, ca nee cormã ne pjê itapê amji wỳr me haprôr nare, ne ma cama me ahna mepahcurê xwỳn jamã, ne me cupê me hũtã, mārquê nee ihkôt me amji kam hapac nare.

¹⁶ Ne cute me amji kam hapac xà pê ite amji kam ijapac xaa pyrãc, na ri nee me cupê pjê tekjê atajê teamji kam hapac xà pyrãc nare.

¹⁷ Ne garkwa cakôc xà itajê nee ihhêj xi jarên nare, ne ihtỳj cute catyt kam me ipa xà caxuw me hapackre, mār quê ihtỳj me awpa, ne catyt kam me ipa. Na quê ha me cupê atekjê.

¹⁸ Ne pom pê ca pjê wỳr ikujate ita na, wa ha me to, ne pjê cunea kôt ame cucrà, quê ha ame cumã pajarkwa pejti ita to hahkre to me ipa.

¹⁹ Ne wa ite ijãpên xà caxuw amã amji jôr ita na quê ha me amã amji gō, ne ihtỳj me amã me hàpên to me ipa.

Pê Jeju Hũm Cati mã mehkwy cunea cajrên

²⁰ — Ýhỹ Inxũ, wa ha nee me pahkwỳ crêre itajê caxuw pit mã ana ijàhwỳr nare. Ne hanea ne cute cormã jũ caxuw mehkôt me ikam hapac ne ito amji mã mehhimpejatajê mã, wa ha ana ahwỳ.

²¹ Ne imã cute me amji kam hapac xà pyxit peaj na mehhôncoti na me to prãm. Pom ahnaa mã pamã pahte amji kam pajapac xà pyxit peaj he, ita to cute me amji kam me hapac na ri, imã me to prãm. Ita na quê ha me cupê me pahkwỳ nare atajê cute amji kam me hapac xà pyxit peaj na me hõmpu, ne ihtỳj ate ikujahêc na me gahkre pej.

²² Ne pom ate ito icati ita na, wa ite me to cati, na ricute amji kam me hapac xà pyxit peaj na me amji hōnco tu, ne me pyxit peaj te haj̄yar, pom cu ajkam pahhōnco, nepahpyxit peaj he.

²³ Ne ampo na mǎ wa ame cumǎ ana ijàhwȳr to hane? Nee mǎ ampo na nare. He mehcunea mǎ cute amji kam mehapac xà pyxit peaj to prām to, wa ame cumǎ ana ahwȳ, mār quē mehcunea me hōmpu ne ate ikujahêc na me gahkre pej. Ne pom amǎ ikīnti ita na, quē ha amǎ mehkīnti na cumǎ me gahkre pej.

²⁴ — Ȳhȳ Inxū, por ate imǎ me hōr atajê mepahcahê na amji to me ipijapar na, imǎ to prām. Ne ca ha me kam mare mǎ ate itoicati, mǎ cute me ipupun, ne me ijahkre pej. Na ca ha atȳj ito hane. Ampo na? Pê ca ramǎ mam pjê ton xwȳjrea na amǎ ikīnti, na ca ha ito hane.

²⁵ — Inxū, he ca quêt catyt kam akrī ita na, ne ita ripjê kam mehcunea pê gahkre kêatre. Ne pa nare, ihtȳj quêt imǎ catyt kam akrī ita na gahkre pej. Ne por ate imǎ me hōr atajê tehaj̄yar ne ihtȳj ate ikujahêc na me cumǎ gahkre pej.

²⁶ He wa ite me cumǎ garēn, mǎ cute me gahkre pej. Ne wa ha me cumǎ garēn to ixām ita na, mār quē me cumǎajpēn kīn to hanea, pom quē amǎ ikīn he. Ne ite amjikam ijapac xà pyxit peaj ata to pit mǎ me amji kam hapac to me ipa, mār wa ajpēn kam me ipyxit peaj — haj̄yr.

18

Pê krāhtare te Jeju pro

¹ Ne Jeju te Hũm mã ihcakôc to hajÿr jirô pê mã rima me ipê ihkôt me ipa catêjê to mǎ, Kÿhti jôcaprũm jikjê wÿr. Mã curi pĩxô jô pjê ata, wa cumã me ixàr.

² Pê Juta pê Jeju kên mã mẽn catê ataramã pjê ata jahkre pej. Ampo na? Pê Jeju ramã curi me ito ipa to hàhtôa nã pê.

³ Mã ma me iwÿr Juta ata krãhtare kwÿ to mǎ, mã hanea ne mehkôt Pahpãm jürkwajamãr catêjê kwÿ me mǎ. Ne pê Pĩxô jô pjê atawÿr me mǎ atajê pê, me cumã Pahpãm mã mehca-jrëncatêjê jô pahhi kwÿ me, Parixêw catêjê kwÿ me, me ajpẽn pa, na pê me harkwa kôt me iwÿr me hàprê xà me, ihpôc xà me, cuhy pàr kwÿ me, me to mǎ.

⁴ Pê ramã Jeju ampo te to hajÿr xà atajê cuneajahkre pej. Cwÿrjapê ri me cuna mã mǎ, ne cute mehcukij to:

— Jũm mã ca ame hapê? — hajÿr.

⁵ Mã me cumã:

— Naxare jô krĩ pĩn Jeju cator ata wa amehapê — hane. Mã hanea ne Juta pê Jeju kên mã mẽn catê ata me cahê na xa. Mã Jeju me cumã:

— He pa wa! — hane.

⁶ Mã Jeju te me cumã amji jarẽn to: “He pa wa” hajÿr, me ajkaam mã hũpate Juta kôt me ipa catêjê cunea, hacpÿ mã pjê kam me hõ to ame ipihur.

⁷ Mã hipêr Jeju te mehcukij to:

— Jũm mã ca ame hapê? — hajÿr. Mã me cumã:

— Naxare jô krĩ pĩn Jeju cator ata wa amehapê — hane. Mã me cumã amji jarẽn to:

⁸ — Wa ite ramã me amã amji jarën, he pa wa. Ne ca ha ate ame pamãn japên na, ca ha nee ame ikwý caxun nare, quêt taa ame pra — hane.

⁹ Ampo na ri cute ita ton? Nee mã ampo na nare. He pêramã taa me ahna Hũm mã amji jarën to: “Ijõ Inxũ Cati, ate imã me hõr itajê, ite nee amji pê mehnõ to ipictor xà nare” hane.

Pê Petrô jũm ita japac jakep

¹⁰ Mã Ximãw Petrô te wapo xwahhihti caxàr, ne tohũmre nõ japrý te Marco ita jaxõp, ne awpõcrũm to hapac jakep. Ne pê hũmre ata pê Pahpãm mã mehcajrën catêjê jõ pahhi mã hàpên catê.

¹¹ Mã Jeju te Petrô mã harkwa to:

— Ajõ wapo xwahhihti ita xi, nee ca apu to me cupéipytår prãm nare. He ite amji pupun xà kêanre xà ita caxuw ri Inxũ te ajpên iwýr mehkujahêc. Xà wa ha ajkĩ nee cumã ixàr nare? Wa ha itýj cumã axà — hajýr.

Jeju Anati cuna mã xa

¹² Mã krãhtare me, to ihhimpej catê me, Pahpãm jũrkwa jamãr catêjê jõ pahhi kwý me, cute me Jejupro, ne hũntýj na mehcajpre.

¹³ Ne pê Cajpa pê caku ata kam, me cupê Pahpãm mã cute mehcajrën catêjê jõ pahhi. Ne ma Cajpa ata jũprequêt pê Anati ata jũrkwa wýr me to mõ.

¹⁴ Ne Cajpa pê pahhi ata pê ramã me hapackre to hane he: “Quê ha jũm xũmre pyxit peaj ne ty, cu ha nee me pahcunea me pahtyc nare” hane.

Pê Petrô cute nee Jeju pupun nare na, amji jarẽ

15 Wa ma Ximāw Petrô me, Jeju kôt me mō. Pê ramāPahpām mā cute mehcajrēn catêjê jō pahhiti ata ipupun pejtu. Cwÿrjapê wa ma Jeju kôt ixâr, pahhi jürkwajarkwa mā carā intête kwÿc ata wÿr. Mā cormā curia, pō pê Petrô xa.

16 Wa ite harkwa jamār catê cahāj nō ata mā icakôc, ikwÿ nō Petrô te ikôt hâr xà caxuw. Mā ihtÿj cute hâr na hamār, mā hâr.

17 Mā cahājre te hōmpun ne cumā harkwa to:

— Xà apê, por cute me jūm pro ata kôt apa catêjê nōamā ca? — hajÿr. Mā cumā:

— Quê! — hane.

18 Ne ampeaj kam kry, cwÿrjapê ri pahhi mā mehâpên catêjê me, krähtare te me cuhôn, ne mehkrā neahna me xa, ne ame amji cro. Mā hanea ne me cahê na Petrô xa ne amji cro.

Pê Jeju cute Pahpām mā mehcajrēn catêjê jō pahhiti cuna mā xa

19 Mā Pahpām mā mehcajrēn catêjê jō pahhiti te Jeju cukij ne cumā:

— Jūmjê pê mā akôt me ipa catêjê? Ne ampo to mā caamehcunea mā hahkre to apa? — hajÿr.

20-21 Mā Jeju te cumā amji jarēn to:

— He wa ijōtpê mehcunea kam mare mā icakôc to ipa. Neramā cute Pahpām to me amji kam hapac xà jürkwa me, cute me cuprôn xà jürkwa atajê kam, ite me cumā ampo to hahkre to amji pyrâc tu. Ne rÿ jū caxuw ite ampo to ipimxur pēa mā apu harēn to imōr nare, nō na mā ca ajte apu icukij xà ita to icukij? Ne cute me ipar catêjê ca mehcukij, wa ite ampo jarēn

xà atajê na, cute me ipar to kênre nare. Na ca ha mehcukij — hajÿr.

²² Jeju te ihcakôc to hajÿr. Mã cahi na krãhtare xaata te cakwĩn, ne cumã harkwa to:

— Xà ajkĩ Pahpãm mã mehcajrën catêjê jŏ pahhimã me pahcakôc xà te hajÿr? — hajÿr. Mã Jeju cumã:

²³ — Wa ihhêaj to ampo jarën xà kaj na harê, ca ha mër imã harê, wa hahkre pej. Nãmri wa ha ite ampeaj kam ijũjarën na, ca ha nee icakwĩn nare. Ne mër ampo na mã ate icakwĩn? — hane.

²⁴ Jirô pê mã ri Anati pê amji jahkre kêatre, mã cute Jeju cajprea na Cajpa, pê cute Pahpãm mã mehcajrëncatêjê jŏ pahhi ata mã ihkujahêc.

Pê hipêr Petrô cute nee Jeju pupun nare na amji jarê

²⁵ Mã curia cormã cuhy na Petrô xa, ne amji cro. Mã cute mehcukij to:

— Xà apê cute me jũm pro ata kôt me apa catêjê nŏa mã ca? — hajÿr. Mã me cumã amji jarën to:

— Quê, he nee ipê mehnŏ nare — hane.

²⁶ Mã pahhi mã hàpên catêjê nŏ pê, por Petrô te jũm japac jakep ata jũkjê nŏata, te Petrô jarën to:

— Mār wa ite Pĩxô jŏ pjê kam ihkôt apupunta? — hajÿr.

²⁷ Mã hipêr Petrô cumã:

— Quê — hane, me ajkaam mã hŏxãhxãc kàr.

Pê Jeju Roman catêjê jŏ pahhi pê Pirat cuna mã xa

28 Jirô pê mã ri Roman catêjê nõ pê krĩ jŏ pahhijũrkwati ata wỳr Jeju to me mŏ, ramã apẽ ìntuwti kam. Mã nee ikre ata mã Juta catêjê nõ xàrnare. Ampo na? Cute me amji to me amji kam hapac xàa na pême hane. Quê ha ramã amji kĩn ata na ahtêp, quê ha nee Juta catêjê me, mehcahkrit catêjê atajê pê Juta catêjê nareatajê jũrkwa mã amencjêjnare. Ampo na? Cute amji kĩn ata japy ame amji to kêncupate. Na pê nee ikre ata mã Juta catêjê nõ hàrnare, cute ihtỳj me Hakren xà jŏ atajê kur prãmte.

29 Mã Pirat pê Roman catêjê nõ pê krĩ jŏ pahhi ata cator, pŏ mã, cute mehcajpar prãmte. Ne cute mehcajpar ne me cumã:

— Hũmre ita jarẽn kên jũ to mã, ca ha ame imãharê? — hajỹr.

30 Mã me cumã harẽn to:

— Quê ihkên nare na mã, wa ha nee mehpro ne awỳr me toimŏr nare — hane.

31 Mã Pirat me cumã:

— Ca ha caa quêt, ate me amji kam me gapac xàa kôt, me ate me amji ton xàa kôt, mehcuran ne ihkên mã meamẽ — hane. Mã Juta catêjê me cumã:

— Pom hũmre ita te ihkên xà ton xà ita ihtỳj ihcuran na awjahkre. Cakrô wa nee amjia kôt ite mehcuran xà nare, ne apêa ri pahhi, cwỳrjapê ca ha caa amji kampa, ne ihcuran na me imẽ, wa ha cormã mehcura — hane.

32 Ne pê ramã Jeju kỳj pê, pĩ na ajêt ne ihtyc to mŏr na amji jarêa na pê, Juta catêjê cakôc xà ata ramã cute amji jarẽn xà ata na to ipipẽ to mŏ.

³³ Mā hacp̄yã mã Pirat xà, hũrkwa mã, ne cute Jejumã hàkjêr ne ihcukij to:

— Xà apê Juta catêjê jō Pahhi? — hajÿr.

³⁴ Mā Jeju cumã:

— Xà amjia kôt ate icukij xà ita to hajÿr? Nare jũmjête amã ijarên xà kôt mã ca ate icukij ita to hajÿr? — hane.

³⁵ Mā Pirat cumã:

— Côt mã ca atÿj ipê Juta catêjê nō na apuicãmji? He me akwÿa kwÿ me, me hō pahhi catêjê te riimã me gōr. Ne mēr ampo to mã ate jũ măn? — hane.

³⁶ Mā Jeju cumã:

— He ihmpej xà ita pē nee pjê ita tekjê nare, ne quêt cōjkwa kam ri ihmpej xà. Wa ha ipê pjê ita kam pahhi xà na mã, quê ha ramã ikôt me ipa catêjê ihtÿj itête me ajpu, Juta catêjê mã cute me ijōr to hajÿr cupate. Nenee pjê ita kam ipê pahhi xà nare — hane.

³⁷ Mā Pirat cumã:

— Xà mēr apê pahhi? — hane. Mā Jeju cumã:

— Pom ca atea ita na ijarên ita? Ampeaj kam ri ipêPahhi, ne ite catyt kam amji kam ijapac xà jarên to ipaxà caxuw, wa pjê ita wÿr icator, ne caxuaw pēwa ipÿm, ne pjê ita wÿr ajpên mō. Ne por quê ha jũmampeaj kam ite catyt kam amji kam ijapac xà ata na itoamji mã ihhimpej ata, quê ha ihtÿj ikôat amji to — hane.

³⁸ Mā Pirat cumã:

— Ne mēr ampo pē mã “...ampeaj kam...” me “...catyt kam...” ita? — hane.

Pê Pirat Parapa mã hikra Jirô pē mã ri hipêr

Juta catêjê wÿr cator, cute mecumã ihcakôc prãnte, ne me cumã:

— Wa nee ite hÿmre ita curan xà caxuw kam ampo kên nô mã icator nare.

³⁹ Ne me Hakren xà jŏ amji kÿn ita cunea kam wahãn ne itÿj me amã me hacjên catêjê pyxit ne hapôj. Xà wa ha ajkÿ Juta catêjê jŏ Pahhi ita mã hikra? — hajÿr.

⁴⁰ Mã mehcunea ame caràr to:

— Quê, nee ca cumã hikran nare, Parapa mã, ca hahikra — hane. Ne por Parapa ata pê ri hàprêa kam mecupê ampo to pŏj catê.

19

Pê krãhtare Jeju cahhy ne ahna xwÿ

¹ Mã Pirat te krãhtare kwÿ mã pryti kà kamwakÿre to Jeju cahhyr kêanre na harkwa.

² Mã krãhtare te me to hapactu na me ajpên par, ne me amji mã:

— Hacme, ne ame to pajapactu — hajÿr. Ne cute hŏmjÿ to me cumã pahhi krãhkà, ne ihkrã mã me haxàr. Ne cute me hŏ pahhi kà intepti ata mã me haxàr, ne ahna me hãm, mã xa.

³ Mã hÿrmã me pra ne ahna me ahtêp ne me ahna xwÿ to:

— Hàpà Juta catêjê jŏ pahhi, ampeaj kam apej, ne ampeaj kam atÿj! — hane. Ne ajco mehÿhkra krã to mehcahy.

⁴ Mã hipêr me hàhtôti atajê wÿr Pirat cator, ne mecumã:

— Me ikampa! Wa ha ajpên Jeju ita to mŏ, ne me acuna mã hãm. Ne imãa ihhêj ne nee cute

ampo kên ton nare, iteihcuran xà caxuw. Ne mēr ampo na wa ha ajteihcura? — hane.

⁵ Mā Jeju cator, ne ihkrā na hōmjī te me hō pahhi krāhkà ata ajêt, mā ihkà intepti kam xa. Mā Pirat te me cumā harēn to:

— Nāmhā hūmre ita xa he! Me hōmpu, imāa ramā ihhêj ne cute amji pupun xà kēanre na amji pupun — hajÿr.

⁶ Mā Pahpām mā mehcajrēn catêjê jō pahhi kwÿme, cute me Pahpām jūrkwā jamār catêjê me, cuteme Jeju pupun, ne me carār kam me to ihtēm, ne me carār to:

— Pī kam me axô! Pī kam me axô quē ty! — hane. Mā Pirat me cumā:

— Wa nee ite kam ampo kên mā icator nare ita kam, wa neeihcuran nare. Quē ha me amā ihcuran prām na, ca ha me caa, ate amji kam me gapac xāa to me to mō, ne pī kam me axô ne mehcura — hane.

⁷ Mā Juta catêjê me cumā:

— Me icaca xà jō kàhhôc kam, cute harēn to: “Quêha jūm te cupê Pahpām kra na amji jarēn na, quē haihtÿj mehcura” hajÿr. Cwÿrjapê ca ha atÿj ite mehcuran xà na me imē, wa ha mehcura — hane.

⁸ Mā Pirat te, Jeju te Pahpām kra na amji jarēn na, me harēn par, ne ampeaj kam cumā hūpa.

⁹ Mā ma hacpÿ mā hūrkwā mā hār, ne cute Jeju cukijto:

— Jū pīn mā ca ajte acator? — hajÿr. Mā nee Jeju te cumā jū mǎn nare.

¹⁰ Mā Pirat te cumā harkwa to:

— Xà amã imã acakôc prãm nare? He xà amã itỳj iteacuran xà me, amã hikran xà na, apê ijahkre kêatre? — hajỹr.

¹¹ Mã Jeju cumã:

— Quê ha kỳj rũm còjkwa kam Inxũ pĩn ate ito hajỹr xà ita caxuw amã acarôt cator nare na mã, ca ha nee ito jũ mãn nare. Ne por jũmjê te amã ijõr atajê te ri girôa pê ito kêanre — hane.

¹² Mã Pirat te ihcakôc xà ata na kam hapac, cwỳrjapêri ihtỳj cumã Jeju mã hikran prãm cakrô, mã Jutacatêjê ame cumã caràr to:

— Ca ha ate cumã hikran na, ca ha nee ramã apê pjê cunea jô pahhiti pêXexa ata jô ikwỳ nõ nare! Ne por jũmamã cupê pahhi na amji jarê ata pê ri gõ pahhiti, ne cupê Xexa curê xwỳn! — hane.

¹³ Mã Pirat te ita kam hapac, ne põ mã Jeju to cator. Por põ pê kên te ihcahty, mã Juta catêjê te me harkwa na me cumã haprỳ to Capata ata wỳr Jeju to cator, mã xa. Mã Pirat te ihkrĩ xà kam mehkên catêjê cukij xà ata kam hỹr, cute Jeju kên mã mên xà caxuw.

¹⁴ Ne pê amcro ata kam, cute me Hakren xà jô amji kĩn kam me to ihtêm xwỳjrea na, ramã pyt ajmãr me pahkrã jimoac kam hỹr kam pê me to hane. Mã Pirat te Juta catêjê mã hũjarên to:

— Ihnãm hã, me gõ Pahhi xa he! — hajỹr.

¹⁵ Mã cute me caràr to:

— Quê ha ty! Pĩ kam me axô, quê ty! — hajỹr ita na. Mã Pirat me cumã:

— Xà me amã pĩ na me gõ Pahhi ita xôr, mã kam ihtyc na to prãm? — hane. Mã Pahpãm

mã mehcajrëncatêjê jŏ pahhi kwỳ te me cumã harkwa to:

— Me imã Roman jŏ krĩ kam, pjê cunea jŏ pahhiti pê Xexa pê me ijŏ pahhiti ata pyxit peaj. Na ri nee iràn xà na me imã me ijŏ pahhi nõhamreare — hajÿr.

¹⁶ Mã hamre Pirat te pĩ na cute me Jeju xŏr xà caxuwme cumã hŏr, mã ma me to mŏ. Ne cute me Jeju mã pĩhticatia te amji kam ihcapa ata jŏr.

Pê krãhtare pĩ na Jeju xŏ

¹⁷ Ne ma kën nõ ata wÿr me to mŏ. Ne Juta catêjê jarkwa na kën ata japrÿ te Corcota, ne ihkôt harën xà te “Mehkrãhhi jŏ kën”. Mã ma cute hŏ pĩhti ata pÿn ne cupjê.

¹⁸ Mã curi me to cator, ne cute pĩ na me hir, ne ahna hũhkra me ihpar kam wakÿre cuhhêc, ne ahna me hãm, mã kÿaj pê kam ajêt. Nehanea ne cute ihkôt me hũmre to me ipijakrut, ne hajÿar ne ajtea me hŏ pĩa kam me haxŏr, ne ahna me hũxwÿr. Mã Jeju mehcote na ajêt, mã cute me hũjê ne me to ajêt.

Pê pĩ na ihkàhhŏc ajêt ata Jeju jarẽ

¹⁹ Mã Pirat te Jeju na ihkàhhŏc jipêj, ne cute ihkrãcwÿrpê pĩ na inxŏr na hũjahkre. Ne pê krĩxàreinchrê jarkwa na ihhŏc atajê pê Juta catêjê jarkwa me, Roman catêjê jarkwa me, Crec catêjê jarkwa. Ne ihkàhhŏc ata hũjarën to:

— Naxare jŏ krĩ pĩn hũmre pê Jeju cator, ita pê riJuta catêjê jŏ Pahhi — hane.

²⁰ Pom curi cute pĩ na me Jeju xŏr ata, krĩna pire mã, na ri ihtÿj Juta catêjê jàhtŏa ne cute mehkàhhŏc ata cahyt.

21 Mă Pahpăm mă mehcajrën catêjê jŏ pahhi-catêjê te Pirat mă ihkăhhôc ata to mehhimpej to:

— Pom ate ahna ihhôc to: “Cupê Juta Catêjê Jŏ Pahhiti” hajÿr to ita ca ha antuw, ne “Cutea amji jarën to, ‘Ipê JutaCatêjê Jŏ Pahhiti’ ” hajÿr na, ca ha ihhôc — hajÿr. Mă Pirat me cumă:

22 — Pom wa ite ahna ihhôc ita, quê ha hàhhuç rohnÿtti mă — hane.

Pê krăhtare amji mă Jeju kà to ajcrà

23 Mă krăhtare atajê te pï na me Jeju cakrô inxôr, mă ihcakrô ajêt. Jirô pê mă ri cute me cwat itajê te ahpÿanre na ihkàto me amji tÿj. Ne hanea ne cute me ihkàte ihpar kôn na iwryç tu ata pyr.

24 Ne cute me ajpën par to:

— Cu ha nee ame ihkà impejti pijapÿn xà nare ita cokjêr nare, ne cama kën to ihkôt me amji pê hÿhkà. Ne me pahnô te amji pêto hÿhkàr na, cu ha me pahnô amji mă ihcunea nacupy — hajÿr. Hŏ, pê ramă Pahpăm jŏ kăhhôc ita jarëan xà na pê hane, pê harën to:

“Cute ikà to me amji tÿj, ne ihkôt kën to ame amji pêhÿhkà” hane.

Ne ampeaj kam pê cute harën xà ata. Na rikrăhtare te hahkre pej nare kam ihtÿj ton.

Pê Jeju Jowăw te inxi to amji pytâr na cumă awjahkre

25 Mă pï na Jeju ajêt ata krac ri cuna mă wa Jeju menxi me, ihtŏj xa, mă hanea ne me cahi na

Marij Matarkwỳj me, Marij nŏ pē Cropa me hĩxi ata, hanea ne xa.

²⁶ Mã Jeju te ipupun, ne icahê na inxi pupun, ne cumã:

— Inxê, por ijaxà kam acahê na akra xa ata — hajỹr.

²⁷ Ne imã:

— Jowāw, por ana acahê na xa ata — hane. Cwỳrjapê wa ite ahna amji caxàr, mã ijũrkwa kam hŏtpê icahê na ihkrĩ.

Jeju tyc xà

²⁸ Jirô pē mã ri Jeju te ramã pjê kam hàpên xàcunea jipêj na amji jahkre pej, na ri cute harkwa to:

— Ampeaj kam imã kŏr — hajỹr. Ne pē ramã Pahpãm jŏ kàhhôc harkwa jarêan xà na ri cute ihcakôc xà ita to hajỹr.

²⁹ Mã curia ampo cacô xwa xỳre na kyre pē hĩ ahwỳ ata xa, mã cute ampo pĩhhê nŏ na, me ampo rerecti ita xŏr, ne me to inco, ne Jeju jarkwa mã me haxàr.

³⁰ Mã cute to ihkŏm ne harkwa to:

— Hamre, ramã ite ijàpên xà cunea jipêj, mãhamre! — hajỹr. Ne pea imput pec to mŏ ne ihtyc.

Pê krãhtare Jeju jĩpê kam caxwỳ

³¹ Mã Juta catêjê te Pirat na me hàhwỳr, quê mehũmre incrê ne pĩ na me harij atajê te kēhkē, mãrquê cyt ne amehtyc pa, quê pĩ pē me to irŏrôc pa. Ampo na? Ramã mehkôt xà jŏ amcroa kam hàhhuc to mŏ, na ri ma apu pĩ kam me jũmjê tyc ne ame harij na ame to ihcaca. Ampo

na? Por ajpên iràrà mō ata na ri ramã cute me amji kîn catia kamme to ihtēm xà. Na ri Pirat te mehte kēhkēn na hōkrāhtare mǎ harkwa kujahêc.

³² Mǎ krāhtare te, por pī kam ame harij atajê tekēhkēn. Ne mam cute, por cute me ipijakrut to me Jeju jūjê atajê nō te kwīn, ne ihkôt cute me ita te kwīn.

³³ Jirô pê mǎ ri ma Jeju wÿr me mō, ne ahna me hàhtêp ne cute me hōmpun, mǎ ramã ihtyc tu ne ajêc. Cwÿrjapê ri nee cute mehte kwīn nare.

³⁴ Mǎ krāhtare nō te hō kruwxwa to Jeju jīpê kamcaxwÿr, ne cumã caxàr, mǎ ihkôt mare mǎ caprô me côajxwÿ.

³⁵ He wa ite ito ita to hōmpun, na wa iteihkàhhôc ita kam me amã harên, mǎr ca hanea ne me kampa, ne catyt kam Jeju to amji mǎ me ahimpej. He wa nee ame amã ihêj xi jarên nare.

³⁶ Pê Pahpām jō kàhhôc Jeju jarên to:

— Quê ha nee ahi nō impàt nare — hane.

³⁷ Ne pê hanea ne kam harên to:

— Quê ha me, por kruwxwa to cute me jūm caxwÿr ata pupu — hane, ata na ri cute hajÿr.

Cute me Jeju jarêc xà

³⁸ Ne pê Joje pê Krīhkàhti jō krī catêjê nō ata mǎ, Juta catêjê jō pahhi kwÿ cupa, na pê aracricupê Jeju kôt ipa catê. Mǎ cator ne cute Jeju jī na Pirat wÿr. Mǎ Pirat te cumã hahkre. Mǎ ma Joje tē. Mǎ ma ihkôt, por pê caxwa ri Nicotem mō ne Jeju pupu ata tē, ne cutepī pê me Jeju jī caxàr.

³⁹ Ne Nicotem ata ampo pĩ pàrkà cuxwati atame, ampo pĩhhô pê ràm cuxwa pyràcti ata pỳ, ne to kwỳ ata pê hũtĩ trĩnta quir.

⁴⁰ Ne me hũmre pijakrut atajê te me Jeju jĩ na hàhwỳr, ne ma me to kwỳ, ne cute ampo kà ata me, ihnõ cuxwa pê ràm cuxwa pyràcti ata to me Jeju cunea cukên, ne cupêhkà jakati impejti to mehcupu. Hõhõ, pê Juta catêjêcute me amji jarêt xà caxuw ajco me amji to hane.

⁴¹ Ne por pê curi pĩ na me Jeju xô ata cahê na, pĩxô jŏ pjê kam, cute me amji jarêt xà caxuw kên kre tuwti nõ ata, mã rỳ nee jũm te kam amji jarêt nare.

⁴² Ne pê Juta catêjê mã amcro te amji mã incjêjxà pê, ajco pytre kam ajpên mã acjêj. Ne caxwa pê, pê ajco ramã amcro intuw amji mã acjêj. Ne ma apu amji kĩn kam mehkôt xà kam mehtyc to me hàpên tète me ajpên mã. Na pê me hũjarêan kam pĩxô jŏ pjê kam kên krenõ ata kam, me Jeju jĩ xi.

20

Pê hacpỹa mã Jeju tĩr

¹ Mã mehkôt xà jŏ amcro jirô pê, tômĩc na, iràràtia na cormãahkũmti kam, ma Marij Matarkwỳj kre wỳr tẽ. Ne cute, por kên to cute me Jeju kre jarkwa jihê ata pupun, mã ajte hihê mên na xa.

² Mã cute hõmpun ne ma Petrô me, iwỳr ipicahur. Neme iwỳr cator ne cute me imã hũjarên to:

— Cute kre pĩn me pajŏ Pahhi jĩ caxàr ne jũ ri mehir! — hane.

3-4 Wa ma Petrô me ajwar kên kre wÿr me ipicahur, waite irer ne mam kre wÿr icator.

5 Ne kên kre jarkwa mã inôr, ne tee apu Jeju jĩ japê, ne nee ite hõmpunnare. Ne ite cupêhkà pit pupun, ne nee hÿrmã ixàr nare.

6 Mã hapu na ikôt Petrô tẽ ne cator, ne ma kre mã hàr. Necute cupêhkà pit pupun, nôr xà kam.

7 Ne hanea ne, por pê cupêhkà ihkrã jarij ata, curiahakàn pê ajtea ihkrã pejti ne nõ.

8 Wa hanea ne ihkôt ixàr ne ite cupêhkà pit pupun, neite hacpÿa mã Jeju tĩrna amji mã to hajÿr pyrentu.

9 Ne nee ajte cormã me Pahpãm jõ kàhhôc kamcute harên xà to: “Quê ha ihtÿj hacpÿa mã Jeju ihtĩr” hajÿr ata na ihkôt me hakop to impej nare.

10 Ne ma hacpÿ mã ikre wÿr ite me amji jaxàr.

Pê Jeju Marij Matarkwÿj mã amji to ajpẽ

11-12 Mã Marij Matarkwÿj curia xa ne põ pê apu amrã. Mã aracri ramã cõjkwa pĩn Pahpãm mã memprar catêjêpijakrut ne Jeju nôr xà kam me jÿ. Mã Marij Matarkwÿj te Jeju japên prãmte kre mã nôr, ne cute Pahpãm mã memprar catêjê pupun. Mã ihkrã nôr xà kam ita jÿ, mã ita ihpar nôr xàkam jÿ, mehkà jakati kam, cute me hÿjê ne me to jÿ.

13 Ne cute me Marij cukij to:

— Ampo na mã ca apu amrã? — hajÿr. Mã me cumã:

— Jũ kam cute me ijõ Pahhi jĩ caxàr ne me to tẽ, nejũ ri mõrmõ cute me hir, ipê hir xà na hahkrekêatre! — hane.

14 Ne cute me cumã ita jarën jirô pê mã ri ipipkjërne cute Jeju pupun, mã xa, mã nee cute cupê Jeju nahahkre pej nare.

15 Mã cute ihcukij to:

— Ampo na mã ca apu amrã? Ne jũm mã ca apuhapê? — hajÿr. Mã ihtÿj apu to pĩxô jŏ pjê jamãr catêjê nõ, ne cumã:

— Ca ha ate mãn caxàr ne jũ ri hir na, ca ha imã harê, wa ha capa ne hacpÿa mã kën kre wÿr to mŏ — hane.

16 Mã Jeju cumã:

— Marij — hane. Mã hÿrmã ipipkjêr, ne cute Jutacatêjê jarkwa na cumã:

— Rapõn! — hane, ne Rapõn ita jũjarën xà te “Ikrã tũmti!”

17 Mã Jeju cumã:

— Nee ca icupên nare, nãmri wa cormã nee Inxũ wÿrijàpir nare. Ne cama atêm pyrentu ne me ikjêjê mãjarën to: “Wa ha ma Inxũ pê me Apãm, pê ijŏ Pahhiti pê me gŏ Pahhiti wÿr tẽ” — hane.

18 Mã ma Marij ihtêm pyrentu, ne cute me imã hũjarënto:

— Wa ite me pajŏ Pahhi pupun — hajÿr. Ne cute me imãJeju te cumã harkwa hyr xà atajê jarën par.

Pê Jeju ihkôt me ipa catêjê mã amji to ajpẽ

19 Mã amcro ata na, me ipê Jeju kôt me ipa catêjê te ramã caxwa ryre kam me cuprôn, ne ite amji na me to harkwa jihê, Juta catêjê kwÿ cupate. Mã ihprôt pê, krãa, me iwÿr Jeju cator ne meicote na xa, ne me imã:

— Hàpà, mār me apeaj? Nee ca icupate ame akrihkrit nare — hane.

²⁰ Jirô pê mã ri cute me imã hũhkra me hĩpê caxwỳrxwakre jahkre, wa ite me hõmpun, ne ampeaj kam hũrên me ijakry.

²¹ Mã hipêr Jeju me imã:

— Inxũ mã, me amã ampo cupa nare na me ato prãm. Ampo na? Pom ahnaa mã Inxũ te ajpên ikujahêc ita na, wa ha me ato, ne pjê cunea kôt ame acrà ne ame akujate — hane.

²² Jirô pê mã ri cute me icunea jakôr, ne me imã harkwa to:

— Imã me ate me Inxũ Carõ Pejti incwỳr na me atoprãm.

²³ Na ca ha me cumã acakôc ne ijaprỳa na me cumãacakôc. Ne ita caxuw, ca ha ate jũm te Inxũ Cati to kên ata mã: “Ca ate Pahpãm to kên ata, cute to tojnõ ne hìcu” hajỳr na, quê ha InxũCati acuxà ihtỳj cute to kên ata to tojnõ ne hìcu. Nãmri ca ha ate jũm mã: “Pahpãm te nee ate to kên xà ata to tojnõ ne hìcu nare” hajỳr na, quê ha Inxũ Cati acuxà, garkwa kôt nee to tojnõ ne hìcunare — hajỳr, ne curia hamre, ne ma tẽ.

Pê Jeju Tome mã amji to ajpẽ

²⁴ Ne me iwỳr Jeju cator xà ata kam, ne pê nee me ijõ ikwỳ nõ japrỳ te Tome pê, por ajkrut ne ihpỳm ata, ame icahe na mõi nare, ne jũ ri apu mõi.

²⁵ Na wa ite me cumã ijũjarên to:

— Wa ite me pajõ Pahhi pupun! — hajỳr. Mã me imã:

— Wa ha nee ate me imã gũjarên xà ita kam ijapac ne amji mã to hajỳr nare. Ne xahũhkra

caxwÿr xwakre pupu, ne kam ijũhkrahhi xi, ne hĩpê caxwÿr xà kôt ijũ jaxà ne ihcupê, ne cormã ita na amji mã to hane — hane.

²⁶ Mã me ina amcro te xet, wa hacpÿa mã ite me cuprõn, mã ita caxuw curia hanea ne me icahê na Tome apu mõ. Wa ite me to harkwa cunea jihê partu cakrô, mã krãa, Jeju me ijipôc ri catorne xa, ne me imã:

— Hàpà, mār me apeaj? Nee ca icupate ame akrihkritnare — hane.

²⁷ Ne Tome mã:

— Tome, mēr ijũhkra pupu ne caxwÿr xà xwakre mägũhkrahhi jaxà ne to ihcupê. Ne ijĩpê caxwÿr xà xwakre mã gũ jaxà ne ihcupê ne ijahkre pej. Nãmhã ne gàprār xi ita mã hikra, neito ca amji mã ahimpej! — hane.

²⁸ Mã Tome cumã:

— Apê ijô Pahhiti pê Pahpãm — hane.

²⁹ Mã Jeju cumã:

— Ca ate ato jĩa to ipupun, cwÿrjapê mã ca cormã ate ito amji mã ahimpej. Por jũmjê me ipupun nare kamihtÿj ito amji mã mehhimpej atajê ri ampeaj kam mehakry! — hane, jirô pê mã ri hamre ne ma tẽ.

Pê ihkàhhôc ita Jeju to pahte amji mã me pahhimpej na me pamã awjahkre

³⁰ Ỹhÿ, he me ikam mare mã Jeju te Hũm carôt kôt hàpên xà pihhocatia jãhtôa ne ton atajê, wa nee ite me amã ihkàhhôc ita kam nør nare.

³¹ Ne pom ca ame cahyt itajê, wa ite ihkàhhôc ita kamme amã nør partu, mār ca ate me Jeju Crixto pê Pahpãm kra, mã cute me pahpytār catê na me pamã to hũjahkre ata to, ate amji mã

meahimpej prāmte, wa ite ahna me amã ihhôt. Ampo na? He ca ha ate Jeju to amji mã me ahimpej na, caha atỳj cukwa kam Pahpãm cahê na amji to me apijapar rohnỳtti mã.

21

Pê Jeju Hīpôjajo intohkà na ihkôt me ipa catêjê mã amji to ajpê

¹ Jirô pê mã ri Jeju te me ipê ihkôt me ipa catêjêmã hipêr amji to ipipê, Hīpôjajo jô pjê pê Tiperij jô krī ata cahê na. Hô, pê hane.

² Ite me xet itajê wa ame ipa he: Wa itô pê Tijac me ipê Xeptew kra me, XimãwPetrô me, Tome pê ajkrut ne ihpỳm ata me, Têtêc jô krī pīn Natanew cator ata me, me ikwỳa kwỳ pijakrut atajê me.

³ Mã Ximãw Petrô te me imã:

— Wa ha ma mō ne tep pro xà to ihnō pro — hajỳr. Wa mecumã:

— Wa ha hanea ne me akôt me to ihnō pro — hane. Ne ma meicunea me mō, ne pàr kre mã me ixàr. Ne caxwa ri ihpro xà to ite me hapêan to apê, ne nee ite me to ihnō pro nare.

⁴ Mã ramã apê to mō, mã ramã xãmte aracri Jeju cô tohkà na xa. Wa nee ite me cupê Jeju na hahkre pej nare.

⁵ Mã me imã caràr to:

— Hàpà me hũmre itajê? Ampo ca ate me toihpro? — hane. Wa me cumã:

— Hamreare, wa tee ite me to hapêan to apê, ne nee iteme to ihnō pro nare — hane.

⁶ Mã Jeju me imã:

— Měr cô kam awpôc rŭm, pàr kre jĭkjê rŭm me gŏ teppro xà ita to me awcapê, ca ha atÿj me to ihkwÿpro — hane. Wa ite cô kam me ijŏ kryhti to me ijŭcapêr, ne ite me toihkjên, ne nee hacpÿ ne pàr kre wÿr me to ijàpirnare. Ampo na? Ampeaj kam, tep itajê cati ne hàhtô, na ri hŭtĭ.

⁷ Wa ite Petrô mã ijarkwa to:

— He me pajŏ Pahhiti pê Jeju ri xa! — hajÿr. Mã Ximãw Petrô ihcacrô apu kwÿ ne cute Jeju jarênpar, ne hitô kàhti ata mã amji jaxàr, ne ma mrôr neihpa na kwÿ ne ma Jeju wÿr cô tohkà na cator.

⁸ Wa ma hapu na me ikwÿ me pàr kre to ajpên me tep na, ihpro xà kjên to me mŏ, por hÿrmã hŭwry na me pajara capô te xĭncwënta ata wÿr, ne hÿrmã me to icator.

⁹ Ne pŏ mã pàr kre pê me ijapôj pê, ite me cuhy prà kam tep kwÿ krĭna me hŏmpun. Ne hanea ne ite me pãw pupun, mã hikwa.

¹⁰ Mã Jeju me imã:

— Ajpên me imã, pom curmã ate me to tep pro itajê kwÿ to tĕ — hane.

¹¹ Mã ma Ximãw Petrô pàr kre mã hàr, ne cute hŏ natep na ihpro xà mã hê, ne ajêt ata mã hê pôn, ne mapjê wÿr to hàpir. Mã kam tep cati pit jàhtô na cute xĕj ne ihkôt xĭncwënta ne ihkôt incrê ne tohipu tu, ne nee ajte cute kryhti ata jipôn nare.

¹² Mã Jeju me imã:

— Ajpên me mŏ ne me apà — hane. Wa ramã ite cupê meijŏ Pahhiti na me hahkre pej. Ne

hūpate, nee me inō tecupê jūm ata na ihcukij nare.

¹³ Mā Jeju te me imā pāw me tep ata kryj, ne ahpyānre na me imā hōr par.

¹⁴ Hō, pê Jeju hacpỹ mā ihtīr jirô pê me imāamji to ipipê to incrê to hane.

Pê Jeju Petrô mā ihkīn na ihcukij

¹⁵ Wa me ijàpàn jirô pê mā ri Jeju te amji na XimāwPetrô cukij to incrê ne cumā:

— Ỹhỹ Ximāw Petrô pê Jowāw kra ita, xà ajkīme akwỹ jirôa pê amā ikīn? — hajỹr. Mā Ximāwcumā:

— Ỹhỹ ijō Pahhi, imā akīn na ramā ateaiahkre pej — hane. Mā Jeju cumā:

— Ỹhỹ, ca ha me cupê ijahkre kêatre, mā nee cute meipupun nare atajê mā ijarê, ne me cumā ijarkwa gō. Ampona? He me cupê carà cahàcre hôhti kra pê hamār catê nare ata pyràac, ne amjia kôt ikaj na ame ipa — hane.

¹⁶ Ne cute ihcukij to ipijakrut ita kam ri hipêr cumā:

— Ximāw xà ajkī ampeaj kam amā ikīn? — hajỹr. MāPetrô cumā:

— Ỹhỹ ijō Pahhi, imā akīn na ramā atea ijahkre pej — hane. Mā Jeju cumā:

— Ca ha me ikwỹ pê carà cahàcre pyràc pê hamār catê nareatajê to amji pytà ne me hamā — hane.

¹⁷ Ne hipêr Jeju te ihcukij to:

— Ximāw, xà ajkī ampeaj kam amā ikīn? — hajỹr. Mā Petrô mā amji kīn nare, mā apu ihpec. Ampona? Nee mā ampo na nare, Jeju te cumā

ihkīn na ihcukij toincrê, na ri cumã amji kīn nare, mã cumã:

— Ijō Pahhi, amã ampo cunea jahkre pej, na ri atỳj amã ite akīn na ijahkre pej! — hane. Mã Jeju cumã:

— Ca ha me ikwỳ pê carà cahàcre pyràc pê hamār catê nareatajê to amji pytà ne me hamã.

Jeju Petrô mã, por ampo te to jũ mãn xà ata jarê

¹⁸ — Ỡhỹ, wa ha amã awjarê, pê ca atuwre na, ajco akà to amji cùmpej, ne ma jũ ri amã amōr xà na ihprãmti ata wỳr ajco pra. Ne ampeaj kam wa ha ita caxuw amã awjarê. Ca ha awej, quê ha jũmjê gara cajpre, ne jũ ri amã amōr prãmnare, ne hỹrmã gitōtti ata wỳr me ato mō — hane.

¹⁹ Pê Jeju hũjarên xà ata to ramã Petrô mã, jũcaxuw cute mehcuran xà ata to hahkre. Ne quê ha Jeju cwỳrjapê Petrô tyc xà ata kôt, quê ha mehcuea me Pahpãm cati na me hahkre pej. Ne cute Petrô mã:

— Ita caxuw ca ha ito pit mã amji mã ahimpej, ne ikôat apa! — hajỳr.

Pê Jeju nee ampo te Jowãw to jũ mãn xà na harên nare

²⁰ Mã hacpỹ mã Petrô pipkjêr ne amji jō kôt cuteipupun. Ne pê ramã Petrô mã Jeju mã ikīnti na ijahkre pej. Ampo na? He pê wa me Hakren xà jō amji kīn na me ijapàn xà na cahê na jỹ ne ihcukij to: “Jũm mã quê ha ajteakên mã amê?” hane cwỳrjapê.

²¹ Mã Petrô te ipupun, ne ina Jeju cukij to:

— Pahhi, ne mē̄r hūmre ita, jū mā̄ quē ha ajte? — hajỹr.

²² Mā̄ Jeju cumā̄:

— Quē imā̄ ihtĩr ita na ipa, wa ahnaa hacpỹ ne ite amijaxàr na to prām na mā̄, quē ihtỹj ipa, ca ha neeahna ihho nare. Ne ca, ca ha ito pit mā̄ amji mā̄ ahimpej to apa — hane.

²³ Mā̄ Jeju kôt me ipa catêjê te amji mām̄e ijarēn cràn, Jeju te xwahna ityc xà nare na ijarēn ata na. Ne nee cute harēn to hajỹr nare. Ne nee ito Petrô mā̄:

— Quē ha nee Jowāw ihtyc nare — hajỹr nare. Ne cama cute ijarēn to hajỹr he:

— Quē imā̄ ihtĩr ita na ipa, wa ahnaa hacpỹ ne ite amijaxàr na to prām na mā̄, quē ihtỹj ihtĩr ita na ipa, ca ha nee ahna ihho nare — hajỹr.

Pê Jeju jàpên xà atajê, ampeaj kam hàhtô

²⁴ He ipê Jowāw, pê wa ito ita jĩa to ampo itajêpupu, ne impar xàa na wa ite ahna pit mā̄ me amā̄ ihhòc par. Ne ramā̄ ate me ipupun pejtu, ihêj xi nare na, na ri ampeaj kam cute hajỹr.

²⁵ Ne cormā̄ Jeju te ampo jàhtôa ne ton atajê, wa neeite ihkàhhòc ita kam ahna ihhòc nare. Quē jūm ahnaihhòc na mā̄, quē ha nee pjê cunea kam ihkàhhòc itajênô hàhtô na cahuc nare. Hamre.

cxlix

PAHPÃM JARKWA CUPAHTI JÕ KÀHHÔC
Canela: PAHPÃM JARKWA CUPAHTI JÕ KÀHHÔC
(Portions)

copyright © 2012 Wycliffe Bible Translators, Inc.

Language: (Canela)

Contributor: Wycliffe Bible Translators, Inc.

All rights reserved.

2020-11-16

PDF generated using Haiola and XeLaTeX on 1 Oct 2024 from source files
dated 29 Jan 2022

09d4e460-c38b-52b7-81c1-8300bfeb466a